

新唐書

冊五

新唐書
冊五
PDG

唐書卷一百三十四

宋 端 明 殿 學 士 宋 祁 撰

列傳第五十九

宇文章楊王

宇文融京兆萬年人隋平昌公敞裔孫祖節明法令貞觀中爲尚書右丞謹幹自將江夏王道宗以事請節節以聞太宗喜賚絹二百勞之曰朕比不置左右僕射正以公在省耳永徽初遷黃門侍郎同中書門下三品代于志寧爲侍中坐房遺愛友善貶桂州卒融明辯長於吏治開元初調富平主簿源乾曜孟温繼爲京兆賢其人厚爲禮時天下戶版刻隱人多去本籍浮食閭里詭脫絲賦豪弱相并州縣莫能制融由監察御史陳便宜請校天下籍收匿戶羨田佐用度玄宗以融爲覆田勸農使鈎檢帳符得僞勳亡丁甚衆擢兵部員外郎兼侍御史融乃奏慕容琦韋洽裴寬班景倩庠狄履温賈晉等二十九人爲勸農判官假御史分按州縣括正丘畝招徠戶口而分業之又兼租地安輯戶口使於

是諸道收沒戶八十萬田亦稱是歲終羨錢數百萬緡帝悅引拜御史中丞然
吏下希望融旨不能無擾張空最務多其獲而流客頗脫不止初議者以生事
沮詰百端而帝意向之宰相源乾曜等佐其舉又集羣臣大議公卿雷同不敢
異唯戶部侍郎楊瑒以爲籍外取稅百姓困弊得不酬失瑒坐左遷融乃自請
馳傳行天下事無巨細先上勸農使而後上臺省臺省須其意乃行下融所過
見高年宣天子恩旨百姓至有感涕者使還言狀帝乃下詔以客賦所在並建
常平倉益貯九穀權發斂官司勸作農社使貧富相恤凡農月州縣常務一切
罷省使趨刈穫流亡新歸十道各分官屬存撫使遂厥功復業已定州縣季一
申牒不須挾名中書令張說素惡融融每建白說輒引大體廷爭融揣說不善
欲先事中傷之張九齡謂說曰融新用事辯給多詐公不可以忽說曰狗鼠何
能爲會帝封太山還融以選限簿冬請分吏部爲十銓有詔融與禮部尙書蘇
頲刑部尙書韋抗工部尙書盧從愿右散騎常侍徐堅蒲州刺史崔琳魏州刺
史崔沔荊州長史韋虛心鄭州刺史賈曾懷州刺史王丘分總而不得參事一

決於上融奏選事說屢卻之融怒乃與御史大夫崔隱甫等廷劾說引術士解禱又受賦說由是罷宰相融畏說且復用訾詆不已帝疾其黨詔說致仕放隱甫于家出融爲魏州刺史方河北大水卽詔領宣撫使俄兼檢校汴州刺史河南北溝渠隄堰決九河使又建請墾九河故地爲稻田權陸運本錢收其子入官興役紛然而卒無成功入爲鴻臚卿兼戶部侍郎明年進黃門侍郎同中書門下平章事融曰使吾執政得數月久天下定矣乃薦宋璟爲右丞相裴耀卿爲戶部侍郎許景先爲工部侍郎當時長其知人而性卞急少所推下旣居位日引賓客故人與酣飲然而神用警敏應對如響雖天子不能屈信安王禕節度朔方融畏其權諷侍御史李宙劾奏之禕密知因玉真公主高力士自歸翌日宙通奏帝怒罷融爲汝州刺史居宰相凡百日去而錢穀亦自此不治帝思之讓宰相曰公等暴融惡朕旣罪之矣國用不足將奈何裴光庭等不能對卽使有司劾融交不逞作威福其息受贓贖狼藉乃貶融平樂尉歲餘司農發融在汴州給隱官息錢巨萬給事中馮紹烈深文推證詔流于巖州道廣州遷延

不行爲都督耿仁忠所讓惶恐上道卒初融廣置使額以侈上心百姓愁恐有司寢失職自融始帝猶思其舊功贈台州刺史其後言利得幸者踵相躡皆本於融云

子審字審融之貶也審與兄弟侍母京師及聞融再貶不告其家徒步號泣省父使者憐之以車共載達于巖州後擢進士第累遷大理評事以夏楚大小無制始創杖架以高庫度杖長短又鑄銅爲規齊其巨細楊國忠頽政殺嶺南流人以中使傳口勅行刑畏議者嫉其酷乃以審爲嶺南監決處置等使活者甚衆後終和永二州刺史

韋堅字子全京兆萬年人姊爲惠宣太子妃妹爲皇太子妃中表貴戚故仕最蚤絲祕書丞歷奉光長安令有幹名見宇文融楊慎矜父子以聚斂進乃運江淮租賦所在置吏督察以佐國稟歲終增鉅萬玄宗咨其才擢爲陝郡太守水陸運使漢有運渠起闕門西抵長安引山東租賦汭隋常治之堅爲使乃占咸陽雍渭爲堰絕灞澹而東注永豐倉下復與渭合初澹水銜苑左有望春樓堅

于下鑿爲潭以通漕二年而成帝爲升樓詔羣臣臨觀堅豫取洛汴宋山東小
斛舟三百並貯之潭篙工枕師皆大笠侈袖芒屨爲吳楚服每舟署某郡以所
產暴陳其上若廣陵則錦銅器官端綾繡會稽則羅吳綾絳紗南海瑇瑁象齒
珠琲沉香豫章力士鬻飲器茗鐺釜宣城空青石綠始安蕉葛蚌膽翠羽吳郡
方丈綾船皆尾相銜進數十里不絕關中不識連檣校櫓觀者駭異先是人間
唱得體紇那歌有楊州銅器語開元末得寶符於桃林而陝尉崔成甫以堅大
輸南方物與歌語叶更變爲得寶歌自造曲十餘解召吏唱習至是衣缺騰衫
錦半臂絳冒額立臚前倡人數百皆巾幘鮮治齊聲應和鼓吹合作船次樓下
堅跪取諸郡輕貨上於帝以給貴戚近臣上百牙盤食府縣教坊音樂迭進惠
宣妃亦出寶物供具帝大悅擢堅左散騎常侍官屬賞有差蠲役人一年賦舟
工賜錢二百萬名潭曰廣運堅進兼江淮南租庸轉運處置等使又兼御史中
丞封韋城縣男堅妻姜皎女李林甫舅子也初甚昵比旣見其寵惡之堅亦自
以得天子意銳於進又與左相李適之善故林甫授堅刑部尙書奪諸使以楊

慎矜代之堅失職稍怨望河西隴右節度使皇甫惟明數於帝前短林甫稱堅才林甫知之惟明故爲忠王友王時爲皇太子矣正月望夜惟明與堅宴集林甫奏堅外戚與邊將私且謀立太子有詔訊鞠林甫使楊慎矜楊國忠王鉞吉溫等文致其獄帝惑之貶堅縉雲太守惟明播川太守籍其家堅諸弟訴枉帝大怒太子懼表與妃絕復貶堅江夏別駕未幾長流臨封郡弟蘭爲將作少匠冰鄴令芝兵部員外郎子諒河南府戶曹皆謫去歲中遣監察御史羅希奭就殺之殺惟明於黔中惟堅妻得原從坐十餘人倉部員外郎鄭章右補闕內供奉鄭欽說監察御史豆盧友楊惠嗣薛王珣皆免官被竄堅始鑿潭多壞民冢墓起江淮至長安公私騷然及得罪林甫遣使江淮鉤索堅罪捕治舟夫漕史所在獄皆滿郡縣剝斂償輸責及鄰伍多裸死牢戶林甫死乃止

楊慎矜隋齊王暕曾孫祖正道從蕭后入突厥及破頡利可汗乃得歸爲尙衣奉御父隆禮歷州刺史善檢督吏以嚴辯自名開元初爲太府卿封弘農郡公時御府財物羨積如丘山隆禮性詳密出納雖尋尺皆自按省凡物經楊卿者

號無不精麗歲常愛省數百萬任職二十年年九十餘以戶部尙書致仕卒慎
矜沈毅任氣健而才初爲汝陽令有治稱隆禮罷太府玄宗訪其子可代父任
者宰相以慎餘慎矜慎名皆得父清白帝喜擢慎矜監察御史知太府出納慎
餘太子舍人主長安倉慎名大理評事爲含嘉倉出納使被眷尤渥慎矜遷侍
御史知雜事高置風格始議輸物有汙傷貴州縣償所直轉輕齎入京師自是
天下調發始煩天寶二年權判御史中丞京畿採訪使太府出納如故於時李
林甫用事慎矜進非其意固讓不敢拜乃授諫議大夫兼侍御史更以蕭諒爲
中丞諒爭輕重不平罷爲陝郡太守林甫知慎矜爲己屈卒授御史中丞兼諸
道鑄錢使韋堅之獄王鉷等方文致而慎矜依違不甚力鉷恨之雖林甫亦不
悅鉷父與慎矜外兄弟也故與鉷狎及爲侍御史繇慎矜所引後遷中丞同列
慎矜猶以子姓畜之鉷負林甫勢滋不平會慎矜擢戶部侍郎仍兼中丞林甫
疾其得君且逼己乃與鉷謀陷之明年慎矜父冢草木皆流血懼以問所善胡
人史敬忠敬忠使身桎梏裸而坐林中厭之又言天下且亂勸慎矜居臨汝置

田爲後計會婢春草有罪將殺之敬忠曰勿殺賣之可市十牛歲耕田十頃慎
矜從之婢入貴妃姊家因得見帝帝愛其辯惠留宮中寢侍左右帝嘗問所從
來婢奏爲慎矜家所賣帝曰彼乏錢邪對曰固將死賴史敬忠以免帝素聞敬
忠挾術間質其然婢具言敬忠夜過慎矜坐廷中步星變夜分乃去又白馱勝
事帝怒而婢漏言於楊國忠國忠銜方睦陰相語始慎矜奪銜職田辱詬其母
又嘗私語讖書銜之未有發也至聞國忠語乃喜且欲嘗帝以取驗異時奏
事數稱引慎矜帝悖然曰爾親邪毋相往來銜知帝惡甚後見慎矜輒侮侮不
爲禮慎矜怒銜乃與林甫作飛牒告慎矜本隋後蓄讖緯妖言與妄人交規復
隋室帝方在華清宮聞之震怒收慎矜尙書省詔刑部尙書蕭炅大理卿李道
邃殿中侍御史盧鉉楊國忠雜訊馳遣京兆士曹參軍吉溫繫慎餘慎名於洛
陽獄考治捕太府少卿張瑄致會昌傳舍劾瑄與慎矜共解圖讖榜掠不服鉉
遣御史崔器索讖書於慎矜小妻臥內得之詬曰逆賊所寘固密今得矣以示
慎矜慎矜曰它日無是今得之吾死命矣夫溫又誘敬忠首服詰言慎矜不能

對有詔杖敬忠賜慎矜瑄死籍其家子女悉置嶺南姻黨通事舍人辛景湊天馬副監万俟承暉閑廐使殿中監韋衢等坐竄徙者十餘族所在部送近親不得仕京師遣御史顏真卿馳洛陽決獄慎餘慎名聞兄死皆哭既讀詔輟哭慎名曰奉詔不敢稽死但寡姊垂白作數行書與別真卿許之索筆曰拙於謀己兄弟併命姊老孤癯何以堪此遂縊手指天而絕慎矜兄弟友愛事姊如母儀幹皆秀偉愛賓客標置不凡著稱於時慎名嘗視鑑歎曰兄弟皆六尺餘此貌此才欲見容當世難矣胡不使我少體弱邪世哀其言寶應初慎矜王琚韋堅皆復官爵

王鉞中書舍人璿側出子也初爲鄆尉遷監察御史擢累戶部郎中數按獄深文玄宗以爲才進兼和市和糴長春宮戶口色役使拜御史中丞京畿關內採訪黜陟使林甫方興大獄撼東宮誅不附己者以鉞險刻可動以利故倚之使驚擊狼噬鉞所摧陷多抵不道又厚誅斂嚮天子意人雖被蠲貸鉞更奏取脚直轉異貨百姓間關輸送乃倍所賦又取諸郡高戶爲租庸脚士大抵貨業皆

破督責連年人不賴生帝在位久妃御服玩脂澤之費日侈而橫與別賜不絕于時重取於左右藏故鉞迎帝旨歲進錢鉅億萬儲禁中以爲歲租外物供天子私帑帝以鉞有富國術寵遇益厚以戶部侍郎仍御史中丞加檢察內作閑廐使苑內營田五坊宮苑等使隴右羣牧度支營田使天寶八載方士李渾上言見太白老人告玉版祕記事帝詔鉞按其地求得之因是羣臣奉上帝號明年鉞爲御史大夫兼京兆尹加知總監裁接使於是領二十餘使中外畏其權鉞於第左建大院文書叢委吏爭入求署一字累數日不得者天子使者賜遺相望聲焰薰灼帝寵任鉞亞林甫而楊國忠不如也然鉞畏林甫謹事之安祿山怙寵見林甫白事稍自怠林甫欲示之威託以事召王大夫俄而鉞至趨進俯伏祿山不覺自失鉞語久祿山益恭故林甫雖忌其盛亦以附己親之子準爲衛尉少卿以鬪雞供奉禁中林甫子岫亦親近準驕甚凌岫出其上過駙馬都尉王絲以彈彈其中折玉簪爲樂旣置酒永穆公主親視供具萬年尉韋黃裳長安尉賈季鄰等候準經過饌具倡樂必素辦無敢違意鉞事嫡母孝而與

弟鐸友愛鐸疾銜宦達常忿慢不弟銜終不異情鐸歷戶部郎中銜與鐸召術士語不軌術士驚引去銜畏事泄託宅事捕殺之以絕口王府司馬安定公主子章會竊語於家左右往白銜銜遣季鄰收會長安獄夜縊死以尸還家會姻屬權近而惕息不敢言銜封太原縣公兼殿中監爲中丞也與楊國忠同列用林甫薦爲大夫故國忠不悅鐸與邢綽善綽鴻臚少卿璿子也以功名相期銜因鐸亦交綽十一載四月綽與鐸謀引右龍武軍萬騎燒都門誅執政作難先二日事覺帝召銜付告牒銜意鐸與綽連故緩其事但督兩縣尉捕賊賈季鄰逢鐸於路鐸謂曰我與綽有舊今反恐妄相引君勿受旣至綽與其黨持弓刃突出格鬪銜與國忠繼至綽黨相語曰勿鬪大夫或白國忠曰賊語陰相謂不可戰會高力士以飛龍小兒甲騎四百至斬綽盡禽其黨國忠奏銜與謀帝不信林甫亦爲銜言故帝原鐸不問然欲銜請鐸罪使國忠諷之銜良久曰弟爲先人所愛義不欲捨而謀存帝聞頗怒而陳希烈固爭當以大逆銜未知方上表自解有詔希烈訊銜矣有司不肯通奏銜見林甫林甫曰事後矣俄而鐸至

國忠問曰大夫與否未及應侍御史裴冕叱錡曰上以大夫故官君五品君爲臣不忠爲弟不誼大夫豈與反事乎國忠愕然曰與固不可隱不與不可妄錡乃曰兄不與獄具詔錡杖死錡賜死三衛尉冕請國忠以其尸歸斂葬之諸子悉誅家屬徙遠方有司籍第舍數日不能徧至以寶鈿爲井幹引泉激壘號自兩亭其奢侈類如此錡兄錫見諸弟貴戚不肯仕錡彊之爲太子僕至是貶東區尉死於道時人傷焉初錡附楊慎矜以貴已而佐林甫陷慎矜覆其家凡五年而錡亦族矣盧鉉者本以御史事韋堅爲判官堅被劾鉉發其私以結林甫又善張瑄及按慎矜則誣瑄死至錡得罪方爲閑廐判官妄曰大夫以牒索馬五百我不與衆疾其反覆貶廬江長史宅日見瑄如平生乃曰公何得來此願假須臾卒死

贊曰開元中宇文融始以言利得幸於時天子見海內完治偃然有攘卻四夷之心融度帝方調兵食故議取隱戶剩田以中主欲利說一開天子恨得之晚不十年而取宰相雖後得罪而追恨融才有所未盡也孟子所謂上下征利而

國危者可不信哉天寶以來外奉軍興內疊豔妃所費愈不貲計於是韋堅楊慎矜王鉞楊國忠各以哀刻進剝下益上歲進羨緡百億萬爲天子私藏以濟橫賜而天下經費自如帝以爲能故重官累使尊顯烜赫然天下流亡日多於前有司備員不復事而堅等所欲既充還用權媚以相屠脅四族皆覆爲天下笑夫民可安而不可擾利可通而不可竭觀數子乃欲擾而竭之斂怨基亡則向所謂利者顧不反哉鉞國忠後出橫虐最甚當方毒天下復思融云

唐書卷一百三十四

唐書卷一百三十四考證

宇文融傳融乃奏慕容琦等二十九人爲勸農判官○臣德潛按舊書置勸農

判官十人通鑑綱目俱作十人

楊慎矜傳詔刑部尙書蕭昞○舊書作蕭隱之

王綏傳然綏畏林甫謹事之○舊書作雖晉公林甫亦畏避之

唐書卷一百三十四考證

唐書卷一百三十五

宋 端 明 殿 學 士 宋 祁 撰

列傳第六十

哥舒高封

哥舒翰其先蓋突騎施酋長哥舒部之裔父道元爲安西都護將軍赤水軍使故仍世居安西翰少補效穀府果毅家富于財任俠重然諾縱蒲酒長安市年四十餘遭父喪不歸不爲長安尉所禮慨然發憤游河西事節度使王倕倕攻新城使翰經略稍知名又事王忠嗣署衙將翰能讀左氏春秋漢書通大義疏財多施予故士歸心爲大斗軍副使佐安思順不相下忠嗣更使討吐蕃副將倨見翰怒立殺之麾下爲股扞遷左衛郎將吐蕃盜邊與翰遇苦拔海吐蕃枝其軍爲三行從山差池下翰持半段槍迎擊所嚮輒披靡名蓋軍中擢授右武衛將軍副隴右節度爲河源軍使先是吐蕃候積石軍麥熟歲來取莫能禁翰乃使王難得楊景暉設伏東南谷吐蕃以五千騎入塞放馬褫甲將就田翰自

城中馳至鑿鬪虜駭走追北伏起悉殺之隻馬無還者翰嘗逐虜馬驚陷于河吐蕃三將欲刺翰翰大呼皆擁矛不敢動救兵至追殺之翰有奴曰左車年十六以膂力聞翰工用槍追及賊擬槍於肩叱之賊反顧翰刺其喉剔而騰之高五尺許乃墮左車卽下馬斬其首以爲常會忠嗣被罪帝召翰入朝部將請齎金帛以救忠嗣翰但齎樸裝曰使吾計從奚取於是不行用此足矣翰至帝虛心待與語異之拜鴻臚卿爲隴右節度副大使翰已謝卽極言忠嗣之枉帝起入禁中翰叩頭從帝且泣帝寤爲末貸其罪忠嗣不及誅朝廷稱其義踰年築神威軍青海上吐蕃攻破之更築於龍駒島有曰龍見因號應龍城翰相其川原宜畜牧謫罪人二千戍之由是吐蕃不敢近青海天寶八載詔翰以朔方河東羣牧兵十萬攻吐蕃石堡城數日未克翰怒摔其將高秀巖張守瑜將斬之秀巖請三日期如期而下遂以赤嶺爲西塞開屯田備軍實加特進賜賚彌渥十一載加開府儀同三司翰素與安祿山安思順不平帝每欲和解之會三人俱來朝帝使驃騎大將軍高力士宴城東翰等皆集詔尙食生擊鹿取血滄腸

爲熱洛河以賜之翰母于闐王女也祿山謂翰曰我父胡母突厥公父突厥母胡族類本同安得不親愛翰曰諺言狐向窟嗥不祥以忘本也兄旣見愛敢不盡心祿山以翰譏其胡怒罵曰突厥敢爾翰欲應之力士目翰翰託醉去久之進封涼國公兼河西節度使攻破吐蕃洪濟大莫門等城收黃河九曲以其地置洮陽郡築神策宛秀二軍進封西平郡王賜音樂田園又賜一子五品官裨將賞拜有差宰相楊國忠惡祿山白發其反狀故厚結翰俄進太子少保翰耆酒極聲色因風痺體不仁旣疾廢遂還京師闔門不朝請十四載祿山反封常清以王師敗帝乃召見翰拜太子先鋒兵馬元帥以田良丘爲軍司馬蕭昕爲判官王思禮鉗耳大福李承光高元蕩蘇法鼎管崇嗣爲屬將火拔歸仁李武定渾萼契苾寧以本部隸麾下凡河隴朔方奴刺等十二部兵二十萬守潼關師始東先驅牙旗觸門墮注旄干折衆惡之天子御勤政樓臨送詔翰以軍行過門毋下百官郊餞旌旗亘二百里翰惶恐數以疾自言帝不聽然病瘼不能事以軍政委良丘使王思禮主騎李承光主步三人爭長政令無所統一衆攜

弛無鬪意明年進拜尙書左僕射同中書門下平章事祿山遣子慶緒攻關翰擊走之始安思順度祿山必反嘗爲帝言得不坐翰既惡祿山又怨思順及是知重兵在己有所論請天子重違因僞爲賊書遺思順者使關邏禽以獻翰因疏七罪請誅之有詔思順及弟元貞皆賜死徙放其家國忠始懼或說翰曰祿山本以誅國忠故稱兵今若留卒三萬守關悉精銳度滻水誅君側此漢挫七國計也思禮亦勸翰翰猶豫未發謀頗露國忠大駭入見帝曰兵法安不忘危大兵在潼關而無後殿萬有一不利京師危矣旣募牧兒三千人日夜訓練以劍南列將分統之又募萬人屯灞上使腹心杜乾運爲帥翰疑圖己表請乾運兵隸節下因詭召乾運計事者至軍卽斬首梟牙門并其軍國忠愈恐謂其子曰吾無死所矣然翰亦不自安又謀久不決數奏言祿山雖竊據河朔不得人心請持重以敵之待其離隙可不血刃而禽賊將崔乾祐守陝郡仆旗鼓羸師以誘戰覘者曰賊無備可圖也帝信之詔翰進討翰報曰祿山習用兵今始爲逆不能無備是陰計誘我賊遠來利在速戰王師堅守毋輕出關計之上也且

四方兵未集宜觀事勢不必速當是時祿山雖盜河洛所過殘殺人人怨之淹時月不能進尺寸地又郭子儀李光弼兵益進取常山十數郡祿山始悔反矣將還幽州以自固而國忠計迫謬說帝趣輸出潼關復陝洛時子儀光弼遙計曰翰病且耄賊素知之諸軍烏合不足戰今賊悉銳兵南破宛洛而以餘衆守幽州吾直搆之覆其巢窟質叛族以招逆徒祿山之首可致若師出潼關變生京師天下殆矣乃極言請翰固關無出軍而帝入國忠之言使使者趣戰項背相望也翰窘不知所出六月引而東慟哭出關次靈寶西原與乾祐戰由關門七十里道險隘其南薄山北阻河賊以數千人先伏險翰浮舟中流以觀軍謂乾祐兵寡易之促士卒進道岨無行列賊乘高頽石下擊殺士甚衆翰與良丘登北阜以軍三萬夾河鳴鼓思禮等以精卒居前餘軍十萬次之乾祐爲陣十五五或卻或進而陌刀五千列陣後王師視其陣無法指觀嗤笑曰禽賊乃會食及戰乾祐旗少偃如欲遜者王師懈不爲備伏忽起薄戰皆奮死鬪翰以氈蒙馬車畫龍虎飾金銀爪目將駭賊掎戈矢逐北賊負薪塞路順風火其車

燦熒熾突騰煙如夜士不復相辨自相鬪殺尸血狼籍久乃悟又棄甲奔山谷
 及陷河死者十一二有糧艘百餘軍爭濟艘輒沈至縛矛盾乘以度喧叫振天
 地賊乘之奔潰略盡始關門有三壑廣二丈深一丈士馬奔蹙相壓追少選壑
 平後至者踐之以入既敗翰引數百騎絕河還營羸兵裁八千至潼津收散卒
 復守關乾祐進攻於是火拔歸仁等給翰出關翰曰何邪曰公以二十萬衆一
 日覆沒持是安歸公不見高仙芝等事乎翰曰吾寧效仙芝死汝舍我歸仁不
 從執以降賊械送洛陽京師震動由是天子西幸祿山見翰責曰汝常易我今
 何如翰俯伏謝罪曰陛下撥亂主今天下未平李光弼在土門來瑱在河南魯
 炁在南陽臣爲陛下以尺書招之三面可平祿山悅卽署司空同中書門下平
 章事執火拔歸仁曰背主忘義吾不爾容斬之翰以書招諸將諸將皆讓翰不
 死節祿山知事不可就囚之東京平安慶緒以翰度河及敗乃殺之翰爲人嚴
 少恩軍行未嘗卹士飢寒有陷民樵者痛笞辱之監軍李大宜在軍中不治事
 與將士攜蒲飲酒彈箜篌琵琶爲樂而士米糲不饜帝令中人袁思藝勞師士

皆訴衣服穿空帝卽斥御服餘者製袍十萬以賜其軍翰藏庫中及敗封鑄如故先是有客梁慎初遺翰書請堅壁勿戰以屈賊翰善之奏爲左武衛曹參軍留幕府及翰與國忠貳慎初曰難將作矣乃遁去翰失守華陰馮翊上洛郡官吏皆潰帝遣劍南將劉光庭等將新募兵萬餘人往助翰未至而翰被縛云其後贈太尉諡曰武愍

子曜字子明八歲玄宗召見華清宮擢尙輦奉御累遷光祿卿以翰陷賊哀憤號慟故吏裴冕杜鴻漸等見之歎息李光弼討河北曜請行拜鴻臚卿爲光弼副降安太清救宋州有功改殿中監襲封爲東都鎮守兵馬使德宗立召爲左龍武大將軍李希烈陷汝州以周冕爲僞刺史詔拜曜東都汝州行營節度使將鳳翔邠寧涇原奉天好時兵萬人討希烈帝召見問曰卿治兵孰與父賢對曰先臣臣安敢比但斬長蛇殪封豕然後待罪私室臣之願也帝曰爾父在開元時朝廷無西憂今朕得卿亦不東慮及行帝祖通化門是日牙于折時以翰出師已如此而斬持旗者卒以敗今曜復爾人憂之曜擊賊收汝州禽冕以獻

斬其將二人希烈退保許州詔城襄城曜以疲人版築不如按甲持重以挫之
帝不許有詔督戰曜進次潁橋雷震軍中七馬斃曜懼還屯襄城希烈遣衆萬
人縱火攻柵殪人于塹以薄壘曜苦戰破之居數月希烈自率兵三萬圍曜築
甬道屬城矢集如兩帝遣神策將劉德信以兵三千援之又詔河南都統李勉
出兵相犄角勉以希烈在外許守兵少乘虛襲之希烈自解乃遣部將與德信
趨許未至有詔切讓使班師德信等惶惑還軍無斥候至扈澗爲賊設伏詭擊
死者殆半器械輜重皆亡德信走汝州勉恐東都危使將李堅華以兵四千往
守賊梗道不得入汴兵沮襄城圍益急帝乃詔普王以荆襄江西鄂沔之師討
蔡州詔涇原節度使姚令言救襄城未行京師亂帝幸奉天襄城陷曜走洛陽
會母喪奪爲東都畿汝節度使遷河南尹曜拙於統御而銳殺戮士畏而不懷
貞元元年部將叛夜焚河南門曜挺身免帝以汴州刺史薛珏代之召入爲鴻
臚卿終右驍衛上將軍贈幽州大都督子七人俱以儒聞峒茂才高第有節概

高仙芝高麗人父舍難初以將軍隸河西軍爲四鎮校將仙芝年二十餘從至安西以父功補游擊將軍數年父子並班仙芝美姿質善騎射父猶以其儒緩憂之初事節度使田仁琬蓋嘉運等不甚知名後事夫蒙靈督乃善遇之開元末表爲安西副都護四鎮都知兵馬使小勃律其王爲吐蕃所誘妻以女故西北二十餘國皆羈屬吐蕃自仁琬以來三討之皆無功天寶六載詔仙芝以步騎一萬出討是時步兵皆有私馬自隨仙芝乃自安西過撥換城入握瑟德經疏勒登蔥嶺涉播密川遂頓特勒滿川行凡百日特勒滿川卽五識匿國也仙芝乃分軍爲三使疏勒趙崇玘自北谷道撥換賈崇瓘自赤佛道仙芝與監軍邊令誠自護蜜俱入約會連雲堡堡有兵千餘城南因山爲柵兵九千守之城下據婆勒川會川漲不得渡仙芝殺牲祭川命士人齋三日糝集水涯士不甚信旣涉旗不霑羈不濡兵已成列仙芝喜告令誠曰嚮吾方涉賊擊我我無類矣今旣濟而陣天以賊賜我也遂登山挑戰日未中破之拔其城斬五千級生擒千人馬千餘匹衣資器甲數萬計仙芝欲遂深入令誠懼不肯行仙芝留羸

弱三千使守遂引師行三日過坦駒嶺嶺峻絕下四十里仙芝恐士憚險不敢進乃潛遣二十騎衣阿弩越胡服來迎先語部校曰阿弩越胡來迎我無慮矣既至士不肯下曰公驅我何去會二十人至曰阿弩越胡來迎已斷娑夷橋矣仙芝卽陽喜令士盡下娑夷河弱水也既行三日越胡來迎明日至阿弩越城遣將軍席元慶以精騎一千先往謂小勃律王曰不闕若城吾假道趨大勃律耳城中大會領皆吐蕃腹心仙芝密令元慶曰若會領逃者第出詔書呼之賜以繒綵至皆縛以待我元慶如言仙芝至悉斬之王及妻逃山穴不可得仙芝招喻乃出降因平其國急遣元慶斷娑夷橋其暮吐蕃至不克度橋長度一箭所及者功一歲乃成八月仙芝以小勃律王及妻自赤佛道還連雲堡與令誠俱班師於是拂菻大食諸胡七十二國皆震攝降附仙芝遣判官王庭芬奏捷京師軍至河西靈訃怒不迎勞既見罵曰高麗奴子闐使爾何從得之仙芝懼且謝曰中丞力也又曰馬耆鎮守使安西副都護都知兵馬使皆何從得之答曰亦中丞力也靈訃曰審若此捷書不待我而敢卽奏何邪奴當斬顧新立功

故貸爾仙芝不知所爲令誠密言狀於朝且曰仙芝立功而以憂死後孰爲朝廷用者帝乃擢仙芝鴻臚卿假御史中丞代靈嘗爲四鎮節度使而詔靈嘗還靈嘗懼仙芝朝夕見輒趨走靈嘗益慚副都護程千里衙將畢思琛行官王滔康懷順陳奉忠等皆嘗譖仙芝於靈嘗者既視事呼千里嫚罵曰公面雖男兒而心似婦女何邪謂琛曰爾奪吾城東千石種田憶之乎對曰公見賜者仙芝曰爾時吾畏汝威豈憐汝而賜邪又召滔欲粹辱良久皆釋曰吾不恨矣由是舉軍安之俄加左金吾衛大將軍與一子五品官九載討石國其王車鼻施約降仙芝爲俘獻闕下斬之由是西域不服其王子走大食乞兵攻仙芝於怛邏斯城以直其寃仙芝爲人貪破石獲瑟瑟十餘斛黃金五六橐駝良馬寶玉甚衆家貲累鉅萬然亦不甚愛惜人有求輒與不問幾何尋除武威太守代安思順爲河西節度使羣胡固留思順更拜右羽林軍大將軍封密雲郡公祿山反榮王爲元帥仙芝副之領飛騎贖騎及朔方等兵出禁財募闕輔士五萬繼封常清東討帝御勤政樓引榮王受命宴仙芝以下帝又幸望春亭勞遣詔監門

將軍邊令誠監軍次陝郡而常清敗還仙芝急乃開太原倉悉以所有賜士卒焚其餘引兵趨潼關會賊至甲仗資糧委於道彌數百里既至關勒兵繕守具士氣稍稍復振賊攻關不得入乃引還初令誠數私於仙芝仙芝不應因言其逗撓狀以激帝且云常清以賊搖衆而仙芝棄陝地數百里腋盜稟賜帝大怒使令誠卽軍中斬之令誠已斬常清陳尸於蘧蔭仙芝自外至令誠以陌刀百人自從曰大夫亦有命仙芝遽下曰我退罪也死不敢辭然以我爲盜頡資糧誣也謂令誠曰上天下地三軍皆在君豈不知又顧麾下曰我募若輩本欲破賊取重賞而賊勢方銳故遷延至此亦以固關也我有罪若輩可言不爾當呼枉軍中咸呼曰枉其聲殷地仙芝視常清尸曰公我所引拔又代吾爲節度今與公同死豈命歟遂就死

封常清蒲州猗氏人外祖教之讀書多所該究然孤貧年過三十未有名夫蒙靈詔爲四鎮節度使以高仙芝爲都知兵馬使嘗出軍奏僉從三十餘人衣襟鮮明常清慨然投牒請豫常清素瘠又脚跛仙芝陋其貌不納明日復至仙芝

謝曰儻已足何庸復來常清怒曰我慕公義願事鞭鞫故無媒自前公何見拒深乎以貌取士恐失之子羽公其念之仙芝猶未納乃日候門下仙芝不得已竄名儻中會達奚諸部叛自黑山西趣碎葉有詔邀擊靈嘗使仙芝以二千騎追躡達奚行遠人馬疲禽馘略盡常清於幕下潛作捷布具記井泉次舍克賊形勢謀略條最明審仙芝取讀之皆意所欲出乃大駭卽用之軍還靈嘗迎勞仙芝已去奴祿帶刀而判官劉眺獨孤峻爭問向捷布誰作者公幕下安得此人答曰吾儻封常清也眺等驚進揖常清坐與語異之遂知名以功授疊州戍主仍爲判官仙芝破小勃律代靈嘗爲安西節度使常清以從戰有勞擢慶王府錄事參軍事爲節度判官仙芝征討常知戎務常清才而果胸無疑事仙芝委家事於郎將鄭德詮其乳母子也威動軍中常清嘗自外還諸將前謁德詮見常清始責易之走馬突常清騶士去常清命左右引德詮至廷中門輒閉因離席曰吾起細微中丞公過聽以主留事郎將安得無禮因叱曰須暫假郎將死以肅吾軍因杖死以面仆地曳出之仙芝妻及乳母哭門外救請不能得遽

以狀白仙芝仙芝驚及見常清憚其公不敢讓常清亦不謝會大將有罪又殺二人軍中莫不股慄仙芝節度河西復請爲判官久之擢安西副大都護安西四鎮節度副大使知節度事未幾改北庭都護持節伊西節度使常清性勤儉耐勞苦出軍乘驛私廐裁二馬賞罰分明天寶末入朝而安祿山反帝引見問何策以討賊常清見帝憂因大言曰天下太平久人不知戰然事有逆順勢有奇變臣請馳至東京悉府庫募驍勇挑馬箠度河計日取逆胡首以獻闕下天子壯之明日以常清爲范陽節度副大使乘驛赴東京常清募兵得六萬人然皆市井庸保乃部分旗幟斷河陽橋以守賊移書平原令太守顏真卿以兵七千防河真卿馳使司兵參軍事李平入奏常清取平表發視卽倚帳作書遺真卿勸堅守且傳購祿山檄數十函與之真卿得以分曉諸郡祿山度河陷滎陽入甕子谷先驅至蔡園常清使驍騎拒之殺拓羯數十百人賊大軍至常清不能禦退入上東門戰不利賊鼓而進劫官吏再戰於都亭驛又不勝引兵守宣仁門復敗乃自提象門出伐大木塞道以殿至穀水西奔陝語高仙芝曰賊銳

甚難與爭鋒潼關無兵一夫奔突則京師危不如急守潼關仙芝從之敗書聞帝削常清官使白衣隸仙芝軍効力仙芝使衣黑衣監左右部軍及邊令誠以詔書至示之常清曰吾所以不死者恐汙國家節度戮賊手今死乃甘心始常清敗徑入關欲見上陳討賊事至渭南有詔赴潼關常清憂懼爲表以謝且言自東京陷三遣使表論成敗不得對又言臣死後望陛下無輕此賊則社稷安至是臨刑以表授令誠而死人多哀之

贊曰祿山哀百鬪驍虜乘天下忘戰主德耄勤故提戈內諫人情崩潰常清乃驅市人數萬以嬰賊鋒一戰不勝卽奪爵土欲入關見天子論成敗事使者三輩上書皆不報回斬于軍仙芝棄陝守關遏賊西勢以喪地被誅玄宗雖爲左右蒙瞽然荒奪其明亦甚矣卒使叛將得藉口執翰以降賊嗚呼非天熟其惡使亂四海舉黔首而殘之邪彼二將奚誅焉

唐書卷一百三十五

唐書卷一百三十五考證

高仙芝傳仙芝遣判官王庭芬奏捷京師○舊書作王庭芳

唐書卷一百三十五考證

唐書卷一百三十六

宋 端 明 殿 學 士 宋 祁 撰

列傳第六十一

李光弼

李光弼營州柳城人父楷洛本契丹酋長武后時入朝累官左羽林大將軍封
薊郡公吐蕃寇河源楷洛率精兵擊走之初行謂人曰賊平吾不歸矣師還卒
于道贈營州都督諡曰忠烈光弼嚴毅沈果有大略幼不嬉弄善騎射起家左
衛親府左郎將累遷左清道率兼安北都護補河西王忠嗣府兵馬使充赤水
軍使忠嗣遇之厚雖宿將莫能比嘗曰它日得我兵者光弼也俄襲父封以破
吐蕃吐谷渾功進雲麾將軍朔方節度使安思順表爲副知留後事愛其材欲
以子妻之光弼引疾去隴右節度使哥舒翰異其操表還長安安祿山反郭子
儀薦其能詔攝御史大夫持節河東節度副大使知節度事兼雲中太守尋加
魏郡太守河北採訪使光弼以朔方兵五千出土門東救常山次真定常山團

結子弟執賊將安思義降自顏杲卿死郡爲戰區露齒蔽野光弼酌而哭之出爲賊幽閉者厚恤其家時賊將史思明李立節蔡希德攻饒陽光弼得思義不殺問其計答曰今軍行疲勞逢敵不可支不如按軍入守料勝而出虜兵焱銳弗能持重圖之萬全光弼曰善據城待明日思明兵二萬傅堞光弼兵不得出乃以勁弩五百射之賊退徙陣稍北光弼出其南夾漈沱而軍思明雖數困然恃近救解鞍休士是日饒陽賊五千至九門光弼謀知之提輕兵斂旗鼓伺賊方飯襲殺之且盡思明懼引去以奇兵斷饒道馬食薦藉光弼命將取芻行唐賊鈔擊之兵負戶戰賊不能奪會郭子儀收雲中詔悉衆出井陘與光弼合擊賊九門西思明大敗挺身走趙郡立節中流矢死希德走鉅鹿收橐城等十縣遂攻趙詔加光弼范陽大都督府長史范陽節度使思明繇鼓城入博陵殺官吏景城河間信都清河平原博平六郡結營自守以附光弼光弼急攻趙一日拔之士多鹵掠光弼坐譙門收所獲悉歸之民城中大悅進圍博陵未下與子儀合擊思明於嘉山大破之光弼以范陽本賊巢窟當先取之堰賊根本會潼

關失守乃拔軍入井陘肅宗卽位詔以兵赴靈武更授戶部尙書同中書門下平章事節度如故光弼以景城河間兵五千入太原前此節度使王承業政弛謬侍御史崔衆主兵太原每侮狎承業光弼素不平及是詔衆以兵付光弼衆素狂易見光弼長揖不卽付兵光弼怒收繫之會使者至拜衆御史中丞光弼曰衆有罪已前繫今但斬侍御史若使者宣詔亦斬中丞使者內詔不敢出乃斬衆以徇威震三軍至德二載思明希德率高秀巖牛廷玠將兵十萬攻光弼時銳兵悉赴朔方而麾下卒不滿萬衆議培城以守光弼曰城環四十里賊至治之徒疲吾人乃徹民屋爲搗石車車二百人挽之石所及輒數十人死賊傷十二思明爲飛樓障以木幔築土山臨城光弼遣穴地頽之思明宴城下倡優居臺上斬指天子光弼遣人隧地禽取之思明大駭徙牙帳遠去軍中皆視地後行又潛溝營地將沈其軍乃陽約降至期以甲士守陣遣裨校出若送款者思明大悅俄而賊數千沒于塹城上鼓譟突騎出乘之俘斬萬計思明畏敗乃去留希德攻太原光弼出敢死士搏賊斬首七萬級希德委資糧遁走初賊至

光弼設公幄城隅以止息經府門不顧圍解閱三昔乃歸私寢收清夷橫野等軍賊別將攻好時破大橫關光弼追敗之加檢校司徒尋遷司空封鄭國公食實戶八百乾元元年入朝詔朝官四品以上郊謁進兼侍中與九節度圍安慶緒於相州大戰鄴西敗之光弼與諸將議思明勒兵魏州欲以怠我不如起軍逼之彼懲嘉山之敗不敢輕出則慶緒可禽觀軍容使魚朝恩固謂不可既而思明來援光弼拒賊戰尤力殺略大當會諸將驚潰各引歸所在剽掠獨光弼整衆還太原帝貸諸將罪以光弼兼幽州大都督府長史知諸道節度行營事又代子儀爲朔方節度使未幾爲天下兵馬副元帥光弼以河東騎五百馳東都夜入其軍且謂賊方闕洛當扼虎牢帥師東出河上檄召兵馬使張用濟用濟憚光弼嚴教諸將逼留其兵用濟單騎入謁光弼斬之以辛京杲代復追都將僕固懷恩懷恩懼先期至會滑汴節度使許叔冀戰不利降賊思明乘勝西嚮光弼敦陣徐行趨東京謂留守韋陟曰賊新勝難與爭鋒欲誅之以計然洛無見糧危偏難守公計安出陟曰益陝兵公保潼關可以持久光弼曰兩軍相

敵尺寸地必爭今委五百里而守關賊得地勢益張不如移軍河陽北阻澤路
勝則出敗則守表裏相應賊不得西此後臂勢也夫辨朝廷之禮我不如公論
軍旅勝負公不如我陟不能答判官韋損曰東都乃帝宅公當守之光弼曰汜
水嶠嶺盡爲賊蹊子能盡守乎遂檄河南縱官吏避賊閉無留人督軍取戰守
備思明至偃師光弼悉軍趨河陽身以五百騎殿賊游騎至石橋諸將曰並城
而北乎當石橋進乎光弼曰當石橋進夜甲士持炬徐引部曲重堅賊不敢逼
已入三城衆二萬軍纔十日糧與卒伍均少棄甘賊憚光弼未敢犯宮闕頓白
馬祠治壑溝築月城以守賊攻光弼與戰中潭西破逆黨斬千級溺死者甚衆
生執五千人初光弼謂李抱玉曰將軍能爲我守南城二日乎抱玉曰過期何
若曰棄之抱玉許諾卽給賊曰吾糧盡明日當降賊喜斂兵待期抱玉已繕完
卽請戰賊忿欺急攻之抱玉出奇兵夾擊俘獲過當賊帥周摯引却光弼自將
治中潭樹壁掘塹擊捨南城攻中潭光弼遣荔非元禮戰羊馬賊大潰擊收兵
復振與安太清合衆三萬攻北城光弼斂軍入登陴望曰彼軍雖銳然方陣而

蹶不足虞也日中當破乃出戰及期未決召諸將曰彼疆而可破者亂也今以亂擊亂宜無功因問賊陣何所最堅曰西北隅召郝廷玉曰爲我以麾下破之曰廷玉所將步卒請騎五百與之三百復問其次曰東南隅召論惟貞辭曰蕃將也不知步戰請鐵騎三百與之二百乃出賜馬四十分給廷玉等光弼執大旗曰望吾旗麾若緩可觀便宜若三麾至地諸軍畢入生死以之退者斬旣而馮堞望廷玉軍不能前趨左右取其首來廷玉曰馬中矢非卻也乃命易佗馬有裨將援矛刺賊洞馬腹中數人又有迎賊不戰而卻者光弼召援矛者賜絹五百匹不戰者斬光弼麾旗三諸軍爭奮賊衆奔敗斬首萬餘級俘八千餘人馬二千軍資器械以億計禽周摯徐瓊玉李秦授惟太清挺身走思明未知猶攻南城光弼驅所俘示之思明大懼築壘以拒官軍始光弼將戰內刀于韉曰戰危事吾位三公不可辱于賊萬有一不捷當自刎以謝天子及是西向拜舞三軍感動太清襲懷州守之上元元年加太尉中書令進圍懷州思明來救光弼再逐北思明見兵河清聲度河絕餉路光弼壁野水度旣夕還軍留牙將雍

希顥守曰賊將高暉李曰越萬人敵也賊必使劫我爾留此賊至勿與戰若降與偕來左右竊怪語無倫是日思明果召曰越曰光弼野次爾以鐵騎五百夜取之不然無歸曰越至壘使人問曰太尉在乎曰去矣兵幾何曰千人將爲誰曰雍希顥曰越謂其下曰我受命云何今顧獲希顥歸不免死遂請降希顥與俱至光弼厚待之表授特進兼右金吾大將軍高暉聞亦降或問公降二將何易也光弼曰思明再敗恨不得野戰聞我野次彼固易之命將來襲必許以死希顥無名不足以爲功曰越懼死不降何待高暉材出曰越之右降者見遇貳者得不思奮乎諸軍決丹水灌懷州未下光弼令廷玉由地道入得其軍號登陴大呼王師乘城禽太清楊希仲送之京師獻俘太廟進食實戶一千五百思明使諜宣言賊將士皆北人謳唸思歸朝恩信然屢上賊可滅狀詔諭光弼光弼固言賊方銳未可輕動僕固懷恩媚光弼功陰佐朝恩陳掃除計使者來督戰光弼不得已令李抱玉守河陽出師次北邙光弼使傅山陣懷恩曰我用騎今迫險非便地請陣諸原光弼曰有險可以勝可以敗陣于原敗斯殲矣且賊

致死于我不如阻險懷恩不從賊據高原以長戟七百壯士執刀隨之委物僞
遁懷恩軍爭剽獲伏兵發官軍大潰懷州復陷光弼度河保聞喜抱玉以兵寡
棄河陽光弼請罪帝以懷恩違令覆軍優詔召光弼入朝懇讓太尉更拜開府
儀同三司中書令河中尹晉絳等州節度使未幾復拜太尉兼侍中河南副元
帥知河南淮南東西山南東荆南五道節度行營事鎮泗州帝爲賦詩以餞朝
義乘邙山之捷進略申光等十三州光弼輿疾就道監軍使以兵少請保揚州
光弼曰朝廷以安危寄我賊安知吾衆寡若出不意當自潰遂疾驅入徐州時
朝義圍李岑於宋州使田神功擊走之初神功平劉展逼留淮南尙衡殷仲卿
相攻兗鄆間來瑱擅襄陽及光弼至屯朝義走神功還河南瑒衡仲卿踵入朝
其爲諸將憚服類此寶應元年進封臨淮郡王光弼收許州斬賊羸千級縛僞
將二十二人朝義分兵攻宋州光弼破走之浙東賊袁晁反台州建元寶勝以
建丑爲正月殘剽州縣光弼遣麾下破其衆於衢州廣德元年遂禽晁浙東平
詔增實封戶二千與一子三品階賜鐵券名藏太廟圖形凌烟閣相州北邙之

敗朝恩羞其策繆故深忌光弼切骨而程元振尤疾之二人用事日謀有以中傷者及來瑱爲元振讒死光弼愈恐吐蕃寇京師代宗詔入援光弼畏禍遷延不敢行及帝幸陝猶倚以爲重數存問其母以解嫌疑帝還長安因拜東都留守察其去就光弼以久須詔書不至歸徐州收租賦爲解帝令郭子儀自河中輦其母還京二年光弼疾篤奉表上前後所賜實封詔不許將吏問後事答曰吾淹軍中不得就養爲不孝子尙何言哉取所餘絹布分遺部將薨年五十七部將卽以其布遂爲光弼行喪號哭相聞帝遣使弔卹其母贈太保證曰武穆詔百官送葬延平門外光弼用兵謀定而後戰能以少覆衆治師訓整天下服其威名軍中指顧諸將不敢仰視初與郭子儀齊名世稱李郭而戰功推爲中興第一其代子儀朔方也營壘士卒麾幟無所更而光弼一號令之氣色乃益精明云子彙有志操廉介自將從賈耽爲裨將奏兼御史大夫元和初分徐州苻離爲宿州光弼有遺愛擢彙爲刺史後遷涇原節度使罷軍中雜徭出奉錢贖將士質賣子還其家卒贈工部尙書光弼弟光進字太應初爲房瑄裨將將

北軍戰陳濤斜兵敗奔行在肅宗宥之代宗卽位拜檢校太子太保封涼國公吐蕃入寇至便橋郭子儀爲副元帥光進及郭英乂佐之自至德後與李輔國並掌禁兵委以心膂光弼被譖出爲渭北邠寧節度使永泰初封武威郡王累遷太子太保卒母李有鬚數十長五寸許封韓國太夫人二子節制皆一品死葬長安南原將相奠祭凡四十四幄時以爲榮光弼所部將李懷光僕固懷恩田神功李抱玉董秦哥舒曜韓游瓌渾釋之辛京杲自有傳若荔非元禮郝廷玉李國臣白孝德張伯儀白元光陳利貞侯仲莊柏良器皆章章可稱列者附次左方

荔非元禮起裨將累兼御史中丞光弼守河陽周摯攻北城光弼方壁中渾摯聞併兵從光弼光弼使元禮守羊馬城植小旗城東北隅望摯軍摯恃衆直逼城以車千乘載木鵝撞車麾兵填塹入道並進光弼諭元禮曰中丞視賊過兵不顧何也報曰公欲守邪戰歟光弼曰戰曰方戰賊爲我實漸復何怪光弼曰吾慮不及此公勉之元禮遂出戰擊軍小卻元禮以敵堅未可以馳還軍示弱

怠其意光弼怒使召元禮欲按軍法答曰方戰不及往請破賊以見因休柵中
良久顧麾下曰向公來召殆欲斬我鬪死有名無庸受戮乃下馬持刀瞋目直
前銳士堵而進左右奮擊一當數人斬賊數百首擊遁去以功累遷驃騎大將
軍懷州刺史知鎮西北庭行營節度使上元二年光弼進收洛陽軍敗元禮徙
軍翼成爲麾下所害

郝廷玉驍勇善格鬪爲光弼愛將及保河陽禽徐璜玉功爲多累封安邊郡王
授神策將軍吐蕃犯京畿與馬璘屯中渭橋宅曰魚朝恩聞其善布陣請觀之
廷玉申號令鳴鼓角部伍坐作進退若一朝恩歎曰吾處兵間久今始識訓練
法廷玉惻然曰此臨淮王遺法也王善御軍賞當功罰適過每校旗不如令者
輒斬由是人皆自効而赴蹈馳突心破膽裂自臨淮歿無復校旗事此安足賞
哉累爲秦州刺史卒贈工部尙書

李國臣河西人李姓安力能挾關以折衝從收魚海五城遷中郎將後爲朔方
將積勞擢雲麾大將軍賜姓李從光弼守河陽累封臨川郡王大曆八年爲鹽

州刺史吐蕃敗渾瑊於黃菩原將略汧隴國臣謂人曰虜乘勝必擾京師我趨秦原彼當反顧乃引兵登安樂山鳴鼓而西日行三十里吐蕃聞之自百里城回軍踰險城因擊敗之卒贈揚州大都督

白孝德安西人事光弼爲偏裨史思明攻河陽使驍將劉龍仙以騎五十挑戰加右足馬鬣上嫚罵光弼光弼登城顧諸將曰孰能取是賊僕固懷恩請行光弼曰是非大將所宜左右以孝德對召問所須幾兵對曰願出五十騎見可而進大軍鼓譟以張吾氣足矣光弼撫其背遣之孝德擁二矛策馬絕河半濟懷恩賀曰事克矣其攬轡便辟可萬全者龍仙見易之不爲動將至若引避然孝德振手止之曰侍中使致辭無它與語久之瞋目曰賊識我乎我白孝德也龍仙罵之乃躍馬前搏城上因大譟五十騎繼進龍仙環隄走追斬其首以還後累功至北庭行營節度使徙邠寧僕固懷恩引吐蕃兵入寇孝德擊敗之永泰初吐蕃回紇圍涇陽郭子儀說回紇約盟吐蕃退走子儀使渾瑊以兵五千出奉天命孝德應之大戰赤沙峯斬獲甚衆累封昌化郡王歷太子少傅建中元

年卒贈太保

張伯儀魏州人以戰功隸光弼軍浙賊袁晁反使伯儀討平之功第一擢睦州刺史後爲江陵節度使樸厚不知書然推誠遇人軍中畏肅民亦便之李希烈反詔與賈耽張獻甫收安州戰不利伯儀中流矢師却失所持節賊追及奮力以禦之兩刃相嚮不得下會救至免至漢水擊野人船以達沔州潰兵至江陵哭於廷伯儀妻勞勉出其家帛給之乃定伯儀收散卒還久之除右龍武統軍卒贈揚州大都督旣請諡博士李吉甫議以中興三十年而兵未戢者將帥養寇藩身也若以亡敗爲戒則總干戈者必圖萬全而不決戰若伯儀雖敗而其忠可錄遂諡曰恭

白元光字元光其先突厥人父道生歷寧朔州刺史元光初隸本軍補節度先鋒安祿山反詔徙朔方兵東討元光領所部結義營長驅從光弼出土門累遷太子詹事封南陽郡王爲兩都遊奕使長安平率兵清宮進擊餘寇身被數創肅宗躬爲傅藥轉衛尉卿兼朔方先鋒史思明攻河陽光弼召主騎軍其後歷

靈武留後定遠城使貞元二年卒贈越州都督

陳利貞幽州范陽人初爲平盧將安祿山亂從光弼軍河南張巡被圍睢陽也光弼遣郝廷玉及利貞救之輕騎出入廷玉稱爲勝己以子妻之及歸薦于光弼自行間累遷檢校太子賓客封靜戎郡王李希烈叛詔哥舒曜東討利貞爲前鋒次刺城賊衆大集利貞出奇兵五百橫擣其右賊鋒詘數月不敢前及希烈攻曜襄城利貞登陴捍守七十日未嘗櫛沐非議事不下城朱泚反利貞及張廷芝所統士皆幽薊河隴人故與廷芝合謀應泚而利貞麾下亦從爲亂夜半難作利貞拔劍當軍門大譁曰欲過門者先殺我衆畏其鋒乃止廷芝出奔德宗嘉之擢汝州防禦使貞元五年疽發首卒遺觀察使崔縱書自陳受國恩恨不得死所云

侯仲莊字仲莊蔚州人爲光弼先鋒授忠武將軍禽安太清有功累加冠軍將軍僕固懷恩以朔方反仲莊爲都將訓兵自守號爲平射人畏其鋒懷恩敗郭子儀代之引爲腹心封上谷郡王爲神策京西將德宗幸奉天遷左衛將軍爲

防城使修壘堞晝夜執戈徼巡從幸與元殿軍駱谷授防禦招收使帝還都復幸奉天幾二十年卒贈洪州都督

柏良器字公亮魏州人父造以獲嘉令死安祿山難乃學擊劍欲報賊父友王奐爲光弼從事見之曰爾額文似臨淮王面黑子似顏平原始能立功乃薦之光弼授兵平山越遷左武衛中郎將以部民隸浙西豫平袁晁方清其後潘獐虎胡參分據小傷蒸里又擊破之是時年二十四更戰陣六十二李希烈圍寧陵遏水灌之親令軍中明日拔城良器以救兵至擇弩手善游者沿汴渠夜久及旦伏弩發賊乘城者皆死錄功封平原郡王入爲左神策軍大將軍知軍事圖形凌煙閣募材勇以代士卒市販者中尉竇文場惡之坐友人闖入換右領軍衛自是軍政皆中官專之終左領軍衛大將軍贈陝州大都督子耆別傳烏承玘字德潤張掖人開元中與族兄承恩皆爲平盧先鋒沈勇而決號轅門二龍契丹可突于殺其王邵固降突厥而奚亦亂其王魯蘇挈族屬及邵固妻子自歸是歲奚契丹入寇詔承玘擊之破於捺祿山二十二年詔信安王禕率

幽州長史趙含章進討承玳請含章曰二虜固劇賊前日戰而北非畏我乃誘我也公宜奮銳以折其謀含章不信戰白城果大敗承玳獨按隊出其右斬首萬計可突于奔北奚渤海大武藝與弟門藝戰國中門藝來詔與太僕卿金思蘭發范陽新羅兵十萬討之無功武藝遣客刺門藝於東都引兵至馬都山屠城邑承玳窒要路暫以大石亘四百里虜不得入於是流民得還士少休脫鎧而耕歲省度支運錢安慶緒使史思明守范陽思明恃兵彊爲自固計慶緒密遣阿史那承慶安守忠就督事且圖之承玳勸思明曰唐家中興與天下更始慶緒偷肆晷刻公殆與俱亡有如東身本朝前洗前汗此反掌功耳思明善之斬承慶等奉表聽命始承恩爲冀州刺史失守思明護逆東都故肅宗使自雲中趨幽州開說思明與承玳謀投覺殺之不克死承玳奔李光弼表爲冠軍將軍封昌化郡王爲石嶺軍使王恩禮爲節度使軍政倚辦焉久之移疾還京師卒年九十六子重胤別傳

贊曰李光弼生戎虜之緒沈鷲有守遭祿山變拔任兵柄其策敵制勝不世出

賞信罰明士卒爭奮毅然有古良將風本夫終父喪不入妻室位王公事繼母至孝好讀班固漢書異夫庸人武夫者及困於口舌不能以忠自明奄侍內構遂陷嫌隙謀就全安而身益危所謂工於料人而拙於謀己邪方攘袂徇國天下風靡一爲遷延而田神功等皆不受約束卒以憂死功臣去就可不慎邪嗚呼光弼雖有不釋位之誅然讒人爲害亦可畏矣將時之不幸歟

唐書卷一百三十六

唐書卷一百三十六考證

李光弼傳封薊郡公○舊書作薊國公

生執五千人○舊書作生擒五百人

請鐵騎三百與之二百○舊書作與之百

禽太清楊希仲送之京師○舊書作楊希文

光弼入朝懇讓太尉更拜開府儀同三司中書令○舊書作遂加開府儀同三司侍中

唐書卷一百三十六考證

唐書卷一百三十七

宋 端 明 殿 學 士 宋 祁 撰

列傳第六十二

郭子儀

郭子儀字子儀華州鄭人長七尺二寸以武舉異等補左衛長史累遷單于副都護振遠軍使天寶八載木刺山始築橫塞軍及安北都護府詔卽軍爲使俄苦地偏不可耕徙築永清號天德軍又以使兼九原太守十四載安祿山反詔子儀爲衛尉卿靈武郡太守充朔方節度使率本軍東討子儀收靜邊軍斬賊將周萬頃擊高秀巖河曲敗之遂收雲中馬邑開東陁加御史大夫賊陷常山河北郡縣皆沒會李光弼攻賊常山拔之子儀引軍下井陘與光弼合破賊史思明衆數萬平臺城南攻趙郡禽賊四千縱之斬僞守郭獻璆還常山思明以衆數萬尾軍及行唐子儀選騎五百更出挑之三日賊引去乘之又破於沙河遂趨常陽以守祿山益出精兵佐思明子儀曰彼恃加兵必易我易我心不固

戰則克矣與戰未決戮一部將以徇士殊死鬪遂破之斬首二千級俘五百人獲馬如之於是晝揚兵夜擣壘賊不得息氣益老乃與光弼僕固懷恩渾釋之陳回光等擊賊嘉山斬首四萬級獲人馬萬計思明跳奔博陵於是河北諸郡往往斬賊守迎王師方北圖范陽會哥舒翰敗天子入蜀太子卽位靈武詔班師子儀與光弼率步騎五萬赴行在時朝廷草昧衆寡軍容闕然及是國威大振拜子儀兵部尙書同中書門下平章事仍總節度肅宗大閱六軍鼓而南至彭原宰相房琯自請討賊次陳濤師敗衆略盡故帝唯倚朔方軍爲根本賊將阿史那從禮以同羅僕骨騎五千誘河曲九府六胡州部落數萬迫行在子儀以回紇首領葛邏支擊之執獲數萬牛羊不可勝計河曲平至德二載攻賊崔乾祐於潼關乾祐敗退保蒲津會永樂尉趙復河東司戶參軍韓旻司士徐景及宗室子鋒在城中謀爲內應子儀攻蒲復等斬陴者披闔內軍乾祐走安邑安邑僞納之兵半入縣門發乾祐得脫身走賊安守忠壁永豐倉子儀遣子旰與戰多殺至萬級旰死于陳進收倉於是關陝始通詔還鳳翔進司空充關

內河東副元帥率師趨長安次潏水上賊守忠等軍清渠左大戰王師不利委仗奔子儀收潰卒保武功待罪于朝乃授尚書左僕射俄從元帥廣平王率蕃漢兵十五萬收長安李嗣業爲前軍元帥爲中軍子儀副之王思禮爲後軍陣香積寺之北距澧水臨大川彌亙一舍賊李歸仁領勁騎薄戰官軍驚嗣業以長刀突出斬賊數千騎乃定回紇以奇兵繚賊背夾攻之斬首六萬級生禽二萬賊帥張通儒夜亡陝郡翼日王入京師老幼夾道呼曰不圖今日復見官軍王休士三日遂東安慶緒聞王師至遣嚴莊悉衆十萬屯陝助通儒旌幟鉦鼓徑百餘里師至新店賊已陣出輕騎子儀遣二隊逐之又至倍以往皆不及賊營輒反最後賊以二百騎掩軍未戰走子儀悉軍追橫貫其營賊張兩翼包之官軍却嗣業率回紇從後擊塵且盃飛矢射賊賊驚曰回紇至矣遂大敗僵尸相屬于道嚴莊等走洛陽挾慶緒度河保相州遂收東都於是河東河西河南州縣悉平以功加司徒封代國公食邑千戶入朝帝遣具軍容迎灞上勞之曰國家再造卿力也子儀頓首陳謝有詔還東都經略北討乾元元年破賊河上

執安守忠以獻遂朝京師詔百官迎於長樂驛帝御望春樓待之進中書令帝
卽詔大舉九節度師討慶緒以子儀光弼皆元功難相臨攝第用魚朝恩爲觀
軍容宣慰使而不立帥子儀自杏園濟河圍衛州慶緒分其衆爲三軍將戰子
儀選善射三千士伏壁內誠曰須吾却賊必乘壘若等譟而射旣戰僞遁賊薄
營伏發注射如雨賊震駭王師整而奮斬首四萬級獲鎧冑數十萬執安慶和
收衛州又戰愁思岡破之連營進圍相州引漳水灌城漫二時不能破城中糧
盡人相食慶緒求救於史思明思明自魏來李光弼王思禮許叔冀魯炁前軍
遇之戰鄴南夷負相當炁中流矢子儀督後軍未及戰會大風拔木遂晦跬步
不能相物色於是王師南潰賊亦走輜械滿野諸節度引還子儀以朔方軍保
河陽斷航橋時王師衆而無統進退相顧望責功不專是以及于敗有詔留守
東都俄改東畿山南東道河南諸道行營元帥魚朝恩素疾其功因是媒譖之
故帝召子儀還更以趙王爲天下兵馬元帥李光弼副之代子儀領朔方兵子
儀雖失軍無少望乃心朝廷思明再陷河洛西戎逼擾京輔天子旰食乃授邠

寧鄜坊兩節度使仍留京師議者謂子儀有社稷功而擊寇首鼠乃置散地非所宜帝亦悟上元初詔爲諸道兵馬都統以管崇嗣副之率英武威遠兵及河西河東鎮兵繇邠寧朔方大同橫野軍以趨范陽詔下爲朝恩沮解明年光弼敗邙山失河陽又明年河中亂殺李國貞太原戕鄧景山朝廷憂二軍與賊合而少年新將望輕不可用遂以子儀爲朔方河中北廷潞儀澤沁等州節度行營兼興平定國副元帥進封汾陽郡王屯絳州時帝已不豫羣臣莫有見者子儀請曰老臣受命將死于外不見陛下目不瞑帝引至臥內謂曰河東事一以委卿子儀嗚咽流涕賜御馬銀器雜綵別賜絹布九萬子儀至屯誅首惡王元振等數十人太原辛雲京亦治害景山者諸鎮皆惕息代宗立程元振自謂於帝有功忌宿將難制離構百計因罷子儀副元帥加實戶七百爲肅宗山陵使子儀懼讒且成盡哀肅宗所賜詔敕千餘篇上之因自明詔曰朕不德詒大臣憂朕甚自愧自今公毋有疑初帝與子儀平兩京同天下憂患至是悔悟眷禮彌重時史朝義尙盜洛帝欲使副雍王率師東討爲朝恩元振交訾之乃止會

梁崇義據襄州叛僕固懷恩屯汾州陰召回紇吐蕃寇河西殘涇州犯奉天武功遽拜子儀爲關內副元帥鎮咸陽初子儀自相州罷歸京師部曲離散遽承詔麾下才數十騎驅民馬補行隊至咸陽虜已過渭水並南山而東天子跳幸陝子儀聞流涕董行營還京師遇射生將王獻忠以毅騎叛劫諸王欲奔虜子儀讓之取諸王送行在乃率騎南收兵得武關防卒及亡士數千軍寢完會六軍將張知節迎子儀洛南大閱兵屯商州威震關中乃遣知節率烏崇福羽林將長孫全緒爲前鋒營韓公堆擊鼓譟山張旗幟夜叢萬炬以疑賊初光祿卿殷仲卿募兵藍田以勁騎先官軍爲游弈直度澠民給虜曰郭令公來虜懼會故將軍王甫結俠少夜鼓朱雀街呼曰王師至吐蕃夜潰於是遣大將李忠義屯苑中渭北節度使王仲昇守朝堂子儀以中軍繼之射生將王撫自署京兆尹亂京城子儀斬以徇破賊書聞帝以子儀爲京城留守自變生倉卒賴子儀復安故天下皆咎程元振羣臣數論奏元振懼乃說帝都洛陽帝可其計子儀奏曰雍州古稱天府右隴蜀左嶠函襟馮終南太華之險背負清渭濁河之固

地方數千里帶甲十餘萬兵彊士勇真用武之國秦漢所以成帝業也後或處而秦去而亡者不一姓故高祖先入關定天下太宗以來居洛陽者亦鮮先帝與朔方誅慶緒陛下席西土戮朝義雖天道助順亦地勢則然比吐蕃馮陵而不能抗者臣能言其略夫六軍皆市井人竄虛名逃實賦一日驅以就戰有百奔無一前又宦豎掩迷庶政荒奪遂令陛下彷徨暴露越在陝服斯委任失人豈秦地非良哉今道路流言不識信否咸謂且都洛陽洛陽自大盜以來焚埃略盡百曹榛荒寰服不滿千戶井邑如墟豺狼羣嗥東薄鄭汴南界徐北綿懷衛及相千里蕭條亭舍不煙何以奉萬乘牲餼供百官次舍哉且地狹隄裁數百里險不足防適爲鬪場陛下意者不以京畿新罹剽蹂國用不足乎昔衛爲狄滅文公廬于漕衣大布之衣冠大帛之冠卒復舊邦況赫赫天子躬儉節用寧爲一諸侯下哉臣願陛下斥素餐去冗食抑閹寺任直臣薄征弛役卹隱撫鰥委宰相以簡賢任能付臣以訓兵禦侮則中興之功日月可冀惟時邁亟還見宗廟謁園陵再造王家以幸天下帝得奏泣謂左右曰子儀固社稷臣也朕

西決矣乘輿還子儀頓首謝罪帝勞曰用卿晚故至此乃賜鐵券圖形凌煙閣
僕固懷恩縱兵掠并汾屬縣帝患之以子儀兼河東副元帥河中節度使鎮河
中懷恩子瑒屯榆次爲帳下張惟岳所殺傳首京師持其衆歸子儀懷恩懼委
其母走靈州廣德二年進太尉兼領北道邠寧涇原河西通和吐蕃及朔方招
撫觀察使辭太尉不拜懷恩誘吐蕃回紇党項數十萬入寇朝廷大恐詔子儀
屯奉天帝問計所出對曰無能爲也懷恩本臣偏將雖慄果然素失士心今能
爲亂者誅思歸之人劫與俱來且皆臣故部曲素以恩信結之彼忍以刃相向
乎帝曰善虜寇邠州先驅至奉天諸將請擊之子儀曰客深入利速戰彼下素
德我吾緩之當自攜貳因下令敢言戰者斬堅壁待之賊果遁子儀至自涇陽
恩賚崇縟進拜尙書令懇辭不聽詔趣詣省視事百官往慶敕射生五百騎執
戟寵衛子儀確讓且言太宗嘗踐此官故累聖曠不置員皇太子爲雍王定關
東乃得授渠可猥私老臣墮大典且用兵已來僭賞者多至身兼數官冒進亡
恥今凶醜略平乃作法審官之時宜從老臣始帝不獲已許之具所以讓付史

官因賜美人六人從者自副車服帷帟咸具永泰元年詔都統河南道節度行營復鎮河中懷恩盡說吐蕃回紇党項羌渾奴刺等三十萬掠涇邠躡鳳翔入醴泉奉天京師大震於是帝命李忠臣屯渭橋李光進屯雲陽馬璘郝廷玉屯便橋駱奉先李日越屯盤屋李抱玉屯鳳翔周智光屯同州杜窳屯坊州天子自將屯苑中急召子儀屯涇陽軍纔萬人比到虜騎圍已合乃使李國臣高昇魏楚玉陳回光朱元琮各當一面身自率鎧騎二千出入陣中回紇怪問是誰報曰郭令公驚曰令公存乎懷恩言天可汗棄天下下令公卽世中國無主故我從以來公今存天可汗存乎報曰天子萬壽回紇悟曰彼欺我乎子儀使諭虜曰昔回紇涉萬里戡大憝助復二京我與若等休戚同之今乃棄舊好助叛臣一何愚彼背主棄親於回紇何有回紇曰本謂公云亡不然何以至此今誠存我得見乎子儀將出左右諫戎狄野心不可信子儀曰虜衆數十倍今力不敵吾將示以至誠左右請以騎五百從又不聽卽傳呼曰令公來虜皆持滿待子儀以數十騎出免胄見其大會曰諸君同艱難久矣何忽亡忠誼而至是邪

回紇捨兵下馬拜曰果吾父也子儀即召與飲遺錦綵結歡誓好如初因曰吐蕃本吾舅甥國無負而來棄親也馬牛被數百里公等若倒戈乘之若俛取一芥是謂天賜不可失且逐戎得利與我繼好不兩善乎會懷恩暴死羣虜無所統一遂許諾吐蕃疑之夜引去子儀遣將白元光合回紇衆追躡大軍繼之破吐蕃十萬於靈臺西原斬級五萬俘萬人盡得所掠士女牛羊馬橐駝不勝計遂自涇陽來朝加實封二百戶還河中大曆元年華州節度使周智光謀叛帝間道以蠟書賜子儀令悉軍討之同華將吏聞軍起殺智光傳首闕下二年吐蕃寇涇州詔遺屯涇陽邀戰於靈州敗之斬首二萬級明年還河中吐蕃復寇靈武詔率師五萬屯奉天白元光破虜於靈武議者以吐蕃數爲盜馬璘孤軍在邠不能支乃以子儀兼邠寧慶節度使屯邠州徙璘爲涇原節度使回紇赤心請市馬萬匹有司以財乏止市千匹子儀曰回紇有大功宜答其意中原須馬臣請內一歲奉佐馬直詔不聽人許其忠九年入朝對延英帝與語吐蕃方疆慷慨至流涕退上書曰朔方國北門西禦犬戎北虞獫狁五城相去三千里

開元天寶中戰士十萬馬三萬匹僅支一隅自先帝受命靈武戰士從陛下征討無寧歲頃以懷恩亂瘼傷彫耗亡三分之二比天寶中止十之一今吐蕃兼吞河隴雜羌渾之衆歲深入畿郊勢踰十倍與之角勝豈易得邪屬者虜來稱四節度將別萬人人兼數馬臣所統士不當賊四之一馬不當賊百之二外畏內懼將何以安臣惟陛下制勝力非不足但簡練不至進退未一時淹師老地廣勢分願於諸道料精卒滿五萬者列屯北邊則制勝可必竊惟河南河北江淮大鎮數萬小者數千殫屈稟給未始蒐擇臣請追赴關中勒步隊示金鼓則攻必破守必全長久之策也又自陳衰老乞骸骨詔曰朕終始倚賴未可以去位不許德宗嗣位詔還朝攝冢宰充山陵使賜號尙父進位太尉中書令增實封通前二千戶給糧千五百人芻馬二百疋盡罷所領使及帥建中二年疾病帝遣舒王到第傳詔省問子儀不能興叩頭謝恩薨年八十五帝悼痛廢朝五日詔羣臣往弔隨喪所須皆取于官贈太師陪葬建陵及葬帝御安福門哭過其喪百官陪位流涕賜諡曰忠武配饗代宗廟廷著令一品墳崇丈八尺詔特

增丈以表元功子儀事上誠御下恕賞罰必信遭幸臣程元振魚朝恩短毀方時多虞握兵處外然詔至卽日就道無纖介顧望故讒間不行破吐蕃靈州而朝恩使人發其父墓盜未得子儀自涇陽來朝中外懼有變及入見帝唁之卽號泣曰臣久主兵不能禁士殘人之墓人今發先臣墓此天譴非人患也朝恩又嘗約子儀脩具元載使人告以軍容將不利公其下衷甲願從子儀不聽但以家僮十數往朝恩曰何車騎之寡告以所聞朝恩泣曰非公長者得無致疑乎田承嗣傲狠不軌子儀嘗遣使至魏承嗣西望拜指其膝謂使者曰茲膝不屈於人久矣今爲公拜李靈耀據汴州公私財賦一皆遏絕子儀封幣道其境莫敢留令持兵衛送麾下宿將數十皆王侯貴重子儀頤指進退若部曲然幕府六十餘人後皆爲將相顯官其取士得才類如此與李光弼齊名而寬厚得人過之子儀歲入官俸無慮二十四萬緡宅居親仁里四分之一中通永巷家人三千相出入不知其居前後賜良田美器名園甲館不勝紀代宗不名呼爲大臣以身爲天下安危者二十年校中書令考二十四八子七壻皆貴顯朝廷

諸孫數十不能盡識至問安但頷之而已富貴壽考哀榮終始人臣之道無闕焉子曜盱眙眙暗曖曙映而四子以才顯

曜性沈靜資貌瑰傑累從節度府辟署破虜有功爲開陽府果毅都尉至德初推子儀功授衛尉卿累進太子詹事太原郡公子儀專征伐曜留治家事少長無間言諸弟或飾池館盛車服曜獨以朴簡自處子儀罷兵遷太子少保昆弟六人共制拜官子儀薨以遺命簿上四朝所賜名馬珍物德宗復賜之乃悉散諸弟居喪以禮疾甚或勸茹葱薤終不屬口後盧杞秉政忌勳族子儀壻太僕卿趙縱少府少監李洞清光祿卿王宰皆以次得罪姦人幸其危多論奪田宅奴婢曜大恐獨宰相張鑑力保護德宗稍聞之詔有司曰尙父子儀有大勳力保又王家嘗誓山河琢金石許宥十世前日其家市田宅奴婢而無賴者以尙父歿妄論奪之自今有司毋得受建中三年卒贈太子太傅諡曰孝初曜襲代國公食二千戶貞元初詔減半以封晞曖映曙人二百五十戶未幾復詔四人各減五十戶封曜子鋒晤子鐸各百戶云

晞善騎射從征伐有功復兩京戰最力出奇兵破賊累進鴻臚卿河中軍亂子儀召首惡誅之其支黨猶反仄晞選親兵晝夜警以備非常姦人不得發以功拜殿中監吐蕃回紇入寇加御史中丞領朔方軍援邠州與馬璘合軍擊虜破之虜復來陣涇水北子儀遣晞率徒兵五千騎五百襲虜晞以兵寡不進須暮賊半濟乃擊斬首五千級加御史大夫子儀固讓乃止居父喪值朱泚亂南走山谷賊昇致之欲汙以官佯瘖不答賊露兵脅之不動數以城中事貽書李晟旣而奔奉天天子還改太子賓客子綱從朔方杜希全幕府希全檄爲豐州刺史晞憐其弱不任事丐罷德宗遣使者召綱綱疑得罪挺身走吐蕃不納希全執送京師賜死晞坐免尋復太子賓客累封趙國公卒贈兵部尙書孫承嘏承嘏字復卿幼秀異通五經元和中及進士第累遷起居舍人居母喪以孝聞太和六年爲諫議大夫言政事得失文宗以鄭注爲太僕卿承嘏極論其非注頗懼進給事中俄出爲華州刺史給事中盧載還詔書且言承嘏數封駁稱職宜在禁闈帝曰朕謂久次欲優其稍入耳乃復留給事中時江淮旱用度不支

詔宰相分領度支戶部承嘏言宰相調和陰陽安黎庶若使閱視簿書校緝帛非所宜帝順納遷刑部侍郎帝嘗稱其儒素無貴驕氣不類勳家每進對恩接備厚方大任用會卒家無餘貲親友爲辦喪祭贈吏部尚書

暖字暖以太常主簿尚昇平公主暖年與公主侔十餘歲許昏拜駙馬都尉試殿中監封清源縣侯寵冠戚里大曆末檢校左散騎常侍建中時主坐事留禁中朱泚亂逼署暖官辭以居喪被疾旣而與公主奔奉天德宗嘉之釋主罪進暖金紫光祿大夫賜實封五千戶尋遷太常卿貞元三年襲代國公卒年四十八贈尚書左僕射初暖女爲廣陵郡王妃王卽位是爲憲宗妃生穆宗穆宗立尊妃爲皇太后贈暖太傅四子鑄釗鏐銛鑄鑄封

釗長七尺方口豐下代宗朝以外孫爲奉禮郎累官至左金吾大將軍改檢校工部尚書爲邠寧節度使入爲司農卿憲宗寢疾宦豎或妄議廢立者穆宗問計於釗答曰殿下爲太子當旦夕視膳何外慮乎時稱得元舅體穆宗卽位檢校戶部尚書兼司農卿俄爲河陽三城節度使徙河中尹領進絳慈隰節度敬

宗立召拜兵部尚書又帥劍南東川太和中南蠻寇蜀取成都外郭杜元穎不能禦詔釗兼領西川節度未行蠻衆已略梓州州兵寡不可用釗貽書譙蠻首蓋巔以侵叛意蓋巔曰元穎不自守數侵吾圍我以是報乃與釗脩好約無相犯天子嘉之卽拜西川節度使以疾請代爲太常卿卒贈司徒子仲文仲恭仲詞開成二年詔仲文襲太原郡公給事中盧弘宣奏釗妻沈公主女代宗皇帝外孫其子仲詞尚饒陽公主仲文冒嫡不應襲使仲文承嫡則沈當黜且仲詞亦不得尚主乃詔仲詞檢校殿中少監駙馬都尉襲封而仲文以太皇太后故置不問仲恭歷詹事府丞亦尚金堂公主

縱字利用尚德陽郡主詔裴延齡爲主營第長興里順宗立主進封漢陽公主擢縱檢校國子祭酒駙馬都尉自景龍後外戚多爲檢校官不治事宰相薦其才不當以外戚廢乃拜右金吾將軍封太原郡公恭遜折節不以富貴加人性周畏不立赫赫名有諫於上退必毀稿家人子弟無知者別墅在都南尤勝塏穆宗嘗幸之置酒極歡改太子詹事充閑廡宮苑使卒贈尚書左僕射

銛性和易累爲殿中監尙西河公主鏃卒代爲太子詹事宮苑閑廐使長慶三年暴卒太后遣使按問發疾狀久乃解初西河主降沈氏生一子銛無嗣以沈氏子嗣

曙代宗朝累官司農卿德宗幸奉天曙方領家兵獵苑北聞蹕至伏謁道左遂從乘輿入駱谷霖雨塗潦衛兵或異語帝召謂曰朕不德而苦公等宜執朕送朱泚以謝天下諸將皆感泣曰願死生從陛下時曙與功臣子李昇韋清令狐建李彥輔被甲請見言曰南行路險且虞姦變臣等世蒙恩今相誓願更挾帝馬許之帝還曙清擢金吾大將軍餘並爲禁軍將軍曙終祁國公子儀母弟幼明性謹愿無過拙于武喜賓客以子儀故終少府監贈太子太傅子昕肅宗末爲四鎮留後關隴陷不得歸朝廷但命官遙領其使建中二年昕始與伊西北廷節度使曹令忠遣使入朝德宗詔曰四鎮二廷統西夏五十七蕃十姓部落國朝以來相與率職自關隴失守王命阻絕忠義之徒泣血固守奉遵朝法此皆侯伯守將交修共治之効朕甚嘉之令忠可北廷大都護四鎮節度留後賜

氏李更各元忠昕可安西大都護四鎮節度使諸將吏超七資敘官云

贊曰天寶末盜發幽陵外阻內訌子儀自朔方提孤軍轉戰逐北誼不還顧當是時天子西走唐祚若贅旃而能輔太子再造王室及大難略平遭讒巷詭奪兵柄然朝聞命夕引道無纖介自嫌及被圍涇陽單騎見虜獸以至誠猜忍沮謀雖唐命方永亦由忠貫日月神明扶持者哉及光弼等畏偪不終而子儀完名高節爛然獨著福祿永終雖齊桓晉文比之爲福唐史臣裴垪稱權傾天下而朝不忌功蓋一世而上不疑侈窮人欲而議者不之貶嗚呼垪誠知言其子孫多以功名顯蓋盛德後云

唐書卷一百三十七

唐書卷一百三十七考證

郭子儀孫鏐擢鏐檢校國子祭酒駙馬都尉○舊書累官至衛尉卿駙馬都尉
改殿中監

唐書卷一百三十七考證

唐書卷一百三十八

宋 端 明 殿 學 士 宋 祁 撰

列傳第六十三

二李馬路

李嗣業字嗣業京兆高陵人長七尺膂力絕衆開元中從安西都護來曜討十姓蘇祿先登捕虜累功署昭武校尉後應募安西軍中初用陌刀而嗣業尤善每戰必爲先鋒所嚮摧北馬靈督爲節度出戰必與俱高仙芝討勃律署嗣業及中郎將田珍爲左右陌刀將時吐蕃兵十萬屯娑勒城據山瀕水聯木作郭以扼王師仙芝潛軍夜濟信圖河令曰及午破賊不者皆死嗣業提步士升山頽石四面以擊賊又樹大旗先走險諸將從之虜不虞軍至因大潰投崖谷死者十八鼓而驅至勃律禽其主平之授右威衛將軍從平石國及突騎施以跳盪先鋒加特進虜號爲神通大將初仙芝特以計襲取石其子出犇因構諸胡共怨之以告大食連兵攻四鎮仙芝率兵二萬深入爲大食所敗殘卒數千事

急嗣業謀曰將軍深履賊境後援既絕而大食乘勝諸胡銳于鬪我與將軍俱前死尙誰報朝廷者不如守白石嶺以爲後計仙芝曰吾方收合餘燼明日復戰嗣業曰事去矣不可坐須葶醢卽馳守白石路既隘步騎魚貫而前會拔汗那還兵輜餉塞道不可騁嗣業懼追及手挺鑿擊人馬斃仆者數十百虜駭走仙芝乃得還表嗣業功進右金吾大將軍留爲疏勒鎮使城一隅陲屢築輒壞嗣業祝之有白龍見因其處蒞祠以祭城遂不壞漢耿恭故井久涸禱已泉復出初討勃律也通道葱嶺有大石塞隘以足蹶之抵穹壑識者以爲至誠所感云天寶十二載加驃騎大將軍入朝賜酒帝前醉起舞帝寵之賜綵百金五五十物錢十萬曰爲解醒具安祿山反肅宗追之詔至卽引道與諸將割臂盟曰所過郡縣秋毫不可犯至鳳翔上謁帝喜曰今日卿至賢於數萬衆事之濟否固在卿輩乃詔與郭子儀僕固懷恩犄角常爲先鋒以巨梃笞鬪賊值類崩潰進四鎮伊西北庭行軍兵馬使廣平王收長安嗣業統前軍陣于香積祠北賊酋李歸仁擁精騎薄戰王師注矢逐之走未及營賊大出掩追騎還蹂王師於

是亂不能陣嗣業謂子儀曰今日不蹈萬死取一生則軍無類矣卽袒持長刀大呼出陣前殺數十人陣復整步卒三千以陌刀長柯斧堵進所向無前歸仁匿兵營左胡軍勢王分回紇銳兵擊其伏嗣業出賊背合攻之自日中至晨斬首六萬級填澗壑死幾半賊東走遂平長安進收東都嗣業戰多乃與張鎬魯炁來瑱嗣吳王祇李奐略定諸州兼衛尉卿封魏國公實封戶二百兼懷州刺史北庭行營節度使與子儀等圍相州師耄諸將無功獨嗣業被堅數奮爲諸軍冠中流矢臥帳中方愈忽聞金鼓聲知與賊戰大呼創潰血流數升卒諡曰忠勇贈武威郡王給靈輿護還在所葬日使中人臨弔中朝臣祖泣塋給掃除十戶嗣業忠毅憂國不計居產有宛馬十疋前後賞賜皆上于官以助軍云子佐國襲爵歷丹王府長史卒推嗣業功贈宋州刺史

馬璘岐州扶風人少孤流蕩無業所年二十讀漢馬援傳至丈夫當死邊野以馬革裹尸而歸慨然曰使吾祖勳業墜于地乎開元末挾策從安西節度府以奇勞累遷金吾衛將軍至德初王室多難統精甲三千自二庭赴鳳翔肅宗奇

之委以東討初戰衛南以百騎破賊五千衆從李光弼攻洛陽史朝義衆十萬陣北邙山旗鎧照日諸將宥疑未敢擊璘率部士五百薄賊屯出入三反衆披靡乘之賊遂潰光弼曰吾用兵三十年未見以少擊衆雄捷如馬將軍者遷試太常卿明年吐蕃寇邊詔璘移軍援河西懷恩之叛璘引還間關轉鬪至鳳翔虜圍已合節度使孫志直嬰城守璘令士持滿外向突入縣門不解甲出戰背城陣虜潰率輕騎追之斬數千級漂血丹渠帝引見慰勞擢兼御史大夫永泰初拜四鎮行營節度南道和蕃使俄檢校工部尙書北庭行營鄆寧節度使元日有卒犯盜或曰宜赦璘曰赦之則人將伺其日爲盜遂戮之天大旱里巷爲土龍聚巫以禱璘曰旱由政不脩卽命撤之明日雨是歲大穰未幾徙涇原權知鳳翔隴右節度副使四鎮北庭如舊復以鄭穎二州隸之大曆八年吐蕃內寇渾瑊戰宜祿不利璘設伏潘原與瑊合擊破之俘級數萬進檢校尙書右僕射明年入朝求宰相以檢校左僕射知省事進扶風郡王十一年卒於軍年五十六贈司徒諡曰武璘少學術而武幹絕倫遭時屯棘以忠力奮在涇八年繕

屯壁爲戰守具令肅不殘人樂爲用虜不敢犯爲中興銳將初涇軍乏財帝諷李抱玉讓鄭穎璘因得裒積且前後賜賚無算家富不貲治第京師侈甚其寢堂無慮費錢二十萬緡方璘在軍守者覆以油幔及喪歸都人爭入觀假稱故吏入赴弔者日數百德宗在東宮聞之不喜及卽位乃禁第舍不得踰制詔毀璘中寢及宦人劉忠翼第璘家懼悉籍亭館入之官其後賜羣臣宴多在璘山池而子無行財亦尋盡

李抱玉本安興貴曾孫世居河西善養馬始名重璋閑騎射少從軍其爲人沈毅有謀尤忠謹李光弼引爲裨校天寶末玄宗以其戰河西有功爲改今名祿山亂守南陽斬賊使至德二載上言世占涼州恥與逆臣共宗有詔賜之姓因徙籍京兆舉族以李爲氏進至右羽林大將軍知軍事擢陳鄭穎毫節度使史思明已破東都凶焰勃然鼓而行自謂無前光弼壁河陽拒之使抱玉守南城賊急攻抱玉縱奇兵出表裏俘殺甚衆賊乃捨去從光弼戰大敗因不能西差功第一封欒城縣公代宗立兼澤潞節度使統相衛儀邢十一州兵以功授司

空兼兵部尙書武威郡王懇辭王爵徙涼國公進司徒廣德中吐蕃入寇帝次
陝羣盜徧南山五谷間東距號西抵岐椎剽不勝計詔太子賓客薛景仙爲南
山五溪谷防禦史引兵招捕久不克更詔抱玉討賊抱玉盡得賊株柢蹊隧分
兵守諸谷使牙將李崇客精騎四百自桃林號川襲之賊帥高玉脫身走城固
山南西道張獻誠禽以獻悉索支黨斬之不閱旬五谷平卽詔抱玉權鳳翔隴
右節度抱玉懇讓司徒故以尙書左僕射同中書門下平章事河西隴右副元
帥又讓僕射故還爲兵部尙書大曆二年來朝久之加山南西道副元帥兼節
度使屯盤屋抱玉兼三節度三副元帥位望隆赫乃上言隴坻達扶文縣地二
千里虜孔道不一梁岷重則關輔輕願擇能臣帥西道當一面臣得專事關隴
帝多其讓許之抱玉在鎮十餘年雖無破虜功而禁暴安人爲將臣之良卒年
七十四贈太保諡曰昭武從父弟抱真

抱真字大玄沈慮而斷抱玉屬以軍事授汾州別駕僕固懷恩反陷焉挺身歸
京師代宗以懷恩倚回紇所將朔方兵精憂之召抱真問狀答曰郭子儀嘗領

朔方軍人多德之懷恩欺其下曰子儀爲朝恩所殺今起而用是伐其謀兵可不戰解也旣而懷恩敗如抱真策遷殿中少監陳鄭澤潞節度留後旣謝因言百姓勞逸在牧守願得一州以自試更授澤州刺史兼澤潞節度副使徙懷州仍爲懷澤潞觀察留後凡八年抱真策山東有變澤潞兵所走集乘戰伐後賦重人困軍伍彫刈乃籍戶三丁擇一蠲其徭租給弓矢令閑月得曹偶習射歲終大校親按籍第能否賞責比三年皆爲精兵舉所部得成卒二萬旣不稟于官而府庫實乃曰軍可用矣繕甲淬兵遂雄山東天下稱昭義步兵爲諸軍冠久之爲澤潞節度行軍司馬會昭義節度李承昭病詔抱真權磁邢兵馬留後德宗嗣位校檢工部尙書領昭義節度使建中中中田悅反圍邢及臨洛詔抱真與河東馬燧合神策兵救之敗悅於雙岡斬其將楊朝光又破之臨洛遂解臨洛邢之圍以功檢校兵部尙書復與悅戰洹水走之進圍魏悅戰城下大敗進檢校尙書右僕射會朱滔王武俊反救悅抱真退保魏帝倉卒狩奉天聞問諸將皆哭各引麾下還屯於時李希烈陷汴李納反鄆李懷光相次反河中抱真

獨以數州截然橫絕潰叛中離沮其姦爲羣盜所憚興元初檢校左僕射同中書門下平章事絲倪國公進義陽郡王朱滔悉幽薊兵與回紇圍貝州以應朱泚而希烈既竊名號則欲臣制諸叛衆稍離天子下罪己詔並赦羣盜抱真乃遣客賈林以大義說武俊使合從擊滔武俊許諾而內猶豫抱真將自造其壁諉軍事於司馬盧玄卿曰吾此行繫時安危使遂不還部勒以聽天子命惟子勵兵東向雪吾之恥亦唯子卽以數騎馳入見武陵曰泚希烈爭竊帝號滔攻貝州此其志皆欲自肆于天下足下旣不能與競長雄捨九葉天子而臣反虜乎且詔書罪己禹湯之心也方上暴露播越公能自安乎因持武俊涕下交頤武俊亦感泣左右皆泣退臥帳中甘寢久之武俊感其不疑乃益恭指心誓天曰此身已許公死矣食訖約爲昆弟而別旦日合戰大破滔經城進檢校司空實封六百戶貞元初朝京師詔還所鎮抱真喜士聞世賢者必欲與之游雖小善皆卑禮厚幣數千里邀致之至無可錄徐徐以禮謝會天下稍無事乃飾臺沼以自娛好方士謂不死可致有孫季長者爲治丹且曰服此當僊去抱真表

署募府嘗語左右曰秦漢君不偶此我乃得之後升天不復見公等矣夜夢駕鶴寤而刻寓鶴衣羽服習乘之後益惑厭勝因疾請降官七讓司空還爲左僕射餌丹二萬丸不能食且死醫以彘肪敷漆下之疾少間季長曰危得僊何自棄也益服三千丸卒年六十二其子殿中侍御史緘匿喪與其屬盧會昌元仲經謀會諸將仲經詭抱真令曰吾疾不任事令緘典軍勉佐之副使李說及諸校俯首皆噓曰諾緘盛服出衆拜之悉發府庫勞軍會昌卽爲抱真表翌日令諸將署章請以節付緘天子已聞抱真喪遣使者馳入軍詔以事屬大將王廷貴緘護若抱真疾請詰朝見凡三日緘乃出見使者陳兵甚嚴使者曰朝廷已知公薨詔以兵屬廷貴君速歸發喪緘愕然謂諸將曰詔不許若何衆不對乃遽以印鑰上監軍始發喪使者趣廷貴視事護緘赴東都仲經逃諸外捕殺之會昌得不坐始緘遣將陳榮以書抵武俊假其財武俊怒曰吾與乃公善者恭王命非同惡也今聞已亡誰詐其子使不俟朝制邪囚榮而讓緘焉詔贈抱真

太保

路嗣恭字懿範京兆三原人始名劍客以世蔭爲鄴尉席豫黜陟河朔表爲蕭關令連徙神烏姑臧二縣考績爲天下最玄宗以爲可嗣漢魯恭因賜名轉渭南令主杜化東陽二驛時關畿用兵使人係道嗣恭儲具有素而民不擾後爲郭子儀朔方節度留後大將孫守亮擁重兵驕蹇不受制嗣恭因稱疾守亮至卽殺之一軍皆震永泰三年檢校刑部尙書知省事出爲江西觀察使以善治財賦稱有賈明觀者素事魚朝恩朝恩誅當坐死宰相元載納其賂遣効力江西將行居民數萬懷瓦石候擊載諭市吏禁止乃得去魏少游畏載常回容之及嗣恭代少游卽日杖死大曆八年嶺南將哥舒晃殺節度使呂崇賁五嶺大擾詔嗣恭兼嶺南節度使封冀國公嗣恭募勇敢士八千人以流人孟搖敬寃爲才擢任之使瑤督大軍當其衝寃率輕兵由間道出不意遂斬光及支黨萬餘築尸爲京觀俚洞魁宿爲惡者皆族夷之還爲檢校兵部尙書復知省事嗣恭起州縣吏以課治進至顯官及晃事株戮舶商沒其財數百萬私有之代宗惡焉故賞不酬功德宗立陰賂宰相楊炎炎錄前効更拜兵部尙書東都留守

俄加懷鄭汝陝河陽三城節度東都畿觀察使卒年七十一贈左僕射子應恕
應字從衆以蔭爲著作郎貞元初出爲虔州刺史詔嗣父封鑿贛石梗嶮以通
舟道德宗時李泌爲相號得君帝嘗曰誰於卿有恩者朕能報之泌乃言曩爲
元載所疾謫江西路嗣恭與載厚臣嘗畏之會與其子應並驅馬齧其脛臣惶
恐不自安應闕不言勉起見臣臣常媿其長者思有以報帝曰善卽日加應檢
校屯田郎中服金紫累遷宣歙池觀察使封襄陽郡王李錡反應發鄉兵救湖
常二州以故錡不能拔元和六年以疾授左散騎常侍卒謚曰靖恕字體仁從
嗣恭討哥舒晃授檢校工部員外郎得從便宜擢降將伊慎用之賊平恕功多
嗣恭節度河陽也恕爲懷州刺史年纔三十楊炎用扞魏博爲時嗤詆累遷鄜
坊宣歙觀察使坐事貶吉州刺史以右散騎常侍致仕卒贈洪州都督

唐書卷一百三十八

唐書卷一百三十八考證

馬璘傳擢兼御史大夫○舊書授兼御史中丞

李抱玉弟抱真進檢校司空實封六百戶○舊書作五百戶

路嗣恭傳永泰三年○舊書作大曆三年

出爲江西觀察使以善治財賦稱○臣德潛按本文卽蒙上永泰三年事也舊

書在大曆六年七月而舊書本紀則係七年正月

有賈明觀者素事魚朝恩朝恩誅當坐死○臣德潛按此爲朝恩坐死也舊書

云賈明觀者事北軍都虞候劉希暹魚朝恩誅希暹從死此又爲希暹坐死

也

唐書卷一百三十八考證

唐書卷一百三十九

宋 端 明 殿 學 士 宋 祁 撰

列傳第六十四

房張李

房瑄字次律河南河南人父融武后時以正諫大夫同鳳閣鸞臺平章事神龍元年貶死高州瑄少好學風度沈整以蔭補弘文生與呂向偕隱陸渾山十年不諧際人事開元中作封禪書說宰相張說說奇之奏爲校書郎舉任縣令科授盧氏令拜監察御史坐訊獄非是貶睦州司戶參軍復爲縣所至上德化興長利以治最顯天寶五載試給事中封漳南縣男時玄宗有逸志數巡幸廣溫泉爲華清宮環宮所置百司區署以瑄資機算詔總經度驪山疏巖剔藪爲天子游觀未畢坐善李適之章堅斥爲宜春太守歷琅邪鄴扶風三郡頻遷憲部侍郎十五載帝狩蜀瑄馳至普安上謁帝喜甚卽拜文部尙書同中書門下平章事從至成都賜一子官俄與韋見素崔渙奉冊靈武見肅宗具言上皇所以

傳付意因道當時利病籍索虜情辭吐華暢帝爲改容瑄既有重名帝傾意待之機務一二與瑄參決諸將相莫敢望於是第五琦言財利幸爲江淮租庸使瑄諫曰往楊國忠聚斂產怨天下陛下卽位人未見德今又寵琦是一國忠死一國忠生無以示遠方帝曰六軍之命方急無財則散卿惡琦可也何所取財瑄不得對北海太守賀蘭進明自河南至詔攝御史大夫嶺南節度使入謝帝曰朕語瑄除正大夫何爲攝邪進明銜之因曰陛下知晉亂乎惟以尙虛名任王衍爲宰相基祖浮華不事天下事故至於敗方唐中興當用實才而瑄性疏闊大言無當非宰相器陛下待之厚然孰肯爲陛下用乎帝曰何哉對曰陛下頃爲皇太子太子出曰撫軍入曰監國而瑄爲聖皇建遺諸王爲都統節度乃謂陛下爲元子而付以朔方河東河北空虛之地永王豐王乃統四節度此於聖皇似忠於陛下非忠也瑄意諸子一得天下身不失恩又多樹私黨以副戎權推此而言豈肯盡誠於陛下乎帝入其語始惡瑄以進明爲御史大夫河南節度使會瑄請自將平賊帝猶倚以成功乃詔瑄持節詔討西京防禦蒲潼兩

關兵馬節度等使得自擇參佐乃以兵部尙書王思禮御史中丞鄧景山爲副
戶部侍郎李揖爲行軍司馬中丞宋若思起居郎知制誥賈至右司郎中魏少
游爲判官給事中劉秩爲參謀瑄分三軍趨京師楊希文將南軍自宜壽入劉
愬將中軍自武功入李光進將北軍自奉天入瑄身中軍先鋒十月庚子次便
橋辛丑中軍北軍遇賊陳濤斜戰不利瑄欲持重有所伺中人邢延恩促戰故
敗士死麻葦癸卯率南軍復戰遂大敗希文愬皆降賊初瑄用春秋時戰法以
車二千乘繚營騎步夾之旣戰賊乘風譟牛悉髀栗賊投芻而火之人畜焚燒
殺卒四萬血丹野殘衆才數千不能軍瑄還走行在見帝肉袒請罪帝宥之使
裒夷散復圖進取瑄雅自負以天下爲己任然用兵本非所長其佐李揖劉秩
等皆儒人未嘗更軍旅瑄每詫曰彼曳落河雖多能當我劉秩乎帝雖恨瑄喪
師而眷任未衰崔圓自蜀來最後見帝瑄謂帝不見省易之圓以金畀李輔國
不淹日被寵遂怨瑄瑄數稱疾不入會御史大夫顏真卿劾奏諫議大夫李何
忌不孝瑄素善何忌不欲以惡名錮之託被酒入朝貶西平郡司馬琴工董廷

蘭出入瑄所瑄昵之廷蘭藉瑄勢數招賅謝爲有司劾治瑄訴于帝帝因震怒叱遣之瑄惶恐就第罷爲太子少師從帝還都封清河郡公瑄之廢朝臣多言瑄謀包文武可復用雖瑄亦自謂當柄任爲天子立功善瑄者暴其言于朝瑄方日引劉秩嚴武與宴語移病自如帝以瑄虛言浮誕內鞅鞅挾黨背公非大臣體乾元元年出瑄爲邠州刺史逐秩武等因下詔陳其比周狀喻敕中外始邠以武將領刺史故綱目廢弛卽治府爲營吏攘民居相淆謹瑄至一切革之人以便安政聲流聞召拜太子賓客遷禮部尙書爲晉漢二州刺史寶應二年召拜刑部尙書道病卒贈太尉瑄有遠器好談老子浮屠法喜賓客高談有餘而不切事時天下多故急於謀略攻取帝以吏事繩下而瑄爲相遽欲從容鎮靜以輔治之又知人不明以取敗撓故功名墮損云

贊曰唐名儒多言瑄德器有王佐材而史載行事亦少貶矣一舉喪師訖不復振原瑄以忠誼自奮片言悟主而取宰相必有以過人者用違所長遂無成功然盛名之下爲難居矣夫名盛則責望備實不副則訾咎深使瑄遭時承平從

容帷幄不失爲名宰而倉卒濟難事敗隙生陷於浮虛比周之罪名之爲累也
戒哉

子孺復幼頗能屬文然狂縱不法淮南節度使陳少游奏置募府多招術家言
已三十當得宰相以熏權近希進取後辟浙西韓滉府兄宗偃喪自嶺外還孺
復不出臨弔與妻鄭不相中慈姆爲言乃具棺召家人生斂之鄭方乳促上道
鄭死于行又娶崔昭女崔悍媚殺二侍兒私瘞之觀察使以聞貶連州司馬聽
崔去旣又與崔通請復合詔許未幾復離終容州刺史

瑄孫啓以蔭補鳳翔參軍事累調萬年令素贅附王叔文貞元末叔文用事除
容管經略使陰許以荆南帥節啓而荆湖宿留不肯進會叔文與韋執誼內忿
爭不果拜俄而皇太子監國啓惶駭就鎮凡九年改桂管觀察使州邸以賂請
有司飛驛送詔旣而憲宗自遣宦人持詔賜啓啓畏使者邀重餉卽曰先五日
已得詔使者給請視因馳歸以聞貶太僕少卿啓自陳獻使者南口十五帝怒
殺宦人貶啓虔州長史死始詔五管福建黔中道不得以口饋遺博易罷臘口

等使

瑄族孫式擢進士第累遷忠州刺史韋皋表爲雲南安撫副使蜀州刺史皋率劉闢反式留不得行賊平高崇文保貸之言諸朝除吏部郎中時河朔諸將劉濟張茂昭等更相劾奏帝欲和之拜式給事中使河北還奏如旨遷陝虢觀察使改河南尹會討王承宗鎮州索餉車四千乘民不能具式建言歲凶人勞不任調發又御史元稹亦言賊未禽而河南民先困詔可都鄙安之改宣歙觀察使卒贈左散騎常侍諡曰傾吏部郎中韋乾度曰始式刺蜀州劉闢構難卽謂闢曰向夢公爲上相儀衛甚盛幸無相忘闢喜以爲祥後闢發兵署牒首曰闢副曰式參謀曰符載大節已虧不宜得諡博士李虞仲曰始闢反爲其用者皆救死其頸可盡被惡名乎如式不能去又不能死可謂求生害仁者也闢走西山召所疑畏者盡殺之式在其間會救得免而曰大節已虧近於溢言諡乃定張鎬字從周博州人儀狀瓌偉有大志視經史猶漁獵然好王霸大略少事吳兢兢器之游京師未知名率嗜酒鼓琴自娛人或邀之杖策往醉卽返不及世

務天寶末楊國忠執政求天下士爲己重聞鎬才薦之釋褐衣拜左拾遺歷侍御史玄宗西狩鎬徒步扈從俄遣詣肅宗所數論事擢諫議大夫尋拜中書侍郎同中書門下平章事時引內浮屠數百居禁中號內道場諷外聞鎬諫曰天子之福要在養人以一函寓美風化未聞區區佛法而致太平願陛下以無爲爲心不以小乘撓聖慮帝然之尋詔兼河南節度使都統淮南諸軍事賊圍宋州張巡告急鎬倍道進檄濠州刺史閻丘曉趣救曉愆撓逗留不肯進比鎬至淮口而巡已陷鎬怒杖殺曉帝還京師封南陽郡公詔以本軍鎮汴州捕平殘寇史思明提范陽獻順款鎬揣其僞密奏曰思明勢窮而服包藏不測可以計取難以義招不宜以威權假之又言滑州防禦使許叔冀狡獪臨難必變宜追還宿衛書人不省時宦官絡繹出鎬境未嘗降情給納自范陽滑州使還者皆感言思明叔冀忠而毀鎬無經略才帝以鎬不切事機遂罷宰相授荊州大都督府長史思明叔冀後果叛如鎬言召拜太子賓客左散騎常侍坐市嗣岐王珍第貶辰州司戶參軍代宗初起爲撫州刺史遷洪州觀察使更封平原郡

公袁晁寇東境江介震駭鎬遣兵屯上饒斬首二千級又襲舒城賊楊昭梟之沈千載者新安大豪連結椎剽州縣不能禽鎬遣別將盡殄其衆改江南西道觀察使卒鎬起布衣二期至宰相居身廉不殖貲產善待士性簡重論議有體在位雖淺而天下之人推爲舊德云

李泌字長源魏八柱國弼六世孫徙居京兆七歲知爲文玄宗開元十六年悉召能言佛道孔子者相答難禁中有員倣者九歲升堂詞辯注射坐人皆屈帝異之曰半千孫固當然因問童子豈有類若者倣跪奏臣舅子李泌帝卽馳召之泌既至帝方與燕國公張說觀弈因使說試其能說請賦方圓動靜泌逡巡曰願聞其略說因曰方若棋局圓若棋子動若棋生靜若棋死泌卽答曰方若行義圓若用智動若騁材靜若得意說因賀帝得奇童帝大悅曰是子精神要大於身賜束帛敕其家曰善視養之張九齡尤所獎愛常引至臥內九齡與嚴挺之蕭誠善挺之惡誠佞勸九齡謝絕之九齡忽獨念曰嚴太苦勁然蕭軟美可喜方命左右召蕭泌在旁率爾曰公起布衣以直道至宰相而喜軟美者乎

九齡驚改容謝之因呼小友及長博學善治易常游嵩華終南間慕神仙不死術天寶中詣闕獻復明堂九鼎議帝憶其早惠召講老子有法得待詔翰林仍供奉東宮皇太子遇之厚嘗賦詩譏誚楊國忠安祿山等國忠疾之詔斥置蕪春郡肅宗卽位靈武物色求訪會泌亦自至已謁見陳天下所以成敗事帝悅欲授以官固辭願以客從入議國事出陪輿輦衆指曰著黃者聖人著白者山人帝聞因賜金紫拜元帥廣平王行軍司馬帝嘗曰卿侍上皇中爲朕師今下判廣平行軍朕父子資卿道義云始軍中謀帥皆屬建寧王泌密白帝曰建寧王誠賢然廣平冢嗣有君人量豈使爲吳太伯乎帝曰廣平爲太子何假元帥泌曰使元帥有功陛下不以爲儲副得邪太子從曰撫軍守曰監國今元帥乃撫軍也帝從之初帝在東宮李林甫數構譖勢危甚及卽位怨之欲掘冢焚骨泌以天子而念宿嫌示天下不廣使脅從之徒得釋言於賊帝不悅曰往事卿忘之乎對曰臣念不在此上皇有天下五十年一旦失意南方氣候惡且春秋高聞陛下錄故怨將內慚不憚萬有一感疾是陛下以天下之廣不能安親也

帝感悟抱泌頸以泣曰朕不及此因從容問破賊期對曰賊掠金帛子女悉送范陽有苟得心渠能定中國邪華人爲之用者獨周擊高尙等數人餘皆脅制偷合至天下大計非所知也不出二年無寇矣陛下無欲速夫王者之師當務萬全圖久安使無後害今詔李光弼守太原出井陘郭子儀取馮翊入河東則史思明張忠志不敢離范陽常山安守忠田乾真不敢離長安是以三地禁其四將也隨祿山者獨阿史那承慶耳使子儀毋取華令賊得通關中則北守范陽西救長安奔命數千里其精卒勁騎不逾年而敵我常以逸待勞來避其鋒去翦其疲以所徵之兵會扶風與太原朔方軍互擊之徐命建寧王爲范陽節度大使北並塞與光弼相掎角以取范陽賊失巢窟當死河南諸將手帝然之會西方兵大集帝欲速得長安曰今戰必勝攻必取何暇千里先事范陽乎泌曰必得兩京則賊再彊我再困且我所恃者磧西突騎西北諸戎耳若先取京師期必在春關東早熱馬且病士皆思歸不可以戰賊得休士養徒必復來南此危道也帝不聽二京平帝奉迎上皇自請歸東宮以遂子道泌曰上皇不來

矣人臣尙七十而傳況欲勞上皇以天下事乎帝曰奈何泌乃爲羣臣通奏具言天子思戀晨昏請促還以就孝養上皇得初奏答曰當與我劍南一道自奉不復東矣帝甚憂及再奏至喜曰吾方得爲天子父遂下誥戒行崔圓李輔國以泌親信疾之泌畏禍願隱衡山有詔給三品祿賜隱士服爲治室廬泌嘗取松樛枝以隱背名曰養和後得如龍形者因以獻帝四方爭効之代宗立召至舍蓬萊殿書閣初泌無妻不食肉帝乃賜光福里第彊詔食肉爲娶朔方故留後李暉甥昏日敕北軍供帳元載惡不附己因江西觀察使魏少游請僚佐載稱泌才以試祕書少監充判官載誅帝召還復爲常袞所忌出爲楚州刺史辭不行帝亦留之會澧州闕袞盛言南方凋瘵請輟泌治之乃授澧朗峽團練使徙杭州刺史皆有風績德宗在奉天召赴行在授左散騎常侍時李懷光叛歲又蝗旱議者欲赦懷光帝博問羣臣泌破一桐葉附使以進曰陛下與懷光君臣之分不可復合如此葉矣由是不赦始朱泚亂帝約吐蕃赴援賂以安西北庭旣而渾瑊與賊戰咸陽泚大敗吐蕃以師追北不甚力因大掠武功而歸京

師平來請如約帝業許欲遂與之泌曰安西北庭控制西域五十七國及十姓突厥皆捍兵處以分吐蕃勢使不得併兵東侵今與其地則關中危矣且吐蕃向持兩端不戰又掠我武功乃賊也奈何與之遂止貞元元年拜陝虢觀察使泌始鑿山開車道至三門以便鑲漕以勞進檢校禮部尚書淮西兵防秋屯鄜州已而四千人亡歸或曰吳少誠密招之既入境泌邀險悉擊殺之三年拜中書侍中同中書門下平章事累封鄴縣侯初張延賞減天下吏員人情愁怨至流離死道路者泌請復之帝未從因問今戶口減承平時幾何曰三之二帝曰人既彫耗員何可復泌曰不然戶口雖耗而事多承平十倍陛下欲省州縣則可而吏員不可減今州或參軍署券縣佐史判案所謂省官者去其冗員非常員也帝曰若何爲冗員對曰州參軍無職事及兼試額內官者兼試自至德以來有之比正員三之一可悉罷帝乃許復吏員而罷冗官泌又條奏中朝官常侍賓客十員其六員可罷左右贊善三十員其二十員可罷如舊制諸王未出閣官屬皆不除而所收科奉乃多於減員矣帝悅是時州刺史月奉至千緡方

鎮所取無藝而京官祿寡薄自方鎮入八座至謂罷權薛邕由左丞貶歙州刺史家人恨降之晚崔祐甫任吏部員外求爲洪州別駕使府賓佐有所忤者薦爲郎官其當遷臺閣者皆以不赴取罪去泌以爲外太重內太輕乃請隨官閑劇普增其奉時以爲宜而竇參多沮亂其事不能悉如所請泌又白罷拾遺補闕帝雖不從然因是不除諫官唯用韓皋歸登泌因收其公廨錢令二人寓食中書舍人署凡三年始以韋綬梁肅爲左右補闕太子妃蕭母郅國公主也坐蠱媚幽禁中帝怒責太子太子不知所對泌入帝數稱舒王賢泌揣帝有廢立意因曰陛下有一子而疑之乃欲立弟之子臣不敢以古事爭且十宅諸叔陛下奉之若何帝赫然曰卿何知舒王非朕子對曰陛下昔爲臣言之陛下有嫡子以爲疑弟之子敢自信於陛下乎帝曰卿違朕意不顧家族邪對曰臣衰老位宰相以諫而誅分也使太子廢宅日陛下悔曰我惟一子殺之泌不吾諫吾亦殺爾子則臣絕祀矣雖有兄弟子非所敢也卽噫鳴流涕因稱昔太宗詔太子不道藩王窺伺者兩廢之陛下疑東宮而稱舒王賢得無窺伺乎若太子得

罪請亦廢之而立皇孫千秋萬歲後天下猶陛下子孫有也且郅國爲其女妬忌而蠱惑東宮豈可以妻母累太子乎執爭數十意益堅帝寤太子乃得安初興元後國用大屈封物皆三損二舊制堂封歲三千六百縑後纔千二百至是帝使還舊封於是李晟馬燧渾瑊各食寶封悉讓送泌泌不納時方鎮私獻於帝歲凡五十萬緡其後稍損至三十萬帝以用度乏問泌泌請天下供錢歲百萬給宮中勸不受私獻凡詔旨須索卽代兩稅則方鎮可以行法天下紓矣帝嘗從容言盧杞清介敢言然少學不能廣朕以古道入皆指其姦而朕不覺也對曰陛下能覺杞之惡安致建中禍邪李揆和蕃顏真卿使希烈其害舊德多矣又楊炎罪不至死杞擠陷之而相關播懷光立功逼使其叛此欺天也帝曰卿言誠有之然楊炎視朕如三尺童子有所論奏可則退不許則辭官非特杞惡之也且建中亂卿亦知桑道茂語乎乃命當然對曰夫命者已然之言主相造命不當言命言命則不復賞善罰惡矣桀曰我生不有命自天武王數紂曰謂己有天命君而言命則桀紂矣帝曰朕請不復言命俄加集賢殿崇文館大

學士脩國史泌建言學士加大始中宗時及張說爲之固辭乃以學士知院事至崔圓復爲大學士亦引泌爲讓而止帝以前世上巳九日皆大宴集而寒食多與上巳同時欲以三月名節自我爲古若何而可泌請廢正月晦以二月朔爲中和節因賜大臣戚里尺謂之裁度民間以青囊盛百穀瓜果種相問遺號爲獻生子里閭讓宜春酒以祭句芒神祈豐年百官進農書以示務本帝悅乃著令與上巳九日爲三令節中外皆賜緡錢燕會四年八月月蝕東壁泌曰東壁圖書府大臣當有憂者吾以宰相兼學士當之矣昔燕國公張說由是以亡又可免乎明年果卒年六十八贈太子太傅泌出入中禁事四君數爲權倖所疾常以智免好縱橫大言時時讜議能寤移人主然常持黃老鬼神說故爲人所譏切初肅宗重陰陽巫祝擢王璵執政大抵興造工役輒牽禁忌俗說而黎幹以左道位京兆尹嘗使禁工駢珠刺繡爲乘輿服舉焚之以爲禳禳德宗素不爲然及嗣位罷內道場除巫祝代宗將葬帝號送承天門而輶車行不中道問其故有司曰陛下本命在午故避之帝泣曰安有枉靈駕以謀身利命直午

而行又宣政廊壞太卜言孟冬魁岡不可營繕帝曰春秋啓塞從時何魁岡爲
亟詔葺之及桑道茂城奉天事驗始尙時日拘忌因進用泌泌亦自有所建明
獨柳玘稱兩京復泌謀居多其功乃大於魯連范蠡云子繁

繁少才警無行泌始起陽城官諸朝故城重德泌而親厚於繁及疏裴延齡既
具藁以繁可信夜使繁書已封盡能誦憶乃錄以示延齡明日延齡白帝曰城
以疏示於朝卽擿其條以自疏解城奏入帝怒遂不省泌與梁肅善故繁師事
肅及卒烝其室士議謹醜由是擯棄積年後爲太常博士權德輿爲卿奏斥之
改河南府士曹參軍累遷隋州刺史罷歸不得調敬宗誕日詔與兵部侍郎丁
公著太常少卿陸亘入殿中抗老佛誦論改大理少卿弘文館學士諫官御史
交章彈治乃出爲亳州刺史州有劇賊剽室廬略財貲爲患它刺史不能禽繁
有機略悉知賊巢所在一旦出兵捕斬之議者責繁不先啓觀察府爲擅興詔
御史舒元輿按之元輿與繁素隙盡翻其獄以爲濫殺不辜有詔賜死京兆人
皆寬之繁下獄知且死恐先人功業泯滅從吏求廢紙握筆著家傳十篇傳于

世

贊曰泌之爲人也異哉其謀事近忠其輕去近高其自全近智卒而建上宰近立功立名者觀肅宗披榛莽立朝廷單言暫謀有所寤合皆付以政當此時泌於獻納爲不少又佐代宗收兩京獨不見錄寧二主不以宰相器之邪德宗晚好鬼神事乃獲用蓋以怪自置而爲之助也繁爲家傳言泌本居鬼谷而史臣謬言好鬼道以自解釋旣又著泌數與靈仙接言舉不經則知當時議者切而不與有爲而然繁言多浮侈不可信掇其近實者著于傳至勸帝先事范陽明太子無罪亦不可誣也

唐書卷一百三十九

唐

書

卷一百三十九

列傳

九

中華書局聚

唐書卷一百三十九考證

房瑄族孫式○舊書式爲瑄姪

唐書卷一百三十九考證

唐書卷一百四十

宋 端 明 殿 學 士 宋 祁 撰

列傳第六十五

崔苗二裴呂

崔圓字有裕貝州武城人後魏尚書左僕射亮八世孫少孤貧志向卓邁喜學
兵家開元中詔舉遺逸以鈐謀對策甲科歷京兆府參軍尹蕭炅薦之遷會昌
丞楊國忠遙領劍南節度引圓爲左司馬知留後玄宗西出次扶風遷御史中
丞劍南節度副大使圓銳功名初聞難刺國忠意乃治城浚隍列館宇儲什具
帝次河池圓疏具陳蜀土腴穀羨儲供易辦帝省書泣下曰世亂識忠臣卽日
拜中書侍郎同中書門下平章事仍兼劍南節度使天子至朝廷百司殿宇帷
幔皆具益嗟賞之肅宗立命與房瑄韞韋見素赴行在所帝爲制遺愛碑于蜀以
寵之至德二載遷中書令封趙國公實封戶五百乾元元年罷爲太子少師留
守東都於是上皇所置宰相無在者王師之敗相州也軍所過皆縱剽圓懼委

東都奔襄陽詔削階封尋詔拜濟王傅李光弼表爲懷州刺史改汾州以治行稱徙淮南節度使在鎮六年請朝京師吏民乞留詔檢校尙書右僕射還之久乃檢校左僕射入知省事大歷中卒年六十四贈太子太師諡曰昭襄

苗晉卿字元輔潞州壺關人世以儒素稱擢進士第調爲修武尉累進吏部郎中中書舍人知吏部選事選人訴索好官厲言倨色紛于前晉卿與相對終日無愠顏久之進侍郎積寬縱而吏下因緣作姦方時承平選常萬人李林甫爲尙書專國政以銓事委晉卿及宋遙然歲命它官同較書判覈才實天寶二載判入等者凡六十四人分甲乙丙三科以張奭爲第一奭御史中丞倚之子倚新得幸於帝晉卿欲附之奭本無學故議者囂然不平安祿山因間言之帝爲御花萼樓覆寶中裁十一二奭持紙終日筆不下人謂之曳白帝大怒貶倚淮陽太守遙武當太守晉卿安康太守明年徙魏郡卽克河北採訪使居三年政化大行嘗入計謁歸壺關望縣門輒步吏諫止晉卿以公門當下况父母邦乎郡太守迎犒使所屬令行酒酒至必立飲白醕侍老有獻降西階拜而飲時美

其恭改河東郡兼河東採訪使徙扶風郡封高平縣男遷工部尚書東都留守
召爲憲部兼左丞安祿山反竇廷芝棄陝郡不下楊國忠本忌其有望卽奏東
道賊衝非大臣不可鎮邊授陝郡太守陝虢防禦使晉卿見帝以老辭忤旨聽
致仕于家車駕入蜀搢紳多陷賊晉卿間道走金州肅宗至扶風召赴行在拜
左相平京師封韓國公食五百戶改侍中旣而乞骸骨罷爲太子太傅未幾復
拜侍中玄宗崩肅宗疾甚詔晉卿攝冢宰固讓曰大行遺詔皇帝三日聽政稽
祖宗故事則無冢宰之文奉遺詔則宜聽朝惟陛下順變以幸萬國帝不聽後
數日代宗立復詔攝冢宰固辭乃免時年老蹇甚乞間日入政事堂帝優之聽
入閣不趨爲御小延英召對宰相對小延英自晉卿始吐蕃犯京師晉卿以病
臥家賊輿致脅之噤不肯語賊不敢害帝還拜太保罷政事永泰初薨年八十
一贈太師京兆少尹護喪諡曰懿獻元載未顯時爲晉卿所遇載方相故諷有
司改諡文貞晉卿寬厚所至以惠化稱魏人爲營生祠立石頌美再秉政出入
七年小心謹畏不甚斥是非得失故能安保寵名然練達事體百官簿最一省

無遺議者比漢胡廣肅宗欲以李輔國爲常侍奏曰常侍近密非賢不可居豈宜任等輩罷之朝廷欲論陳希烈等死晉卿曰陛下得張通儒安守忠孫孝哲等何以加罪帝不從俄而史思明亂持是以誘衆嘗自爲父碑文有鵲巢碑上賊入上黨焚蕩略盡而苗氏松檟獨無傷大歷七年配享肅宗廟廷十子發丕堅粲垂向呂稷望咸粲德宗時官至郎中陸贄欲進粲官帝不許曰晉卿往攝政有不臣之言又名其子皆與帝王同粲等宜與外官贄奏王者爵人必於朝刑人必於市言與衆共之獎而不言其善斯謂曲貸罰而不書其惡斯謂中傷曲貸則授受不明而私幸之門啓中傷則枉直無辨而讒間之道行可不慎哉若陛下以晉卿姦邪粲等應坐則當公議其罪若知見誣亦宜擢粲等以示天下且晉卿起文儒致位台輔謙柔敦厚爲三朝所推安肯爲族滅計雖甚狂險猶不爲之況老臣乎帝然之而粲官終不顯

裴冕字章甫河中河東人本冠族仕家以蔭再調渭南尉王鉷爲京畿採訪使表署判官歷殿中侍御史冕少學術然明銳果於事衆號稱職鉷雅任之及鉷

得罪有詔廷辨冤位甚下而抗言其誣鉞死李林甫方用事僚屬懼皆引去獨
冤爲斂葬由是寢知名河西節度使哥舒翰辟行軍司馬玄宗入蜀詔皇太子
爲天下兵馬元帥拜冤御史中丞兼左庶子副之初冤在河西方召還而道遇
太子平涼遂從至靈武與杜鴻漸崔漪同辭進曰主上馱于勤且南狩蜀宗社
神器要須有歸今天意人事屬在殿下宜正位號有如逡巡失億兆心則大事
去矣太子曰我平寇逆奉迎乘輿還京師退居儲貳以侍膳左右豈不樂哉公
等何言之過對曰殿下居東宮二十年今多難啓聖以安社稷而所從將士皆
關輔人日夜思歸大衆一騷不可復集不如因而撫之以就大功臣等昧死請
太子固讓凡五請卒見聽太子卽位進冤中書侍郎同中書門下平章事乃建
言賣官度僧道士收賞濟軍與時取償既賤衆不爲宜肅宗至鳳翔罷冤政事
拜尙書右僕射兩京平封冀國公實封五百戶出爲劍南西川節度使復爲右
僕射待制集賢院俄充山陵使於是中書舍人劉烜爲李輔國所昵冤表爲判
官烜抵法坐降施州刺史徙澧州大歷中郭子儀言於代宗曰冤首佐先帝馳

驅靈武有社稷勳程元振忌其賢遂加誣構海內寃之陛下宜還寃於朝復俾
輔相必能致治成化時元載秉政寃早所甄引載德之又貪其衰瘵且下已遂
拜左僕射同中書門下平章事入見拜不能興載自扶之代爲贊謝俄兼河南
江淮副元帥東都留守不踰月卒有詔贈太尉寃以忠勤自將然不知宰相大
體性豪侈既素貴輿服食飲皆光麗珍豐櫪馬直數百金者常十數每廣會賓
客不能名其饌自製巾子工甚人爭效之號僕射巾領使既衆吏白俸簿月二
千緡寃顧視喜見顏間世訾其嗜利云始肅宗廟惟苗晉卿配享寃卒後二十
餘年有蘇正元者奏言肅宗爲元帥時師纔一旅寃於草創中甄大義以勸進
收募驍勇幾十餘萬既逾月房瑄來又一年而晉卿至今晉卿從祀而寃乃不
與有詔寃配享肅宗廟

裴遵慶字少良絳州聞喜人幼彊學該綜圖傳外晦內明不干當世年既長始
以仕家推蔭爲興寧陵丞調大理丞邊將蕭克濟督役苛暴役者有醜言有司
以大逆論遵慶曰財不足聚人力不足加衆焉能反由是全救數十族頻擢吏

部員外郎判南曹天寶時選者歲萬計遵慶性彊敏視簿牒詳而不苛世稱吏事第一肅宗時爲吏部侍郎蕭華輔政屢薦之拜黃門侍郎同中書門下平章事代宗初僕固懷恩反帝以遵慶忠厚大臣故奉詔宣慰懷恩聽命將入朝既而爲其將范志誠沮止時帝在陝遵慶脫身赴行在帝還遷太子少傅罷爲集賢院待制改吏部尚書以尚書右僕射復知選事朝廷優其老聽就第注官時以爲榮嘗有族子病狂易告以謀反帝識其謬置不問性惇正老而彌謹每薦賢有來謝者以爲恥諫而見從卽內益畏雖親近但記其削彙疏數而莫知所言大歷十年薨年九十餘初爲郎時著王政記述今古治體識者知其有公輔器云子向

向字儵仁以蔭得調建中初李紆爲同州刺史奏署判官李懷光叛河中使其將趙貴先築壘於同州紆奔奉天而向領州務貴先脅吏督役不及期將斬以徇民皆駭散向獨詣貴先壘開諭之貴先乃降同州不陷向力也累爲櫟陽渭南令奏課皆第一擢戶部員外郎德宗末方鎮之副多自選於朝以待有變次

授之故向以選爲太原少尹行軍司馬歷陝號觀察使以吏部尙書致仕向能以學行持門戶內外親屬百餘口祿俸必均世稱其孝睦卒年八十贈太子少保子寅官累御史大夫寅子樞

樞字紀聖咸通中第進士杜審權鎮河中奏署募府再遷藍田尉宰相王鐸知之遂直弘文館鐸罷樞久不調從僖宗入蜀擢殿中侍御史中和初鐸爲都統表署鄭滑掌書記龍紀初進給事中改京兆尹與孔緯厚善緯以罪貶故樞改右庶子出爲歙州刺史遷右散騎常侍爲汴州宣諭使樞素與朱全忠相結納故全忠聽命修貢獻不絕昭宗悅遷兵部侍郎時崔胤亦倚全忠專朝柄因與樞善俄以戶部侍郎同中書門下平章事帝在鳳翔貶胤官樞亦罷爲工部尙書已還宮拜檢校尙書左僕射同平章事出爲清海節度使全忠言樞有經世才不宜棄外復拜門下侍郎平章事監修國史累進右僕射諸道鹽鐵轉運使哀帝嗣位柳璨方用事全忠以牙將張廷範爲太常卿樞以爲廷範勳臣自宜任方鎮何用爲卿恐非王意持不下全忠怒謂賓佐曰吾常器樞不浮薄今乃

爾璨聞卽罷樞政事拜左僕射俄貶登州刺史又貶瀧州司戶參軍至滑州全忠遣人殺之白馬驛投尸于河年六十五初全忠佐吏李振曰此等自謂清流宜投諸河永爲濁流全忠笑而許之

呂誣河中河東人少力於學志行整飭孤貧不自業里人程氏財雄于鄉以女妻誣亦以誣才不久困厚分貲贍濟所欲故稱譽日廣開元末入京師第進士調寧陵尉採訪使韋陟署爲支使哥舒翰節度河西表支度判官歷太子通事舍人性靜慎勤總吏職諸僚或出游誣獨頽然據案鈎視簿最翰益親之累兼殿中侍御史翰敗潼關誣西趨靈武由中人尉薦肅宗才之拜御史中丞所陳事無不順納從至鳳翔遷武部侍郎帝復兩京詔盡繫羣臣之汙賊者以御史中丞崔器憲部侍郎韓擇木大理卿嚴向爲三司使處其罪又詔御史大夫李峴及誣領使誣於權宜知大體不及峴而援律傳經過之當時憚其持法然以峴故多所平反乾元二年九節度兵敗帝憂之擢誣同中書門下平章事知門下省翌復日以李峴李揆第五琦爲宰相而苗晉卿王璵罷會母喪解三月復

召知門下省事兼判度支還執政累封須昌縣伯遷黃門侍郎上元初加同中書門下三品當賜門戟或勸誣以凶服受吉賜不宜誣釋纓拜賜人譏其失禮誣引妻之父楚賓爲衛尉少卿楚賓子震爲郎官中人馬尚言者素暱於誣爲人求官誣奏爲藍田尉事覺帝怒命敬羽窮治殺尚言以其肉賜從官罷誣爲太子賓客數月拜荊州長史漕朗峽忠等五州節度使誣始建請荊州置南都詔可於是更號江陵府以誣爲尹置永平軍萬人遏吳蜀之衝以湖南之岳潭郴道邵連黔中之涪凡七州隸其道初荊州長史張惟一以衡州蠻酋陳希昂爲司馬督家兵千人自防惟一親將卒遂金與相忤希昂率兵至惟一所捕之惟一懼斬其首以謝悉以遂金兵屬之乃退自是政一出希昂後入朝遷常州刺史過江陵入謁誣伏甲擊殺之誣黨偶數十人積尸府門內外震服妖人申泰芝用左道事李輔國擢諫議大夫置軍邵道二州間以泰芝總之納羣蠻金賞以緋紫出褚中詔書賜衣示之羣蠻怵於賞而財不足更爲剽掠吏不敢制潭州刺史龐承鼎疾其姦因泰芝過潭縛付吏劾贓鉅萬得左道讖記并奏之

輔國矯追泰芝還京既召見反譖承鼎陷不辜詔譴按罪譴使判官嚴郢具獄
暴泰芝之惡帝不省賜承鼎死流郢建州後泰芝終以賊徙死承鼎追原其誣
譴爲治不急細務決大事剛果不撓始在河西悉知諸將能否及爲尹奏取材
者數十人總牙兵故威惠兩行譴之相與李揆不平既斥乃用善治聞揆恐帝
復用卽妄奏置軍湖南非便又陰遣人刺譴過失譴上疏訟其事帝怒逐揆出
之顯條其罪譴苦羸疾卒年五十一贈吏部尙書譴在朝不稱任職相反爲荆
州號令明賦斂均一其治尙威信故軍士用命闔境無盜賊民歌詠之自至德
以來處方面數十人譴最有名荆人生構房祠及歿吏裒錢十萬徙祠府西始
譴知杜鴻漸元載才薦於朝後皆爲宰相承泰中嚴郢以故吏請諡有司博士
獨孤及諡曰肅郢以故事宰相諡皆二名請益曰忠肅及執奏謂諡在義美惡
不在多名文王伐崇周公殺三監淮夷重耳一戰而霸而諡曰文冀缺之恪甯
俞之忠隨會不忘其君而諡曰武故知稱其大略其細也且二名諡非古也漢
興蕭何張良霍去病霍光以文武大略佐漢致太平一名不盡其善乃有文終

文成景桓宣成之謚唐興參用漢制魏徵以王道佐時近文愛君忘身近貞二者並優廢一莫可故曰文貞蕭瑀端直近貞性多猜近褊言褊則失貞稱貞則遺褊故曰貞褊蓋有爲爲之也若跡無異稱則易以一字故杜如晦曰成封德彝曰明王珪曰懿陳叔達曰忠溫彥博曰恭岑文本曰獻韋巨源曰昭皆當時赫赫居宰相位者謚不過一名而言故事宰相必以二名固所未聞宜如前謚遂不改

贊曰孔子稱才難然人之才有限不得皆善觀圓之銳而失守出奔晉卿雅厚而少風采臧否寃明彊嗜利不知大體諛輔政功名不及治郡然各以所長顯于時故聖人使人也器之不窮所不能而後爲治也遵慶寡疵中人之賢與

唐書卷一百四十考證

苗晉卿傳天寶二載判入等者凡六十四人○舊書作天寶一年

呂諲傳置永平軍萬人○舊書永平軍團練三千人

以湖南之岳潭郴道邵連黔中之涪凡七州隸其道○沈炳震曰按方鎮表增領涪衡潭岳郴邵永道連凡九州此作七州誤

後秦芝終以賊徙死承鼎追原其誣○臣德潛按此是承鼎之昭雪在秦芝死

後也而舊書則云承鼎竟得雪後秦芝竟以賊敗流死似雪罪以後秦芝始流死者然

唐書卷一百四十考證

唐書卷一百四十一

宋 端 明 殿 學 士 宋 祁 撰

列傳第六十六

崔鄧魏衛李韓盧高

崔光遠系出博陵後徙靈昌祖敬嗣嗜酒搏博中宗在房州吏多肆慢不爲禮敬嗣爲刺史獨盡誠推奉儲給豐衍帝德之及反正有與敬嗣同姓名者每擬官帝輒超拜後召見悟非是訪真敬嗣已死卽授其子汪五品官汪生光遠勇決任氣長六尺瞳子白黑分明開元末爲唐安令與楊國忠善累遷京兆少尹爲吐蕃弔祭使還會玄宗西狩詔留光遠爲京兆尹西京留守採訪使乘輿已出都人亂火左藏大盈庫爭輦財珍至乘驢入宮殿者光遠乃募官攝府縣誰何宮闕斬十數人乃定因僞使其子東見祿山而祿山先署張休爲京兆尹由是追休授光遠故官俄而同羅背賊以廐馬二千出奔賊將孫孝哲安神威招之不得神威憂死官吏驚走獄囚皆逸光遠以爲賊且走命人守神威孝哲等

第斬曳落河二人孝哲馳白祿山光遠懼與長安令蘇震出開遠門使人奔呼曰尹巡門門兵具器仗迎謁至皆斬之募得百餘人遂趨靈武肅宗嘉之擢拜御史大夫復爲京北尹遣到渭北募僑民會賊黨剽涇陽休祠房椎牛呼飲光遠刺知之率兵夜趨其所使百騎穀滿狙其前命驍士合譟賊醉不能師斬其徒二千得馬千噉俘一酋長以獻自是賊常避其鋒扈帝還改禮部尙書鄴國公封寶戶三百乾元元年繇汴州刺史代蕭華爲魏州節度使初郭子儀與賊戰汲郡光遠裁率汴師千人援之不甚力及守魏使將軍李處崧拒賊子儀不救戰不勝奔還賊因傅城下詭呼曰處崧召我而不出何也光遠信之斬處崧處崧善戰衆倚以爲重及死人益危魏城經袁知泰能元浩等完築牢甚光遠不能守夜潰圍出奔京師帝赦其罪拜太子少保會襄州將康楚元張嘉延反陷荆襄諸州因拜持節荆襄招討充山南東道兵馬都使又徙鳳翔尹先是岐隴賊郭愔等掠州縣峙五堡光遠至遣官喻降之旣而沈欽不親事愔等陰約党項及奴刺突厥敗韋倫於秦隴殺監軍使帝怒光遠無狀召還復使節度劍

南會段子璋反東川李奐敗走成都光遠進討平之然不能禁士卒剽掠士女至斷腕取金者夷殺數千人帝詔監軍按其罪以憂卒

鄧景山曹州人本以文吏進累至監察御史至德初擢拜青齊節度使徙淮南爲政簡肅有彘集城門鄧班語景山曰彘介物也失所次金不從革之象其有兵乎未幾宋州刺史劉展反初展有異志淮西節度使王仲昇表其狀詔遷揚州長史兼江淮都統密詔景山執送京師展知之擁兵二萬度淮景山逆擊不勝奔壽州因引平盧節度副使田神功討展神功兵至揚州大掠居人發冢墓大食波斯賈胡死者數千人展叛凡三月平追景山入朝拜尙書左丞以崔圓代之王思禮在太原儲庵羸衍請輸半以實京師會卒管崇嗣代之政弛不治數月爲下盜費略盡帝聞卽以景山爲太原尹封南陽郡公至則振覈紀綱檢覆于隱衆大懼而景山清約子弟饌不過草具用器止烏漆待上賓惟豚魚而已取倉粟紅腐者食之兼給麾下麾下怨訕左右白景山景山曰此不食留將安用邪因慢罵士皆羞忿有裨校抵死諸將請贖不許其弟請代不許請納一

馬贖景山乃許減死衆怒曰吾屬命纔一馬直乎景山護失叱遣之少將黃抱節因衆怒作亂景山遇害時寶應元年也肅宗以其統馭失方不復究驗遣使喻撫其軍軍中請辛雲京爲節度詔可景山與劉晏善其後家寒窶晏屢經紀之嫁其孤女諡曰敬

崔瓘博陵人以士行修謹聞累官至澧州刺史不爲煩苛人便安之流亡還歸居二年增戶數萬詔特進五階以寵異政大曆中遷湖南觀察使時將吏習寬弛不奉法瓘稍以禮法繩裁之下多怨別將臧玠判官達奚覲忿爭覲曰今幸無事玠曰欲有事邪拂衣去是夜以兵殺覲瓘聞難惶懼走遇害帝悼惜之

魏少游字少游邢州鉅鹿人以吏幹稱天寶末累遷朔方水陸轉運副使肅宗幸靈武杜鴻漸等奉迎而留少游繕治宮室少游大爲殿宇幄帟皆象宮闕諸王公主悉有次舍供饑窮水陸又有千餘騎鎧幟光鮮振旅以入帝見宮殿不悅曰我至此欲就大事安用是爲稍命去之除左司郎中兩京平封鉅鹿縣侯遷陝州刺史王師潰於鄴河洛震駭少游鎮守自若擢京兆尹李輔國以其不

附己改衛尉卿會率羣臣馬助軍少游與漢中王瑀持異帝怒貶渠州長史復爲京兆尹始請中書門下省五品尙書省四品諸司正員三品諸王駙馬眷以上親及壻若甥不得任京兆官詔可大曆二年爲江西觀察使進邢部尙書改封趙國公六年卒贈太子太師少游四爲京兆雖無赫赫名然善任人緣飾規檢有足稱者

衛伯玉史失其何所人少習武技爲有力天寶中從安西府積勞至員外諸衛將軍肅宗卽位慨然願立功乃歸長安領神策兵馬使出鎮陝州行營乾元二年賊將李歸仁以騎五千入寇伯玉與戰彊子坂破之獲馬六百匹遷羽林大將軍徙四鎮北廷行營節度使俄爲神策軍節度史思明遣子朝義夜襲陝將動京師伯玉迎擊破之於永寧加特進封河東郡公廣德元年代宗幸陝以伯玉有幹略可方面大事乃拜荆南節度使進封城陽郡王大曆初以母憂當代諷將吏留己復詔節度荆南議者醜其留十一年歸京師卒

李澄遼東襄平人隋蒲山公寬之遠胄以勇剽隸江淮都統李垣府爲偏將又

從永平節度李勉軍勉帥汴表澄滑州刺史李希烈陷汴勉走澄以城降賊希烈以爲尙書令節度永平軍興元元年澄遣盧融間道奉表詣行在德宗嘉之署帛詔內蜜丸授澄刑部尙書汴滑節度使澄未卽宣乃先勒訓士馬希烈疑以養子六百戍之賊急攻寧陵邀澄至石柱澄密令焚營爲驚遁者養子輩果乘以剽掠澄盡斬之以告希烈不能詰賊遣將翟崇暉率精兵寇陳州未還汴軍寡澄度不能制己又中官薛盈珍持節至封澄武威郡王賜寶封乃燔賊旗節自歸希烈旣失澄而崇暉復敗繇是奔汝南澄引兵將取汴屯其北門不敢進及劉洽師屯東門賊將田懷珍納之比澄入洽已保子城矣澄乃舍浚儀兩軍士日爭忿未能安會鄭州賊將孫液送款於澄澄遣子清馳赴先此河陽李芑使偏將雍希顥攻鄭數殘剽液拒之及納清希顥大怒急攻鄭清助守殺河陽兵數千希顥焚陽武去澄遂如鄭詔授清檢校太子賓客易名克寧貞元初遷澄檢校尙書左僕射義成軍節度使二年卒年五十四贈司空澄始封隴西公後乃進王爵每上章必疊署二封士大夫笑其野澄之喪克寧闕不發閱旬

日欲自領事其行軍司馬馬鉉不許克寧殺之墨經加卒嬰城將爲亂劉洽以兵屯境上遣使諭止遂自戢然道閉者半月詔以賈耽代鎮克寧乃護喪歸悉索府中財夜出軍士從剽之殆盡澄樞至京猶賜克寧莊一區錢千緡粟麥千石云

韓全義家素寒史失其先世與卒伍以巧佞事宦者竇文場擢累長武城使進拜夏綏銀宥節度使詔以長武兵赴之全義素懦貪無紀律爲下斬狎詔未下軍中徧知之謀曰夏州沙磧無樹藝生業不可往是夜謀而亂全義縋以逸殺其親將王栖巖趙虔曜等軍虞候高崇文誅亂首衆乃定全義得赴屯吳少誠以蔡拒命詔合十七鎮兵討之時軍無帥統惟以奄豎監之遂敗于小澗德宗以文場素爲全義地因用爲淮西行營招討使以陳許節度使上官泚副之諸鎮兵皆屬全義無它方略號令悉稟監軍每議攻戰宦豎十數紛爭帳中小人好自異互詆訾不能決賊知之數請戰遇賊廣利城方暑地沮洳士皆病癘全義未嘗存之旣戰師皆潰退保五樓賊移屯逼之乃與監軍賈英秀等保激水

不能固又入屯陳州是時惟陳許將孟元陽神策將蘇光榮守激水全義誘潞滑州數大將殺之然卒不振宦人共掩其敗帝不知少誠度無能爲卽謾書謝監軍求洗前咎帝下其議宰相賈耽以爲五樓之敗賊不追者以冀恩耳請納其誠帝然之全義班師過闕下託疾不入謁司馬崔放見帝謝無功帝曰全義誘少誠歸國功大矣何必殺敵乃爲功邪還屯夏州中人卽第宴資然卒不見天子去時恨帝失政使姦人得肆云憲宗在藩疾之旣嗣位全義大懼願入覲不復用以太子少保致仕卒其子獻女樂八人帝不納曰我方以儉治天下惡用是爲哉

盧從史其先在元魏時爲盛族後徙籍不常父虔好學由進士第歷御史祕書監從史少好騎射遊澤潞間節度使李長榮署爲督將貞元後藩臣闕德宗必取本軍所喜戴者授之從史在潞姦獍得志又善附迎中人會長榮卒卽擢拜昭義節度副大使旣得志寢恣不道至奪部將妻而能辯給粉澤其非府屬孔戡等屢以直語爭刺初唯唯後益不從皆引去元和中丁父喪去官從史卽獻

計誅王承宗陰向帝旨絲是奪服領澤潞因詔討賊而勒兵逗留陰與承宗交得其密號授軍中又高芻粟直以售度支卽上書求兼宰相且誣諸軍與賊通兵未可進憲宗患之初神策中尉吐突承璀與對壘從史時過其營飲博承璀多出寶帶奇玩夸之從史資沓猥所玩悅必遺焉從史喜益狎不疑帝用裴迥謀敕承璀圖之承璀伏壯士幕下伺其來與語士突起猝持出帳後縛內車中從者驚亂斬數十人諭以密詔而大將烏重胤素忠果部勒其衆乃定會夜疾驅未明出境道路無知者於是五年夏四月有詔慰其軍疏從史罪惡貶驩州司馬賜死子繼宗等並徙嶺南

高霞寓幽州范陽人其先五代不異居孝聞里閭德宗初採訪使洪經綸言之闕詔表于門霞寓能讀春秋及兵法頗以感慨自尙狡譎多變往見長武城使高崇文崇文異其才檄任軍職從擊劉闢戰輒克下鹿頭城降李文悅仇良輔等追戰七盤城有功禽闢於羊灌擢拜彭州刺史俄代崇文爲長武城使封感義郡王元和中以左威衛將軍隨吐突承璀討王承宗諸將多覆軍獨霞寓有

功詔藏所獲鎧仗於神策庫以旌之承瓘已執盧從史其軍相驚乃遣霞寓諭之麾而大呼曰元惡縛矣公等宜自安卽脫鎧揖而前衆遂定欲留爲帥霞寓間道去拜豐州刺史三城都團練防禦使討吳元濟也析山南東道爲兩鎮以霞寓宿將拜唐鄧隋節度使遏賊南衝霞寓雖悍而寡謀統制尤非所善始引兵趨蕭陂戰小勝進至文城柵賊僞北逐之爲伏所掩遂大敗才以身免詔貶歸州刺史乃厚賂權宦召爲右衛大將軍拜振武節度使會吐蕃攻鹽豐二州霞寓以兵五千屯拂雲堆虜引去浚金河漑鹵地數千頃改左武衛大將軍又節度邠寧位檢校司徒寶曆中疽發首不能事以右金吾衛大將軍召卒于道贈太保霞寓位旣高言多不遜帝欲罷其兵益自憂乃上私第爲佛祠請署曰懷恩以塞帝疑俄又詔侮僚屬作慢語斥訕大臣其反覆自任類此

唐書卷一百四十一考證

崔光遠傳光遠乃募官攝府縣誰何宮闕斬十數人乃定○臣德潛按誰何宮

闕四字未明舊書云募人攝府縣官分守之殺數十人方止較明白

魏城經袁知泰能元浩等完築牢甚○能元浩舊書作元皓

李澄傳使僞將雍希顯攻鄭○舊書作雍顯

唐書卷一百四十一考證

唐書卷一百四十二

宋 端 明 殿 學 士 宋 祁 撰

列傳第六十七

李楊崔柳韋路

李麟裔出懿祖於屬最疏父濬歷潤虢潞三州刺史以誠信號良吏開元中終劍南節度按察使贈戶部尚書諡曰誠麟好學善文辭以父蔭補京兆府戶曹參軍舉宗室異能轉殿中侍御史累擢兵部侍郎與楊國忠同列國忠怙權疾之改權禮部貢舉國忠遷麟復本官改國子祭酒出爲河東太守有清政安祿山反朝廷以麟儒者非禦侮才還爲祭酒封渭源縣男玄宗入蜀麟走見帝再遷憲部尚書同中書門下平章事時宰相韋見素房瑄崔渙崔圓踵赴肅宗行在獨麟以宗室子留總百司上皇還京進同中書門下三品封襄國公張皇后挾李輔國寢撓政苗晉卿崔圓等畏其權皆附離取安獨麟守正不阿順輔國忌恚乾元初罷爲太子少傅明年卒年六十六贈太子太傅諡曰德

楊綰字公權華州華陰人祖溫玉在武后時爲顯官世以儒聞綰少孤家素貧事母謹甚性沈靖獨處一室左右圖書凝塵滿席澹如也不好立名有所論著未始示人第進士補太子正字舉詞藻宏麗科玄宗已試又加詩賦各一篇綰爲冠由是擢右拾遺制舉加詩賦絲綰始天寶亂肅宗卽位綰脫身見行在拜起居舍人知制誥累遷中書舍人兼修國史故事舍人年久者爲閣老其公靡雜料獨取五之四至綰悉均給之歷禮部侍郎建復古孝廉力田等科天下高其議俄遷吏部品裁清允人服其公是時元載秉政忌綰望高疏薄之宦者魚朝恩判國子監旣誅因是建言太學當得天下名儒汰其選卽拜綰國子祭酒外示尊重而實以散地處之載日貪冒天下士議益歸綰帝亦知之自擢爲太常卿充禮儀使載得罪拜中書侍郎同中書門下平章事修國史制下士相賀於朝綰固讓帝不許時諸州悉帶團練使綰奏刺史自有持節諸軍事以掌軍旅司馬古司武所以副軍卽今副使司兵參軍卽今團練判官官號重複可罷天下團練守捉使詔可又減諸道觀察判官員之半復言舊制刺史被代若別

追皆降魚書乃得去開元時置諸道採訪使得專停刺史威柄外移漸不可久其刺史不稱職若賊負本道使具條以聞不得擅追及停而刺史亦不得輒去州詣使所如其故闕使司無署攝聽上佐代領帝善其謀於是高選州上佐定上中下州差置兵員詔郎官御史分道巡覆又定府州官月稟使優狹相均始天下兵興從權宜官品同而祿例差及四方粗定元載王縉當國偷以爲利因不改故江淮大州至月千緡而山劍貧險雖上州刺史止數十緡及此始復太平舊制縮素癩疾居旬日寢劇有詔就中書療治每對延英殿許挾扶于時釐補穿敝唯縮是恃未幾薨帝驚悼詔羣臣曰天不使朕致太平何奪縮之速邪卽日詔贈司徒遣使者冊授欲及其未斂也詔百官如第弔遣使會弔賻絹千匹布三百匹太常諡曰文貞比部郎中蘇端儉人也持異議宰相常袞陰助之帝以其言醜險不實貶端巴州員外司馬猶賜諡曰文簡縮儉約未嘗問生事祿稟分姻舊隨多寡輒盡造之者清談終晷而不及榮利欲干以私聞其言必內愧止經誥微趣學家疑晦者一見卽詣其極始輔政御史中丞崔寬本豪侈

城南別墅池觀堂皇爲當時第一卽日遣人毀之京兆尹黎幹出入從騶馭百數省損才留十餘騎中書令郭子儀在邠州行營方大會除書至音樂散五之四宅聞風靡然自化者不可勝紀世以比楊震山濤謝安云

崔祐甫字貽孫太子賓客孝公沔之子也世以禮法爲聞家第進士調壽安尉安祿山陷洛陽祐甫冒矢石入私廟負木主以逃自起居舍人累遷中書舍人性剛直遇事不回時侍郎闕祐甫攝省事數與宰相常袞爭議不平袞怒使知吏部選每擬官袞輒駁異祐甫不爲下會朱泚軍中貓鼠同乳表其瑞詔示袞袞率羣臣賀祐甫獨曰可弔不可賀詔使問狀對曰臣聞禮迎貓爲其食田鼠以其爲人去害雖細必錄今貓受畜於人不能食鼠而反乳之無乃失其性邪貓職不修其應若曰法吏有不觸邪疆吏有不扞敵臣愚以爲當命有司察貪吏誠邊候勤徼巡則貓能致功鼠不爲害代宗異其言袞益不喜帝崩袞與禮官議禮爲君斬袞三年漢文帝權制三十六日我太宗文皇帝崩遺詔亦三十六日羣臣不忍旣葬而除略盡四月高宗如漢故事玄宗以來始變天子喪爲

二十七日乃者遺詔雖曰天下吏民三日釋服羣臣宜如皇帝服二十七日乃除祐甫曰遺詔無臣庶人之別是皇帝宜二十七日而羣臣三日也袁曰賀循稱吏者官長所署非公卿百官也祐甫對傳曰委之三吏乃三公也史稱循吏良吏豈胥吏歟袁曰禮非天降地出人情而已且公卿大臣膺受寵祿今與黔首同信宿而除於公安乎祐甫曰若遺詔何詔而可改孰不可改意象殊厲袁方入臨遣從吏扶立殿墀上祐甫指之謂衆曰臣哭君前有扶禮乎袁不勝怒乃劾祐甫率情變禮撓國典請貶潮州刺史德宗以爲重改河南少尹始肅宗時天下務劇宰相更直掌事若休沐還第非大詔命不待徧曉則聽直者代署以聞是時郭子儀朱泚俱以平章事當署敕尾而不行宰相事帝新卽位袁如故事代署子儀泚入言祐甫不宜貶帝曰卿向何所言今云非邪二人對初不知帝怒以袁爲罔上是日羣臣直經立月華門外卽兩換職以袁河南少尹而拜祐甫門下侍郎同中書門下平章事俄改中書侍郎自至德乾元以來天下戰討啓巧填委故官賞繆紊永泰後稍稍平定而元載用事非賄謝不與官割

塞公路網紀大壞載誅楊綰相未幾卒哀當國懲其敝凡奏請一杜絕之惟文辭入第乃得進然無所甄異賢愚同滯焉及祐甫則薦舉惟其人不自疑畏推至公以行未踰年除吏幾八百員莫不諧允帝嘗謂曰人言卿擬官多親舊何邪對曰陛下令臣進擬庶官夫進擬者必悉其才行如不與聞知何由得其實帝以爲然神策軍使王駕鶴者典衛兵久權震中外帝將代之懼其變以問祐甫祐甫曰是無足慮卽召駕鶴留語移時而代者已入軍中矣淄青李正己畏帝威斷表獻錢三十萬緡以觀朝廷帝意其詐未能答祐甫曰正己誠詐陛下不如因遣使勞其軍以所獻就賜將士若正己奉承認書是陛下恩洽士心若不用彼自斂怨軍且亂又使諸藩不以朝廷爲重賄帝曰善正己慚服時議者譏其謨謀謂可復貞觀開元之治是歲被疾詔肩輿至中書臥而承旨若還第卽遣使咨決薨年六十贈太傅諡曰文貞故事門下侍郎未有贈三師者帝以其有大臣節特寵異之朱泚亂祐甫妻王陷賊中泚嘗與祐甫同列遺以繒帛菽粟受而緘鏹之帝還京具封以獻士君子益重其家法云子植嗣

植字公修祐甫弟廬江令嬰甫子也祐甫病謂妻曰吾歿當以廬江次子主吾祀及卒護喪者以聞帝惻然召植使卽喪次終服補弘文生博通經史於易尤邃與鄭覃同時爲補闕皆賢宰相後每朝廷有得失兩人者更疏論執譽望蔚然元和中爲給事中時皇甫鎛判度支建言減百官奉粟植封還詔書鎛又請天下所納鹽酒利增估者以新準舊一切追償植奏言用兵久百姓凋罄往雖估踰其實今不可復收於是議者咸罪鎛鎛懼而止長慶初拜中書侍郎同中書門下平章事穆宗問貞觀開元中治道最盛何致而然植曰太宗資上聖興民間知百姓疾苦故厲精思治又以房玄齡杜如晦魏徵王珪爲之佐君明臣忠聖賢相維治致升平固其宜也玄宗在天后時身踐憂患旣卽位得姚宋宋璟此二人蚤夜孜孜納君於道璟嘗手寫尙書無逸爲圖以獻勸帝出入觀省以自戒其後朽暗乃代以山水圖稍怠於勤左右不復箴規姦臣日用事以至于敗昔德宗嘗問先臣祐甫開元天寶事先臣具道治亂所以然臣在童丱記其說今願陛下以無逸爲元龜則天下幸甚他日又問司馬遷言漢文帝惜十

家產而罷露臺身衣弋絺履草烏集上書囊爲殿帷信乎何太儉邪植曰良史非貌言漢承秦侈縱之餘海內凋窶文帝從代來知稼穡艱難是以躬履儉約爲天下守財景帝遵而不改故家給戶足至武帝時錢朽貫穀紅腐乃能出師征伐威動四方然侈靡不節末年戶口減半稅及舟車人不聊乃下哀痛詔封丞相爲富人侯然則帝王不可以不示儉而天下足帝曰卿言善患行之爲難耳時朝廷悉收河朔三鎮而劉總又以幽薊七州獻諸朝且懼部將構亂乃先籍豪銳不檢者送京師而朱克融在籍中植與杜元穎不知兵謂藩鎮且平不復料天下安危事而克融等羈旅塞躡願得官自效日訴于前皆抑不與及遣張弘靖赴鎮縱克融等北還不數月克融亂復失河朔矣天下尤之植內慚罷爲刑部尙書旋授岳鄂觀察使未幾遷嶺南節度使還拜戶部尙書終華州刺史贈尙書左僕射

倭字德長祐甫從子也性介潔矜己之清視臧負者若讎以蘇州刺史奏課第一遷湖南觀察使湖南舊法雖豐年貿易不出境鄰部災荒不恤也倭至謂屬

吏曰此豈人情乎無閉糴以重困民削其禁自是商賈流通貨物益饒入爲戶部侍郎判度支時田弘正徙鎮州以魏兵二千行既至留自衛請度支給歲糧穆宗下其議倭固執不與弘正不得已遣魏卒俄而鎮兵亂弘正遇害倭之爲也時天子失德倭黨與盛有司不敢名其罪出爲鳳翔節度使踰年徙河南尹以戶部尙書致仕卒贈太子少保諡曰肅

贊曰植輔政當有爲之時無經國才履危防淺機不知其潰而發也手弛檻縶縱虎狼焉一日而亡地數千里爲天下笑倭吝財資賊又皆幸不誅天以河北亂唐故君臣不肯勃繆其謀惜哉

柳渾字夷曠一字惟深本名載梁僕射愔六世孫後籍襄州早孤方十餘歲有巫告曰兒相天且賤爲浮屠道可緩死諸父欲從其言渾曰去聖教爲異術不若速死學愈篤與游者皆有名士天寶初擢進士第調單父尉累除衢州司馬棄官隱武寧山召拜監察御史臺僚以儀矩相繩而渾放曠不樂檢局乃求外職宰相惜其才留爲左補闕大曆初江西魏少游表爲判官州僧有夜飲火其

廬者歸罪瘖奴軍候受財不詰獄具渾與其僚崔祐甫白奴寃少游趣訊僧僧首伏因厚謝二人路嗣恭代少游渾遷團練副使俄爲袁州刺史祐甫輔政薦爲諫議大夫浙江東西黜陟使入爲尙書右丞朱泚亂渾匿終南山賊素聞其名以宰相召執其子榜笞之搜索所在渾羸服步至奉天改右散騎常侍賊平奏言臣名向爲賊汙且載於文從戈非僂武所宜乃更今名貞元元年遷兵部侍郎封宣城縣伯李希烈據淮蔡關播用李元平守汝州渾曰是夫銜玉而買石者也往必見禽何賊之攘旣而果爲賊縛三年以本官同中書門下平章事仍判門下省帝嘗親擇吏宰畿邑而政有狀召宰相語皆賀帝得人渾獨不賀曰此特京兆尹職耳陛下當擇臣輩以輔聖德臣當選京兆尹承大化尹當求令長親細事代尹擇令非陛下所宜帝然之玉工爲帝作帶誤毀一鎊工不敢聞私市宅玉足之及獻帝識不類擿之工人伏罪帝怒其欺詔京兆府論死渾曰陛下遽殺之則已若委有司須詳讞乃可於法誤傷乘輿器服罪當杖請論如律由是工不死左丞田季羔從子伯彊請賣私第募兵助討吐蕃渾曰季羔

先朝號名臣由祖以來世孝謹表闕于門隋時舊第惟田一族耳討賊自有國計豈容不肖子毀門構徼一時倖損風教哉請薄責以示懲沮帝嘉納韓滉自浙西入朝帝虛己待之奏事或日晏佗相取充位滉遂省中榜吏自若渾雖爲滉所引惡其專質讓曰省闈非刑人地而榜吏至死公家先相國以猶察不滿歲輒罷今公奈何蹈前非顛立威福豈尊主卑臣義邪滉悔悟稍褻其威白志貞除浙西觀察使渾奏志貞與小史縱嘉其才不當超劇職臣以死守不敢奉詔會渾移疾出卽日詔付外施行疾間因乞骸骨不許門下吏白過官渾愀然曰旣委有司而復撓之豈賢者用心邪士或千里辭家以干祿小邑主辦豈慮不能是歲擬官無退異者渾城與吐蕃會平涼是日帝語大臣以和戎息師之便馬燧賀曰今日已盟可百年無虜患渾跪曰五帝無誥誓三王無盟詛蓋盟詛之興皆在季末今盛明之朝反以季末事行於夷狄夫夷狄人面獸心易以兵制難以信結臣竊憂之李晟繼言曰蕃戎多不情誠如渾言帝變色曰渾儒生未達邊事而大臣亦當爾邪皆頓首謝夜半邠寧節度使韓游瓌飛奏吐蕃

劫盟將校皆覆沒帝大驚卽以其表示渾明日慰之曰卿儒士乃知軍戎萬里情乎益禮異之宰相張延賞怙權嫉渾守正遣親厚謂曰明公舊德第慎言於朝則位可久渾曰爲吾謝張公渾頭可斷而舌不可禁卒爲所擠以右散騎常侍罷政事渾驚辯好談謔與人交豁如也情儉不營產利免後數日置酒召故人出游酣肆乃還曠然無黜免意時李勉盧翰皆以舊相闔門奉朝請數曰吾等視柳宜城真拘俗之人哉五年卒年七十五諡曰貞渾母兄識字方明知名士也工文章與蕭穎士元德秀劉迅相上下而識練理創端往往詣極雖趣尙非博然當時作者伏其簡拔渾亦善屬文但沈思不逮於識云

韋處厚字德載京兆萬年人事繼母以孝聞親歿廬墓終喪中進士第又擢才識兼茂科授集賢校書郎舉賢良方正異等宰相裴垪引直史館改咸陽尉憲宗初擢左補闕禮部尙書李絳請間言古帝王以納諫爲聖拒諫爲昏今不聞進規納忠何以知天下事帝曰韋處厚路隋數上疏其言忠切顧卿未知爾由是中外推其靖密歷考功員外郎坐與宰相韋貫之善出開州刺史以戶部郎

中入知制誥穆宗立爲翰林侍講學士處厚以帝冲怠不向學卽與路隋合易書詩春秋禮孝經論語掇其粹要題爲六經法言二十篇上之冀助省覽帝稱善並賜金幣再遷中書舍人張平叔以言利得幸於帝建言官自鬻鹽籠天下之財宰相不能詰下羣臣議處厚發十難誚其迂謬平叔愧縮遂寢敬宗初李逢吉得柄構李紳逐爲端州司馬其黨劉栖楚等欲致紳必死建言當徙醜地處厚上言逢吉黨與以紳之斥猶有餘辜人情危駭詩云萋兮斐兮成是貝錦彼譖人者亦已太甚讒言罔極交亂四國此古人疾讒之深也孔子曰三年無改於父之道可謂孝矣按紳先朝舊臣就令有過尙當被瑕洗釁成無改之美况被讒乎建中時山東之亂興宰相朋黨楊炎爲元載復讎盧杞爲劉晏償怨兵連禍結天下騷然此陛下親所聞見得不深念哉紳繇是免逢吉怒至寶曆三年赦書不言左降官未量移者以沮紳內徙處厚復奏逢吉緣紳一人而使近歲流斥皆不蒙澤非所以廣恩於天下帝悟追改其條進翰林承旨學士兵部侍郎方天子荒暗月視朝才三四處厚入見卽自陳有罪願前死以謝帝曰

何哉對曰臣昔爲諫官不能死爭使先帝因畋與色而至不壽於法應誅然所以不死者陛下在春宮十有五矣今皇子方襁褓臣不敢避死亡之誅帝大感悟賜錦綵以慰其意王廷湊之亂帝歎宰相不才而使姦臣跋扈處厚曰陛下有一裴度不能用乃當饋而歎恨無蕭曹此馮唐所以謂漢文帝有頗牧不能用也後禁中急變文宗綏內難猶豫未卽下詔處厚入昌言曰春秋大義滅親內惡必書以明逆順正名討罪何所避諱哉遂奉教班諭是夕號令及宅儀矩不暇責有司一出處厚無違舊章者進拜中書侍郎同中書門下平章事封靈昌郡公堂史湯鉢數招權納財賂處厚笑曰此半滑渙也斥出之相府肅然初貞元時宰相齊抗奏罷州別駕及當爲別駕者引處之朝元和後兩河用兵裨將立功得補東宮王府官朱紫滄并授受不綱處厚乃置六雄十望十緊等州悉補別駕由是流品澄別帝雖自力機政然驟信輕改搖於浮論處厚嘗獨對曰陛下不以臣不肖使待罪宰相凡所奏可中輒變易自上心出邪乃示臣不信得於橫議邪卽臣何名執政且裴度元勳舊德輔四朝竇易直長厚忠實經

事先帝陛下所宜親重委信之臣乃陛下自擢今言不見納宜先罷卽趨下頓首帝矍然曰何至是卿之忠力朕自知之安可遽辭以重吾不德處厚趨出帝復召問所欲言乃對近君子遠小人始可爲治諄復數百言又言裴度忠可久任帝嘉納之自是無復橫議者時李同捷叛詔諸軍進討魏博史憲誠懷向背裴度待以不疑憲誠遣吏白事中書處厚召語曰晉公以百口保爾帥於天子我則不然正須所爲以邦法從事耳憲誠懼不敢貳卒有功李載義數破滄鎮兵皆剗剔以獻處厚戒之前後完活數百千人大和二年方奏事暴疾仆香案前帝命中人翼扶之輿還第一昔薨年五十六贈司空處厚姿狀如甚儒者居家亦循易至廷爭嶷然不可回奪剛干御史百僚謁事畏惕未嘗敢及以私推擇官材往往棄瑕錄善時亦譏其太廣性嗜學家書讎正至萬卷爲拾遺時諤德宗寶錄後又與路隋共次憲宗寶錄詔分日入直創具凡例未及成而終本名淳避憲宗諱改今名

路隋字南式其先出陽平父泌字安期通五經端亮寡言以孝悌聞建中末爲

長安尉德宗出奉天棄妻子奔行在扈狩梁州排亂軍以出再中流矢裂裳濡血以策說渾瑊召置幕府東討李懷光奏署副元帥判官從瑊會盟平涼爲虜所執死焉時隋嬰孺以恩授八品官逮長知父執虜中日夜號泣坐必西嚮不食肉母告以貌類泌者終身不引鏡貞元末吐蕃請和隋三上疏宜許不報舉明經授潤州參軍事李錡欲困辱之使知市事隋怡然坐肆不爲屈韋夏卿高其節辟置東都幕府元和中吐蕃款塞隋五上疏請修好冀得泌還詔可遣祠部郎中徐復報聘而泌以喪至帝愍惻贈絳州刺史官爲治喪服除擢隋左補闕史館修撰以鯁亮稱穆宗立與韋處厚並擢侍講學士再遷中書舍人翰林學士每除制出以金幣來謝者隋却之曰公事而當私貶邪進承旨學士遷兵部侍郎文宗嗣位以中書侍郎同中書門下平章事監修國史初韓愈撰順宗實錄書禁中事爲切直宦豎不喜訾其非實帝詔隋刊正隋建言衛尉卿周居易巢諫議大夫王彥威給事中李固言史官蘇景胤皆上言改修非是夫史冊者褒勸所在匹夫美惡尙不可誣況人君乎議者引雋不疑第五倫爲比以蔽聰

明臣宗閔臣僧孺謂史官李漢蔣係皆愈之壻不可參撰俾臣得下筆臣謂不然且愈所書已非自出元和以來相循逮今雖漢等以嫌無害公誼請條示甚謬誤者付史官刊定有詔擢貞元永貞間數事爲失實餘不復改漢等亦不罷進門下侍郎弘文館大學士久之辭疾不聽冊拜太子太師明年李德裕貶袁州長史不署奏爲鄭注所忌乃檢校尙書右僕射同中書門下平章事鎮海節度使道病卒年六十贈太保諡曰貞

贊曰縮以德服人而人自化可謂賢矣其論議渾大雖古王佐無以加祐甫發正己隱情渾策吐蕃必叛伐謀知幾君子哉處厚事穆敬文三宗主皆弗類而一納以忠寧不謂以堯事君者邪隋輔政十年歷牛李訓注用事無所迎將善保位哉

唐書卷一百四十二考證

楊綰傳帝以其言醜險不資貶端巴州員外司馬○舊書作廣州

柳渾傳入爲尚書右丞○舊書遷尚書左丞

改右散騎常侍○舊書改左騎常侍

貞元元年遷兵部侍郎○舊書貞元二年

唐書卷一百四十二考證

唐書卷一百四十三

宋 端 明 殿 學 士 宋 祁 撰

列傳第六十八

高元李韋薛崔戴王徐郗辛

高適字達夫滄州渤海人少落魄不治生事客梁宋間宋州刺史張九皋奇之舉有道科中第調封丘尉不得志去客河西河西節度使哥舒翰表爲左驍衛兵曹參軍掌書記祿山亂召翰討賊卽拜適左拾遺轉監察御史佐翰守潼關翰敗帝問羣臣策安出適請竭禁藏募死士抗賊未爲晚不省天子西幸適走間道及帝於河池因言翰忠義有素而病奪其明乃知荒踣監軍諸將不恤軍務以倡優菹豢相娛樂渾隴武士飯糲米日不厭而責死戰其敗固宜又魯炁何履光趙國珍屯南陽而一二中人監軍更用事是能取勝哉臣數爲楊國忠言之不肯聽故陛下有今日行未足深恥帝領之俄遷侍御史擢諫議大夫負氣敢言權近側目帝以諸王分鎮適感言不可俄而永王叛肅宗雅聞之召與

計事因判言王且敗不足憂帝奇之除揚州大都督府長史淮南節度使詔與江東韋陟淮西來瑱率師會安陸方濟師而王敗李輔國惡其才數短毀之下除太子少詹事未幾蜀亂出爲蜀彭二州刺史始上皇東還分劍南爲兩節度百姓敝於調度而西山三城列戍適上疏曰劍南雖名東西川其實一道自邛關黎雅以抵南蠻由茂而西經羌中平戎等城界吐蕃瀕邊諸城皆仰給劍南異時以全蜀之饒而山南佐之猶不能舉今裂梓遂等八州專爲一節度歲月之計西川不得參也嘉陵比困夷獠日雖小定而瘠瘠未平耕紡亡業衣食貿易皆資成都是不可得役亦明矣可稅賦者獨成都彭蜀漢四州而已以四州耗殘當十州之役其敝可見而言利者柄鑿萬端窮朝抵夕千案百牘皆取之民官吏懼譴責及鄰保威以罰扶而逋逃益滋又關中比饑士人流入蜀者道路相繫地入有訖而科斂無涯爲蜀計者不亦難哉又平戎以西數城皆窮山之顛蹊隧險絕運糧束馬之路坐甲無人之鄉爲戎狄言不足利戎狄爲國家言不足廣土宇奈何以彈丸地而困全蜀太平之人哉若謂已戍之城不可廢

已屯之兵不可收願罷東川以一劍南併力從事不爾非陛下洗盪關東清逆
亂之意也蜀人又擾則貽朝廷憂帝不納梓屯將段子璋反適從崔光遠討斬
之而光遠兵不戢遂大掠天子怒罷光遠以適代爲西川節度使廣德元年吐
蕃取隴右適率兵出南鄙欲牽制其力旣無功遂亡松維二州及雲山城召還
爲刑部侍郎左散騎常侍封渤海縣侯永泰元年卒贈禮部尙書諡曰忠適尙
節義語王霸袞袞不厭遭時多難以功名自許而言浮其術不爲搢紳所推然
政寬簡所涖人便之年五十始爲詩卽工以氣質自高每一篇已好事者輒傳
布其詒書賀蘭進明使救梁宋以親諸軍與許叔冀書令釋憾未度淮移檄將
校絕永王俾各自白君子以爲義而知變

元結後魏常山王遵十五代孫曾祖仁基字惟固從太宗征遼東以功賜宜君
田二十頃遼口并馬牝牡各五十拜寧塞令襲常山公祖亨字利貞美姿儀嘗
曰我承王公餘烈鷹犬聲樂是習吾當以儒學易之霍王元軌聞其名辟參軍
事父延祖三歲而孤仁基敕其母曰此兒且祀我因名而字之逮長不仕年過

四十親婭彊勸之再調春陵丞輒棄官去曰人生衣食可適饑飽不宜復有所須每灌畦掇薪以爲有生之役過此吾不思也安祿山反召結戒曰而曹逢世多故不得自安山林勉樹名節無近羞辱云卒年七十六門人私謚曰太先生結少不羈十七乃折節向學事元德秀天寶十二載舉進士禮部侍郎陽浚見其文曰一第恩子耳有司得子是賴果擢上第復舉制科會天下亂沈浮人間國子司業蘇源明見肅宗問天下士薦結可用時史思明攻河陽帝將幸河東召結詣京師問所欲言結自以始見軒陛拘忌諱恐言不悉情乃上時議三篇其一曰議者問往年逆賊東窮海南淮漢西抵函秦北徹幽都醜徒狼扈在四方者幾百萬當時之禍可謂劇而人心危矣天子獨以匹馬至靈武合弱旅鉏彊寇師及渭西曾不踰時摧銳攘凶復兩京收河南州縣何其易邪乃今河北姦逆不盡山林江湖亡命尙多盜賊數犯州縣百姓轉徙踵繫不絕將士臨敵而奔賢人君子遁逃不出陛下往在靈武鳳翔無今日勝兵而能殺敵無今日檢禁而無亡命無今日威令而盜賊不作無今日財用而百姓不流無今日爵

賞而士不散無今日朝廷而賢者思仕何哉將天子能以危爲安而忍以未安忘危邪對曰此非難言之前日天子恨愧陵廟爲羯逆傷汗憤悵上皇南幸巴蜀隱悼宗戚見誅側身勤勞不憚親撫士卒與人權位信而不疑渴聞忠直過弗諱改此以弱制彊以危取安之繇也今天子重城深宮燕和而居凝冕大昕纓佩而朝太官具味視時而獻太常備樂和聲以薦國機軍務參籌乃敢進百姓疾苦時有不聞廢芻良馬宮籍美女輿服禮物休符瑞諜日月充備朝廷歌頌盛德大業聽而不厭四方貢賦爭上尤異諧臣顛官怡愉天顏文武大臣至於庶官皆權賞踰望此所以不能以彊制弱以未安忘危若陛下視今日之安能如靈武時何寇盜彊弱可言哉其二曰議者曰吾聞士人共自謀昔我奉天子拒凶逆勝則國家兩全不勝則兩亡故生死決於戰是非極於諫今吾各位重財貨足爵賞厚勤勞已極外無仇讎害我內無窮賤迫我何苦當鋒刃以近死忤人主以近禍乎又聞曰吾州里有病父老母孤兄寡婦皆力役乞丐凍餒不足況於死者人誰哀之又聞曰天下殘破蒼生危窘受賦與役者皆寡弱貧

獨流亡死徙悲憂道路蓋亦極矣天下安我等豈無吠畝自處若不安我不復以忠義仁信方直死矣人且如此奈何對曰國家非欲其然蓋失於太明太信耳夫太明則見其內情將藏內情則罔惑生不能令必信信可必矣而太信之中至姦尤惡之如此遂使朝廷亡公直天下失忠信蒼生益寃結將欲治之能無端由吾等議於野又何所及其三曰議者曰陛下思安蒼生滅姦逆圖太平勞心悉精於今四年說者異之何哉對曰如天子所思說者所異非不知之凡有詔令丁寧事皆不行空言一再頗類諧戲今有仁卹之令憂勤之誥人皆族立黨語指而議之天子不知其然以爲言雖不行猶足以勸彼沮勸在乎明審均當而必行也天子能行已言之令必將來之法雜徭幣制拘忌煩令一切蠲蕩任天下賢士屏斥小人然後推仁信威令謹行不惑此帝王常道何爲不及帝悅曰卿能破朕憂擢右金吾兵曹參軍攝監察御史爲山南西道節度參謀募義士於唐鄧汝蔡降劇賊五千瘞戰死露膚於泌南名曰哀丘史思明亂帝將親征結建言賊銳不可與爭宜折以謀帝善之因命發苑葉軍挫賊南鋒結

屯泌陽守險全十五城以討賊功遷監察御史裏行荆南節度使呂誼請益兵拒賊帝進結水部員外郎佐諲府又參山南東道來瑱府時有父母隨子在軍者結說瑱曰孝而仁者可與言忠信而勇者可以全義渠有責其忠信義勇而不勸之孝慈邪將士父母宜給以衣食則義有所存矣瑱納之瑱誅結攝領府事會代宗立固辭丐侍親歸樊上授著作郎益著書作自釋曰河南元氏望也結元子名也次山結字也世業載國史世系在家諫少居商餘山著元子十篇故以元子爲稱天下兵興逃亂入猗玕洞始稱猗玕子後家瀆濱乃自稱浪士及有官人以爲浪者亦漫爲官乎呼爲漫郎旣客樊上漫遂顯樊左右皆漁者少長相戲更曰聲叟彼謂以聲者爲其不相從聽不相鉤加帶筇簪而盡船獨聲斷而揮車酒徒得此又曰公之漫其猶聲乎公守著作不帶筇簪乎又漫浪於人間得非聲斷乎公漫久矣可以漫爲叟於戲吾不從聽於時俗不鉤加於當世誰是聲者吾欲從之彼聲叟不慚帶乎筇簪吾又安能薄乎著作彼聲叟不羞聲斷於鄰里吾又安能慚漫浪於人間取而醉人議當以漫叟爲稱直荒

浪其情性誕漫其所爲使人知無所存有無所將待乃爲語曰能帶笈簪全獨而保生能學犛斷保宗而全家犛也如此漫乎非邪久之拜道州刺史初西原蠻掠居人數萬去遺戶裁四千諸使調發符牒二百函結以人困甚不忍加賦卽上言臣州爲賊焚破糧儲屋宅男女牛馬幾盡今百姓十不一在耄孺騷離未有所安嶺南諸州寇盜不盡得守捉候望四十餘屯一有不靖湖南且亂請免百姓所負租稅及租庸使和市雜物十三萬緡帝許之明年租庸使索上供十萬緡結又奏歲正租庸外所率宜以時增減詔可結爲民營舍給田免徭役流亡歸者萬餘進授容管經略使身諭蠻豪綏定八州會母喪人皆詣節度府請留加左金吾衛將軍民樂其教至立石頌德罷還京師卒年五十贈禮部侍郎

李承趙州高邑人幼孤其兄擘養之旣長以悌聞擢明經遷累大理評事爲河南採訪使判官尹子奇陷汴州拘承送洛陽覘得賊謀皆密啓諸朝兩京平例貶臨川尉不三月除德清令尋擢監察御史累遷吏部郎中淮南西道黜陟使

奏置常豐堰於楚州以禦海潮溉屯田墾鹵收常十倍它歲德宗將討梁崇義李希烈揣知之乃表崇義過惡請先誅討帝悅數對左右稱其忠會承使回言希烈能立功然恐後不可制帝初謂不然及崇義平希烈果叛始思其言擢拜河中尹晉絳觀察使承廉正有雅望以才顯於時未幾改山南東道節度使時希烈猶據襄州帝慮不受命欲以禁兵衛送承承辭請以單騎入既至希烈舍承外館迫脅日萬端承晏然誓以死守希烈不能屈遂大掠去襄漢蕩然承輯綏撫安之居二年闔境完復初希烈雖去留部校守規往來踵舍承因得任所厚臧叔雅結希烈腹心周曾王玠姚愴及曾等謀殺希烈承首謀也密詔襄美尋檢校工部尚書湖南觀察使建中四年卒年六十二贈吏部尚書

韋倫系本京兆父光乘在開元天寶間爲朔方節度使倫以蔭調藍田尉幹力勤濟楊國忠署爲鑄錢內作使判官國忠多發州縣齊人令鼓鑄督非所習雖筆扶苛嚴愈無功倫請準直募匠代無聊之人繇是役用減鼓鑄多矣玄宗晚節威營宮室吏介以爲欺倫閱實工員省費倍從帝入蜀以監察御史爲劍南

節度行軍司馬置頓判官時中人衛卒多侵暴尤難治倫以清儉自將西人賴
濟中宦疾之以讒貶衡州司戶參軍度支使第五琦薦倫才擢商州刺史荆襄
道租庸使襄州裨將康楚元亂自稱東楚義王刺史王政棄城遁賊南襲江陵
絕漢沔餉道倫調兵屯鄧州厚撫降賊寇益怠乃擊禽楚元以獻收租庸二百
萬緡召爲衛尉卿俄兼寧隴二州刺史乾元中襄州亂詔倫爲山南東道節度
使而李輔國方恣橫倫不肯謁憾之中罷爲秦州刺史吐蕃党項歲入邊倫兵
寡數格虜敗貶巴州長史徙務川尉代宗立連拜忠台饒三州刺史宦者呂太
一反嶺南詔拜倫韶州刺史韶連郴都團練使爲太一反間貶信州司馬斥棄
十年客豫章德宗嗣位選使絕域者擢倫太常少卿充和吐蕃使倫至諭天子
威德贊普順悅乃入獻還進太常卿兼御史大夫再使如旨倫處朝數論政得
失宰相盧杞惡之改太子少保從狩奉天及杞敗關播罷爲刑部尙書倫在朝
堂流涕曰宰相無狀使天子至此不失爲尙書後何勸聞者憚其公帝後欲復
用杞爲刺史倫苦諫言懇至到帝納之進太子少師郢國公致仕時李楚琳以

僕射兼衛尉卿李忠誠以尙書兼少府監倫言楚琳逆節忠誠戎醜不當寵以官又請爲義倉以捍無年擇賢者任帝左右謂吐蕃豺虎野心不可事信約宜謹備邊帝善其言厚禮之居家以孝慈稱卒年八十三贈揚州都督諡曰肅薛珏字温如河中寶鼎人以蔭爲懿德太子廟令累遷乾陵臺令歲中以清白聞課第一改昭應令人請立石紀德珏固讓遷楚州刺史初州有營田宰相遙領使而刺史得專達俸及宅給百餘萬田官數百歲以優得遷別戶三千備刺史廝役珏至悉條去之租入贏異時觀察使惡其潔誣以罪左授峽州刺史建中初德宗命使者分諸道察官吏升黜焉而李承狀珏之簡趙贊言其廉盧翰稱其肅書參聞於是拜中散大夫賜金紫劉玄佐表兼汴宋行軍司馬李希烈棄汴州走卽拜珏刺史遷河南尹入爲司農卿是時詔舉堪刺史縣令者且百人延問人間疾苦吏得失取尤通達者什二宰相欲校以文詞珏曰求良吏不可責文學宜以上愛人之本爲心也宰相多其計所用皆稱職爲京兆尹司農供三宮畜茹三十車不足請市京兆是時章彤爲萬年令珏使彤禁鬻賣民苦

之德宗怒奪珏彤俸帝疑下情不達因詔延英坐日許百司長官二員言闕失謂之巡對珏剛嚴曉法治勤身以勸下然苛察無經術大體坐善竇參改太子賓客出爲嶺南觀察使卒年七十四贈工部尚書子存慶字嗣德貌偉岸及進士第歷御史尚書郎五遷給事中與韋弘景封駁詔書時稱其直劉總以幽州歸穆宗謂宰相曰必用薛存慶可以宣朕意對延英一刻遣之至鎮州疽發於背卒贈吏部侍郎

崔漢衡博州博平人沈懿博厚善與人交始爲費令滑州節度使令狐彰表掌書記大曆六年以檢校禮部員外郎爲和蕃副使還遷右司郎中建中二年吐蕃請盟擢殿中少監爲和蕃使與其使區頰贊俱來約盟改鴻臚卿持節送區頰贊歸遂定盟清水德宗幸奉天吐蕃以兵佐渾瑊敗賊武功轉祕書監俄拜上都留守兵部尚書東都淄青魏博賑給宣慰使又使幽州還命稱指貞元三年豫吐蕃盟平涼被執虜將殺之因夷言謂之曰我善結贊無殺我而漢衡誠信素著虜亦尊重故至河州得還明年出爲晉慈隰觀察使卒贈尚書左僕射

戴叔倫字幼公潤州金壇人師事蕭穎士爲門人冠劉晏管鹽鐵表主運湖南至雲安楊惠琳反馳客劫之曰歸我金幣可緩死叔倫曰身可殺財不可奪乃捨之嗣曹王皋領湖南江西表佐幕府皋討李希烈留叔倫領府事試守撫州刺史民歲爭漑灌爲作均水法俗便利之耕餉歲廣獄無繫囚俄卽真期年詔書褒美封譙縣男加金紫服齊映劉滋執政叔倫勸以屯難未靖安之者莫先於兵兵所藉者食故金穀之司不輕易人天下州縣有上中下緊望雄輔者有司銓擬皆便所私此非爲官擇人爲人求治之術其尤切者縣令錄事參軍事此二者宜出中書門下無計資序限遠近高卑一以殿最升降則人知勸映等重其言遷容管經略使綏徠夷落威名流聞其治清明仁恕多方略故所至稱最德宗嘗賦中和節詩遣使者寵賜代還卒于道年五十八

王翊字宏肱并州晉陽人少治兵家天寶中授翊衛尉羽林軍宿衛擢才兼文武科出爲辰州刺史與討襄州康楚元有功加兼祕書少監遷郎州刺史大曆中擢容管經略使初安祿山亂詔嶺南兵隸南陽魯炁炁敗績衆奔潰谿洞夷

獠相挺爲亂夷酋梁崇牽號平南都統與別帥覃問合又與西原賊張侯夏承更誘嘯因陷城邑遂據容州前經略使陳仁琇元結長孫全緒等皆僑治藤梧翊至言於衆曰我容州刺史安可客治宅所必得容乃止卽出私財募士有功者許署吏於是人自奮不數月斬賊帥歐陽珪因至廣州請節度使李勉出兵併力勉不許曰容陷賊久獠方彊今速攻祇自敗耳翊曰大夫卽不出師願下書州縣陽言以兵爲助冀藉此聲成萬一功勉許諾翊乃移書義藤二州刺史約皆進討引兵三千與賊鏖戰日數遇勉撤止之輒匿不發戰愈力卒破賊禽崇牽悉復容州故地捷書聞詔更置順州以定餘亂翊凡百餘戰禽首領七十覃問遁去復遣將李寔等分討西原平鬱林等諸州累兼御史中丞招討處置使會哥舒晃反翊命寔悉師援廣州問因合衆乘間來襲翊設伏擊之生禽問嶺表平代宗遣使慰勞加金紫光祿大夫賜第京師時吐蕃入寇郭子儀悉河中兵乘邊召翊爲河中少尹領節度後務悍將凌正數干法不逞約其徒夜斬關逐翊翊覺之陰亂漏刻以差其期衆驚不敢發俄禽正誅之一軍惕息歷汾

州刺史爲振武軍使綏銀等州留後入拜京兆尹會起涇原兵討李希烈次涇水京兆主供擬饗敗肉腐衆怒曰食是而討賊乎遂叛翊挺身走奉天拜太子詹事德宗還都再遷大理卿出爲福建觀察使徙東都留守既至開田二十餘屯修器械皆良金壽革練士卒號令精明俄而吳少誠叛獨東畿爲有備關東賴之貞元十八年卒贈尚書右僕射諡曰肅翊雅善盧杞杞之殺崔寧沮李懷光不得朝皆與其謀議者以爲訾子正雅字光謙行謹飭爲崔邠所器元和初擢進士遷累監察御史穆宗時京邑多盜賊正雅以萬年令威震豪彊尹柳公綽言其能就賜緋魚累擢汝州刺史屬監軍怙權乃謝病去入爲大理卿會爭宋申錫獄堅甚申錫得不死太和中卒贈左散騎常侍翊兄翊性謙柔歷山東道節度使代宗目爲純臣世稱謹廉卒贈戶部尚書諡曰忠惠

翊曾孫凝字成庶少孤依其舅宰相鄭肅舉明經進士皆中歷臺省寢入知名擢累禮部侍郎不阿權近出爲商州刺史驛道所出吏破產不能給而州有冶賦羨銀常摧直以優吏奉凝不取則以市馬故無橫擾人皆慰悅徙湖南觀察

使僖宗立召爲兵部侍郎領鹽鐵轉運使坐舉非其人以祕書監分司東都卽拜河南尹遷宣歙池觀察使時乾符四年也王仙芝之黨屠至德勢益張凝遣牙將孟琢助池守賊益兵來攻實欲襲南陵凝遣樊儵以舟師扼青陽儵違令輕與賊戰不勝凝斬以徇諸將聞皆股慄以死綴賊賊不能進時江南環境爲盜區凝以彊弩拒采石張凝幟遣別將馬穎解和州之圍明年賊大至都將王涓自永陽赴敵凝大宴謂涓曰賊席勝而驕可持重待之慎毋戰涓意銳日趨四舍至南陵未食卽陣死焉監軍收餘卒數千還走城沮撓無去意卒又恣橫不能禁凝讓曰吏捕蝗者不勝而仰食於民則率暴以濟災也今兵不能捍敵又恣之犯民生業何以稱朝廷待將軍意監軍詞屈趣親吏入民舍奪馬凝乘門望見麾左右捕取殺之由是不敢留然益儲畜繕完以備賊賊至不能加會大星直寢庭墜術家言宜上疾不視事以厭勝凝曰東南國用所出而宣爲大府吾規脫禍可矣顧一方何賴哉誓與城相存亡勿復言旣而賊去未幾卒年

五十八贈吏部尙書諡曰貞

徐申字維降京兆人擢進士第累遷洪州長史嗣曹王皋討李希烈檄申以長
史行刺史事任職辦臬表其能遷韶州刺史韶自兵興四十年刺史以縣爲治
署而令丞雜處民間申按公田之廢者募人假牛犂墾發以所收半畀之田久
不治故肥美歲入凡三萬斛諸工計所庸受粟有差乃徙治故州未幾邑閭如
初創驛候作大市器用皆具州民詣觀察使以其有功於人請爲生祠申固讓
觀察使以狀聞遷合州刺史始來韶戶止七千比六年倍而半之會初置景州
授刺史賜錢五十萬加節度副使遷邕管經略使黃洞納質供賦不敢桀踰年
進嶺南節度使前使死吏盜印署府職百餘員畏事泄謀作亂申覺殺之誅誤
一不問遠俗以攻劫相矜申禁切無復犯外蕃歲以珠璣瑁香文犀浮海至申
於常貢外未嘗贖索商賈饒盈劉闢反表請發卒五千循馬援故道繇夔蠻抵
蜀擣闢不備詔可加檢校禮部尙書封東海郡公詔未至卒年七十贈太子少
保諡曰平

郗士美字和夫兗州金鄉人父純字高卿舉進士拔萃制策皆高第張九齡李

邕數稱之自拾遺七遷至中書舍人處事不回爲宰相元載所忌時魚朝恩以牙將李琮署兩街功德使琮恃勢桀橫衆辱京兆尹崔昭于禁中純曰此國恥也卽詣載請速處其罪載不納遂辭疾還東都號伊川田父十年不出德宗立崔祐甫輔政召爲太子左庶子集賢殿學士不拜以老乞身改詹事聽致仕帝召見褒數良久賜金紫公卿以下咸祖都門世高其節士美年十二通五經史記漢書皆能成誦父友蕭穎士顏真卿柳芳與相論繹嘗曰吾曹異日當交二郤之間矣未冠爲陽翟丞佐李抱真潞州幕府以才歷王虔休李元皆留不徙久乃進房州刺史黔中經略觀察使溪州賊向子琪以衆八千岨山剽劫士美討平之加檢校右散騎常侍封高平郡公遷京兆尹天子多所咨逮出爲鄂岳觀察使時安黃節度使伊慎入朝其子宥主後務偃蹇母死京師不發喪欲固其權士美知之使府屬過其境宥出迎因以母訃告之卽爲辦裝宥惶遽上道改河南尹檢校工部尙書充昭義節度使昭義自李抱真以來皆武臣私廚月費米六千石羊千首酒數十斛潞人困甚士美至悉去之出粟錢市物自給又

盧從史時日具三百人膳以餉牙兵士美曰卒衛於牙固職也安得廣費爲私恩亦罷之討王承宗也遣大將王獻督萬人爲前鋒獻恣橫逗撓士美卽斬以徇下令曰敢後者斬親鼓之大破賊下三營環柏鄉時諸鎮兵合十餘萬繞賊多玩寇犯法獨士美兵銳整最先有功憲宗喜曰固知士美能辦吾事承宗大震懼亡幾會詔班師然威震兩河以疾召拜工部尙書後檢校刑部尙書爲忠武節度使卒年六十四贈尙書左僕射諡曰景生平與人交已然諾以是名重於世

辛祕系出隴西貞元中擢明經第授華原主簿以判入等調長安尉其學於禮家尤洽高郢爲太常卿奏爲博士再遷兵部員外郎常兼博士再辟禮儀使府憲宗初拜湖州刺史李錡反遣大將先取支州蘇常杭睦四刺史或戰敗或拘脅獨祕以儒者賊易之未及至祕召牙將丘知二夜開城收壯士得數百逆賊大戰斬其將進焚營保錡平賜金紫僉謂祕材任將帥會河東范希朝出討王承宗召祕爲希朝司馬主留務累遷汝常州刺史河南尹進拜昭義軍節度使

是時承討恆趙之後潞人彫耗祕至則約出入嗇用度比四年儲錢十七萬緡糧七十萬斛器械堅良隱然復爲完鎮召還道病卒年六十四贈尚書左僕射諡曰肅後更諡懿祕爲大官居不易第服不改初其奉祿悉與裏表親屬病自銘其墓作書一通緘之卒後發視則送終制也儉而不違於禮云

唐書卷一百四十三

唐書卷一百四十三考證

李承傳居二年闕境完復○舊書承治之二年頗得完復

王翊傳翊兄翊性柔謙歷山南東道節度使○沈炳震曰本紀自至德至上元
山南東道爲魯昷來瑱史翹無王翊也此或屬副使

辛祕傳授華原主簿○舊書作華原尉

證曰肅後更證懿○舊書作證曰昭

唐書卷一百四十三考證

唐書卷一百四十四

宋 端 明 殿 學 士 宋 祁 撰

列傳第六十九

來田侯崔巖

來瑱邠州永壽人父曜奮行間開元末持節磧西副大使四鎮節度使著名西邊終右領軍大將軍瑱略知書尚名節崖然有大志天寶初從四鎮任劇職累遷殿中侍御史伊西北廷行軍司馬詔舉智謀果決才堪統衆者拾遺張鎬薦瑱能斷大事有禦侮才擢潁川太守充招討使會母喪免以孝聞安祿山反張垧薦之與塊次拜汝南太守未行改潁川賊攻潁川方積粟多瑱完埤自如手射賊皆應弦仆賊使降將畢思琛招之父故將也拜城下泣且弔瑱不應前後俘殺甚衆賊懼目爲來嚼鐵以功就加防禦使河南淮南游奕逐要招討使徙山南東道節度使代魯炁會嗣號王巨表炁方固守乃還瑱故官賊圍南陽急瑱與魏仲犀合兵救之不勝人情恟懼瑱能撫訓士舉勳安重賊不得侵改淮

南西道節度兩京平封穎國公食二百戶乾元二年徙河西未行王師敗於相州詔拜陝虢節度兼潼關防禦團練鎮守使明年襄州部將張維瑾等殺其使史翹徙瑱山南東道襄鄧均房金商隨郢復十州節度使既至維瑾降上元二年春破史思明餘黨於魯山俘賊渠又戰汝州獲馬牛橐駝凡兩戰斬首萬級明年詔瑱還瑱安襄漢士亦宜其政因諷衆留己而外示行至鄧復詔歸鎮肅宗聞其謀惡之呂諲王仲昇等皆言瑱得士心不可以留乃改山南東道襄鄧唐復隨郢六州節度俄而仲昇與賊戰申州爲賊禽初仲昇被圍而江陵呂諲病瑱顧望不卽救及師出仲昇已沒行軍司馬裴莪表其狀且言瑱善謀而勇恐後難制卽除之可一戰禽也帝頗謂然遂改瑱淮西申安蘄黃光沔兼河南陳豫許鄭汴曹宋潁泗十五州節度以寵之陰奪其權加莪襄鄧等七州防禦使代瑱瑱懼釋言淮西無糧須麥收可上道又諷衆固留代宗立復授襄州節度奉義軍渭北兵馬使密詔莪圖之莪自均州率衆浮漢下會日入候者白瑱瑱與帳下謀其副薛南陽曰公奉詔留鎮而莪以兵脅代是無名也莪智勇非

公敵而衆心不附彼若乘我不虞縱火夜攻誠可憂也若須明則破之必矣明日戎督軍五千陣穀水北瑱以兵迎之呼其軍告曰爾何事來曰公不受命故中丞伐罪瑱曰詔還鎮此州乃以詔書示之皆曰僞也吾千里討賊豈空歸邪爭射之瑱走旗下薛南陽曰請公勒兵勿戰乃以三百騎爲奇兵旁萬山出其背夾擊之其衆幾盡戎脫身走至申口禽之送京師瑱因入朝謝罪帝待之無疑拜兵部尙書同中書門下平章事充山陵使是時程元振居中用事疾瑱乃告與巫祝言不順會王仲昇歸又言由瑱與賊合故陷賊帝積怒遂下詔削除官爵貶播川尉員外置及鄆賜死籍其家瑱之死門下客散去掩尸于坎校書郎殷亮獨後至哭尸側爲備棺衾以葬帝徐悟元振誣以宅罪流溱州先是瑱行軍司馬龐充以兵二千戍河南至汝聞瑱死乃還襲襄州別將李昭禦之走房陵昭與薛南陽梁崇義不相臣崇義殺昭帝以崇義爲節度使代瑱旣而爲瑱立祠四時致饗避瑱廳事不處哀祈禮葬詔可廣德元年追復官爵裴茂者始以蔭爲京兆司錄參軍瑱鎮陝州引爲判官移襄州又爲行軍司馬遇之厚

及瑱私漢上表欲得其處故背瑱言狀帝倚以圖瑱而性輕褊少謀師與給用無節及敗有詔流費州至藍田賜死

田神功冀州南宮人天寶末爲縣史會天下兵興賊署爲平盧兵馬使率衆歸朝從李忠臣收滄德攻相州拒杏園後守陳留戰不勝與許叔冀降于史思明思明使與南德信劉從諫南略江淮神功襲德信斬之從諫脫身走乃并將其兵詔拜鴻臚卿襲敬釭鄆州不克劉展反鄧景山引神功助討自淄青濟淮衆不整入揚州遂大掠居人貲產發屋剔竅殺商胡波斯數千人俄而禽展送京師遷淄青節度使會侯希逸入青州更徙兗鄆時賊圍宋州急李光弼奏神功往救賊解去又破法子營復攻敬釭降之朝義聞乃奔下博進封信都郡王徙河南節度汴宋八州觀察使大曆二年來朝加檢校尚書右僕射詔宰相百官送至省又判左僕射知省事加太子太師還軍神功事母孝始嘗倨驕自如見光弼待官屬鈞禮乃折節謙損既寢疾宋之將吏爲禳祈報恩八年自力入朝卒代宗爲撤樂贈司徒詔其弟曹州刺史神玉知汴州留事賻絹千匹布五百

端百官弔喪賜屏風茵褥飯千桑門進福至德後節度使不兼宰相者惟神功恩禮最篤神玉終汴宋節度留後

侯希逸營州人長七尺豐下銳上天寶末爲州裨將守保定城安祿山反使中人韓朝敷傳命希逸斬以徇祿山又以親將徐歸道爲節度使希逸率兵與安東都護王玄志斬之遣使上聞詔拜玄志平盧節度使玄志卒副將李正己殺其子共推希逸有詔就拜節度使兼御史大夫與賊确數有功然孤軍無援又爲奚侵掠乃拔其軍二萬浮海入青州據之平盧遂陷肅宗因以希逸爲平盧淄青節度使自是淄青常以平盧寇使寶應初與諸軍討平史朝義加檢校工部尙書賜寶戶圖形凌煙閣希逸始得青治軍務農有狀後稍怠肆好畋獵佞佛興廣祠廬人苦之夜與巫家野次李正己因衆怨閉闔不內遂奔滑州召還檢校尙書右僕射知省事大曆末進封淮陽郡王建中二年遷司空未及拜卒年六十二遺敕其子上還前後實封贈太保

崔寧本貝州安平人後徙衛州世儒家而獨喜縱橫事因落魄客劍南以步卒

事鮮于仲通又從李宓討雲南無功還成都行軍司馬崔論悅之薦爲牙將歷事崔圓裴冕冕被謗朝廷疑之遣使者問狀寧部兵務耳白其寃使者以聞寧亦還京師留爲折衝郎將寶應初蜀亂山賊乘險道不通嚴武白寧爲利州刺史既至賊遁去由是知名及武爲劍南節度使過州心欲與俱西而利非所屬使寧自爲計寧曰節度使張獻誠見疑難輒去然獻誠嗜利若厚賂之寧可以從大夫矣武然之以奇錦珍貝遺獻誠且求寧獻誠果喜令自移疾去武遂奏爲漢州刺史吐蕃引雜羌寇西山破柘靜等州有詔收復於是武遣寧將而西既薄賊城城皆累石不得攻惟東南不合者丈許諜知之乃爲地道再宿而拔拓地數百里虜衆驚相謂曰寧神兵也及還武大悅裝七寶輦迎入成都以夸于軍永泰元年武卒行軍司馬杜濟別將郭英幹郭嘉琳皆請英幹之兄英乂爲節度使寧與其軍亦丐大將王崇俊奏俱至而朝廷既用英乂矣英乂恨之始署事卽誣殺崇俊又遣使召寧寧恐託拒吐蕃不敢還英乂怒因出兵聲言助寧實欲襲取之卽徙寧家於成都而淫其妾媵寧懼益負阻英乂乃自將討

之會天大雪馬多凍死士心離遂敗歸寧聞英又損裁將卒稟賜下皆恨怒又毀玄宗冶金像乃令軍中曰英又反輒居先帝舊宮乃進薄成都英又陣城西使柏茂琳爲前軍英幹爲左軍嘉琳爲後軍與寧戰茂琳等敗軍多降寧寧卽署降將使率兵還攻英又不勝走靈池爲韓澄所殺於是劍南大擾楊子琳起瀘州與邛州柏貞節連和討寧明年代宗詔宰相杜鴻漸爲山西劍南邛南等道副元帥劍南西川節度使往平其亂鴻漸出駱谷或進計曰公不如駐闕中數騰書陳英又罪嘉寧方略因以寧所署刺史卽授之使不疑而後與東川張獻誠及諸帥合兵擾寧不一年寧勢且窮必束身歸命鴻漸疑未決會寧遣使至獻繒錦數萬辭卑約甚鴻漸貪其利遂入成都政事一委寧日與僚屬杜亞楊炎縱酒高會乃表貞節爲邛州刺史子琳爲瀘州刺史以和解之又數薦寧於朝先是寧與張獻誠戰奪其旌節不肯與故朝廷因授寧成都尹山西防禦使西川節度行軍司馬鴻漸旣還朝遂爲節度使大曆三年來朝寧本名旰至是賜名楊子琳襲取成都帝乃還寧於蜀未幾子琳敗寧見蜀地險饒於財而

朝廷不甚有紀乃痛誅斂使第寬居京師以賂厚謝權貴深結元載父子故寬驟擢御史中丞寬兄審至給事中寧在蜀久兵寢疆而肆侈窮欲將吏妻妾多爲汙逼朝廷隱忍不能詰累加尙書左僕射十四年入朝進檢校司空同中書門下平章事兼山陵使俄以平章事爲御史大夫卽建白擇御史當出大夫不宜謀及宰相因奏李衡于結等任御史宰相楊炎怒寢不行炎方詆劉晏寧申救於帝又素事元載而炎亦出載門故銜之未忍發是歲十月南蠻與吐蕃合兵入文川方維邛邛邛邛州縣民逃匿山谷中寧方在朝軍無帥德宗促寧還鎮炎業與有嫌恐己入蜀不可制卽說帝曰蜀天下之奧壤自寧擅制朝廷失外府十四年矣今寧雖來以全師守蜀賦稅入天子者與無地同寧本與諸將等夷獨因叛亂得位不敢自有以恩柔煦育故威令不行今雖歸之必無功是徒遣也若其有功誼不容奪則西蜀之奧敗固失之勝亦非國家所有惟陛下孰察帝曰卿策云何炎曰請無歸寧今朱泚所部范陽勁卒戍近甸趨與禁兵雜往舉無不克因是役得以親兵內其腹中則蜀將破膽不敢動然後換授他

帥以收其權得千里肥饒之地是謂因小禍受大福也帝曰善遂罷寧西川節度改兼京畿觀察使靈州大都督單于鎮北大都護朔方節度鄜坊丹延州都團練觀察等使託言重臣綏靜北陲而每道置留後使得自奏事杜希全靈州王翊振武李建徽鄜州及戴休顏杜從政呂希倩皆炎署置使伺寧過失寧至夏州與希倩招黨項降者甚衆炎惡之卽奏希倩無綏邊才而以神武將軍時常春代之更拜寧尙書右僕射知省事司空如故朱泚亂帝出居奉天寧後數日至帝喜甚寧謂所親曰上聰明從善如轉規但爲盧杞所惑至此爾因潸然涕下杞聞之思有以構寧於帝會王翊赴難時與寧俱出延平門而西寧數下馬趨廁輒迂久翊懼賊追卽呼曰旣至此而欲顛望乎杞微聞卽諷翊以聞會泚行反間而除柳渾爲宰相署寧中書令時朔方掌書記康湛爲整屋尉翊逼湛詐作寧遺泚書獻之杞遂奏寧初無效順心向聞與賊盟署中書令今果後至復得所與賊書反狀明甚若兇渠外逼姦臣內謀則大事去矣因俯伏獻劾曰臣備位宰相危不能持顛不能扶罪當死帝命左右扶起之乃召寧至朝堂

云使宣慰江淮俄而中人引寧幕後使二力士縊殺之年六十一初命陸贄草制贄索寧與泚書將坐其事杞復云書已亡寧死籍其家中外寃之帝乃赦寧親屬而歸其資云貞元十二年寧故將夏綏銀節度使韓潭請以所加禮部尙書雪寧罪有詔聽其家收葬始寧入朝留其弟寬守成都楊子琳乘間起瀘州以精騎數千襲據其城寬戰力屈寧妾任素驍果卽出家財十萬募勇士得千人設部隊自將以進子琳大懼會糧盡且大雨引舟至廷乘而去子琳者本瀘南賊帥旣降詔隸劍南節度屯瀘州杜鴻漸表爲刺史旣敗收餘兵沿江而下諸刺史震慄備鎮牢以饗士過黃草峽守捉使王守仙伏兵五百子琳前驅至悉禽之遂入夔州殺別駕張忠城守以請罪朝廷以其本謀近忠故授峽州刺史移澧州鎮遏使後歸朝賜名猷寧季弟密密子繪俱以文辭稱繪四子蠡黯確顏皆擢進士第蠡字越卿開成中爲戶部侍郎白罷忌日百官行香有詔褒可歷平盧天平軍節度使終尙書左丞子蕘字野夫乾符中爲吏部侍郎美文辭談辯華給以銓管非所長出爲陝虢觀察使是時王仙芝亂漢上河南羣盜

與堯簡悅不曉事但以器韻自高委政廝豎不恤人疾苦或訴旱者指廷樹示之曰柯葉尙爾何旱爲卽榜笞之上下離心俄爲軍吏所執髡其鬚堯再拜祈免乃得去渴甚求飲於民民飲以溺坐失守貶端州司馬終左散騎常侍黯字直卿開成初爲監察御史奏郊廟祭事不虔文宗語宰相曰宗廟之禮朕當親之但千乘萬騎國用不給故使有司侍祠然是日朕正衣冠坐以俟旦今聞主者不虔祭器敝惡豈朕事神蠲潔意邪公宜敕有司道朕斯意黯乃具條以聞擢員外郎累遷諫議大夫確顏位皆郎中

嚴礪字元明震從祖弟也少爲浮屠法太守見之偉其材表爲玄武尉震在山南署牙將德宗之幸主饋餉有功然輕躁多姦謀以便佞自將累爲興州刺史震卒以礪權主留府事遺言薦之卽拜本道節度使詔下諫議大夫給事中補闕拾遺合議皆以爲礪資淺士望輕不宜授節制帝不從礪在位貪沓苟得士民不勝其苦素惡鳳州刺史馬勛卽誣奏貶賀州司戶參軍劉闢反以儲備有素檢校尙書左僕射節度東川擅沒吏民田宅百餘所稅外加斂錢及芻粟數

十萬元和四年卒贈司空後監察御史元稹奉使東川劾發其贓請加惡謚朝廷以其死故但追田宅奴婢還其主稅外所斂悉蠲除云

唐書卷一百四十四